

Aposolo

Yesuŋo Asu Talekaki Kesiakane Edange

¹ O Thiopilus, na papia alakan qe gingle, ea mo Yesuŋo urataine kiekki paki, urata kine kine korop make, so miti don kito edange, ea wane don kisiine okan gangole. ² Yesu eŋe urataine kieke ma ari mageki, nasoine bomileki Asu Koboboinerŋo talekaki, aposolo koune ebuke, eŋe don zonomine qoi qoine urata ŋei koune edane ebon wareke, qoeki Anutuŋo qeliwo ma wake, don kisi yewa ma korop qe gin warekole.

³ Eŋe wikile dere ari mage seukki paki koso wisikae wie more urata ŋeikoune aposolo, edo kineine ka more Yesu eŋe welekatne wisikae wieke, yale detlukkaikei wane eŋe kaiwe 40 wakon ongi kakoi, qoekiso eŋe Anutu wane qeli ewe zonominane kine ra qelanane edange.

⁴ Pakiso eŋe wekuoka lewage metpi Yesuŋo edane rake, “Ŋine Yerusalem mat misuk qeliŋ kaikei, Magakŋo ŋinane kine kine mane binjek qe rake, ea wane wele wakoniake wane ŋine yewa toma gekei. Na ea wane don kisi mo ŋidanbe detkoi.

⁵ Yohane eŋe dokuka taununge, ŋo noŋo yemo geu mi azongi Asu Koboboine qe wat ŋunikale.”

Yesuŋo Qeliwo Wake

⁶ Eso naso yewa aposolo eŋe wekuoka lewage mere Yesu qesonka rakoi, “Waom, ge naso dango zinge more, Israel ŋei ŋene qedugu ŋone more,

nei waom okan njonnom, jene naso yewao koso kepe wane nei waomzerop okanikene me?”

⁷ Raumo Yesuṅo edane rake, “Magakṅo enjine zonominane naso so kaiwe urata mama kiroine me bamgo motke, eamo njido desikei wane rokop midaka. eamo enj enjomka ware kamaike. ⁸ No njine yemo ban Asu Koboboinerjo kutṅino ket more zonom qewatke njibongi njine nanjane don kisi ra wakonikei. Pakimo njine ban Yerusalem matko njine kieke don kisine korop ra wakone edane more Yuda kepeo so Samaria kepeo korop ra edane ari mageu kepe sotakino qoewareake.”

⁹ Enj don iwa raki qoeki, dokoine enj ka okorau, so enj yewaka qeliwo kere wake, pakiso kezonjo kawet kaki enj koso mi kakoi.

¹⁰ Yesu enj wa ariki, dokoine enj deene qeliwoka pore kalilipka okorau, yewaka nei etke takotetne libekaṅo enjane osoeno wakone okorakoik. ¹¹ Paki eto edane rakoik, “Galili nei njine onoka wane denjine qeliwoka pore okoramami? Njine ukude Yesu iwa kau, Anutuṅo qeliwo mawamaike, enj zinge sariake naso yewao, enj ukude kau qeliwo wamaike, enj ea wane rokopka koso zinge sariake.”

¹² Pakiso aposolo enj Oliwa Bonagaonjine zinge ket more, koso Yerusalem matko arikoi. Oliwa bonaga eamo Yerusalem mat wane osino, kilomita weku, sabat nasoo maine ari lotkekei ea wane rokop. ¹³ Enj ari Yerusalem matko lotkeu paki, mat koto waket more urum kutno weti wa mere ge okan mankoi, yewao wakoi. Enjane enjetene yem iwa yale, Petoro, Yohane, Yakop so Andrea, Pilip so Tomas, Bartolomu so Mataio,

Yakop Alpaiu wane gipole, Simon Zelot so Yudas, Yakop wane gipole. ¹⁴ Nei magu yewa edo wet weku okane more, meñe meñen urata tako rakot ma gekoi. Yale okanbi ñerep natne, so Yesu nagaine Maria, so Yesu ñolekoune, eñe wenen qesin onbi meñe meñen urata ma gekoi.

Yudas Wane Tungo Matias Ma Wakonkakoi

¹⁵ Eso naso Yewao Petoroño kimakoune so ñei ñerep zaleene 120 eñane keueno wie okora more don iwa yale edange, ¹⁶ “Kimakopne, Asu Koboinoño Dawit wane wetne ma eweke more anaino don motki Yudas wane don mane mokaka rake, papiao pamaike, don ea wane wele wako-niakane Yudasño ñaba iwenone more sikanongi, Yesu makoi. ¹⁷ Yudas eñe alakan ñenerop geke, eñe ñenane maguo ñine, so miti urata iwa, eñe wenen mayakane ra mange.”

¹⁸ Yudas eñe siron qeki Yesu makoi, paki lewine wesi mangoi, sot wesi, yewano kepe mane qoleke, eñe yewao ari more, wouineño alakangi mapi-lage ket qeki, woune qulunji kaine korop qake saket wareke. ¹⁹ Pakiso, Yerusalem matko ñei ñerep gekoi eñe korop don kisi yewa dere more kepe ea wane eñetine enñene dongoka “Akel-dame” orakoi, don ea wane kine yem, “Wenjem kepe.”

²⁰ “Ea wane kibi yemo Sam wane Papiao Daw-itño iwa yale qeke.

‘Eñane mat yewa maine yaup okorayake, ñei maneno yewao misuk geake.’

Eso Sam maneo iwa yale ramaike,

‘Nei maneno eñane tungo urata yewa mayake.’

21 “Eso ea wane mo nene nei mane Waom Yesu ene nenerop geki, ge okanjem njabanonmanjko, so nene naso banem enerop ari sari okane gekone, nei magu yewa nenze keuzo njine mane ma wakonka birakanjem. 22 So alakan mo Yohanenjo nei nrep doku tau one ge samanki, koso Yesujo doku yale waka tau more urata kiekke. Paki ma ge sari mageki ukude kaiwe iwa okanmai, so Anutunjo Yesu nenanonjine koso ma more geliwo mawake, nei yaline keuzo njine mane kanjem paki, ma wakonka birakanjem, ene nene qesinjongi urata ma more, Yesu seuke more wisikae wieke, ea wane sigi maep yewa wenenj nenzarek ra qelanjnikene.”

23 Petoro ene yale rakiso ene nei etke ma wakonotkoi. Mane Yosep, ene Basabas ramami, so enetine mane Yustus. so nei mane yemo Matias. 24 Ma wakon ore more ene yewaka menjenka rakoi, “O Waom, ge nei nrep enane kotoenane kine det luk waremaine. Nei etke iwa erano njine mane ma wesakka more ma wakonkamaine, ea sikanjonnom kanjem. 25 Onjo Yudas wane tungo aposolo urata iwa takotke nenerop mageyake. Yudas ene urata iwa mo qelige ene enjine numaine maneo arike.” 26 Ene yale ramore wezu geu Matias wakonge. Pakiso ene ma wakonka birakau aposolo 11 enano takotkeke.

2

Asu Koboboine ketke

1 Penticost peada naso suaine mo bomileki, nei nrep Yesu malipka lukkoi, enjine magukoune ene korop sari, mat maneo waket qeturage metkoi.

² Meregeu so yewaka qeliwo njine momo togogole puangi, ukatne suaine wakon okanmai, ea wane rokop weti njine aroke ketke. Ket more sari mat metkoi, kotine yewa korop watkeke. ³ Pakiso enj kau gerep bolamine yale lawe tin tun matokki toe ari nej njerep kuteno kuteno kito more lawe arike. ⁴ Eso enj korop Asu Koboboinjo kotoeno ket nej njerep yewa qe watongi paki ma ewek ongi anjane ewekki kieke don kine kine pa arimaike, ea Asu Koboboinjo welaine welaine weteeno motki, enj yewaoka don ra edangoi.

⁵ Naso yewao Anutu menjenkakei wane Yuda nej miti dereret natne korop enj kepe banjem ea njine sari qege lewa lewan okangei wane qeturage Yerusalem matko gekoi. ⁶ Eso enj ukat suaine yewa wakongi dere more nej njerep zok maneropjo sari lewage more njane qaeke. Pakimo detpi, aposolo magu edo kepe banjem don kine kine pa arimaike, yewaoka nej weku weku enj enjene donenoka ra edan okanbi, enj detkoi. ⁷ Paki Yuda nej enj zok manerop welelepke more, dereret urata ma rakoi, “Nei njerep iwa don ramami, enj korop Galili njineka! ⁸ Daleo wane, njene koropjo det onjem, enj koropjo njenze dongoka koboboine welaine welaine, njene njedom welainjo rarainane, rokop ra njedanbi, njene welainjo detmaine? ⁹ Njene iwamo Patianine, Medianine, so Elam njine, Mesopotamianine, Yudanine, so Kapadosianine, Pontusnjine, so Asianine, ¹⁰ Prigian njine, so Pampilia njine, Ezipti njine, so Libia nat parom Sairini osino njine, natne njene Roman nejjo iwa

kulit sari gemaine. ¹¹ Nene Yuda nei, mat welaine so lobo sari sarine, Yuda nei enane tanik manik ma gemaine. So natne nene Keratanjine, so Arabianjine. Nene yalewano ge more, donzane rokopko Anutu masiine kakapa meke ea wane don kisiine ra qelajanbi detmaine!” ¹² Nei ene yale ramore onane qaeki, dere qeka okane au rakoi, “Iwa onokaka masi?”

¹³ No natne ene aposolo don masirakinerop okan one more edane rakoi, “Ene wain musele loutne neu paki qelan qe more don yaup qazan ramami.”

Petoroŋo kine ra qelanjane edange

¹⁴ Pakiso Petoroŋo wie more, kimakoune aposolo elewen(11), enjerop okora togoleka boka nei njerep magu yewa korop ra qelanjane edane rake, “Yuda nei kimakopne, so Yerusalem gemami, so nei lobo, njine korop ketjine motpi na masi iwa wakonmai ke ea wane kine ra qelanjane njidanbe detpi. ¹⁵ Njine dere ramami, nei iwa ene doku ne more qelan qemami, Yale midaka. Kepe yekuat 9 kilok sako rokop okanmai ke. ¹⁶ No masi iwa yemo propet Yoelno don mane mo qeke, ea wane wele wakonmai ke.

¹⁷ ‘Anutuno iwa yale ramai ke, gemage kepe wane naso dagoine qoe yakane okangi, na ban Asune nei njerep korop qe watjun warekale. Njine gipolekopnjine so bora-sokopnjine, ene ban nanane don propet yale ra wakonikei, no nei qaluwit kopnjine ene ban deene lotkeki kine kine kunenjne kulu kulu yale kai kei, so nei sele ene ban kulu kai kei. ¹⁸ So, naso yewao Na Asunane

zonom motpe ket more qelit ñeikopne wik-ile urata ma okanmami, ñei so ñerep, ma ewek ongi, eñe bañ propet yale don ra qelañanikei. ¹⁹ Pakimo na masi kuneñine so tanik mane qeli kebago mawe wakoni-ake, so qela kepeo masi natne oña qaqaine wakoniake. Yewao weñem, so gerep, so kopu umatne sayake. ²⁰ Eso kepe deine eñe panamaniake, so meso eñe weñe weñem qe more weñemka okaniake. Pakimo ñado Waom wane naso maep bomileake. Naso maepine eamo qelañane zok manerop kakapa suaine. ²¹ Eso naso yewao ñei ñerep eñe Waom wane eñetine ora malipka newanka gemami, eñe borikinane ñetne ñetnane kotino ñine mapik oniake, so bañ Waom oñom ebuki, koso eñine ñei okane weku mane gekei.' Yewa yemo propet don Yoelño mo ra wakonge

Petoroño Yesu Wane Kine Ra Tileke Edange

²² "Israel ñei, na don iwa ñidanbe ñine ket more detpi, Yesu Nazaret matko ñine eñe Anutuño nabok okanka more, qesiñkaki keuñino ge more, zonomine kakapa yewaño masi so tanik manik kine kine de kune ñine maki paki, Anutu wanonñine ketke, ea wane kineine ma qelañangi ñine korop kawarekoi. ²³ Eñe Anutuño mokaka detki paki, don mo ra togoleka mange, ea wane rokopko ñinane met birakaki paki, numa mangi, ñine mau paki, masi kine kine korop okanka more, borikine mama eñano birakau edo ma more kiben qabego qeu seukke. ²⁴ No Anutu ño

yemo Yesu seu seuonine ma wirikkaki wisikae wieke paki, seu seu wane wikile qotkokoine eanine mainka more makokkake, onoka wane seu seujo eje maine mi ma qorokkake. ²⁵ Ea wane Dawitjo iwa yale Yesu wane ra qelajan don rake,

‘Na Waom kakole, eje nanane kaitno naso banjem ososop okora okanmaike Eje nanane wonno okora okanmaike, ea wane kine kine maneno na maine mi mapap nangi qise more, kaet okangale. ²⁶ Ea wane na qomne menanmaike, so na belakammenjo bakom kitomaile. Na kepe nei, jo solanenjo yale waka kine kine maine ea wane tomaka more pa wie okaniake. ²⁷ Ge asu onja onane mi qikka qelinjanom nei seu seune enane kepeo payake, me ge Neinone Koboboine Wekumane eje mi qelinjanom gotosiake. ²⁸ Ge wisika gege wane numa yewa na mo sikan nangone, wane ge ban narop genom na genane kaitjono oi bakom zok manerop okanikale.’ Dawitjo yale rake.

²⁹ Kimakopne, na naboze Dawit, nenze ware ware suaine, enane kine ra wakone njidanbe. Eje mo seukki dukkakoi, denesereine nenze keuzo mere sa gemageki ukude naso iwa ukude okanmaike. ³⁰ Eje propet geke so eje Anutujo don mane iwa yale ratogole olatke yewa detke, ‘Dawit, na genane nabokopnone enano nine mane ban ma birakawe onjo genane tungo nei Waom metmet yewa ma more mesiake.’ ³¹ Dawit eje Anutujo kine kine daleo mayake, yewa mo kake, pakiso

ene Kristo wisikae wie wieinane don iwa yale rake,

‘Anutu ene parenjine mi qelinakaki, nei seu seune natne yale kepo pa more gotosiake.’

³² Pakimo Yesu ene Anutuño ma wirik kaki, wisikae wieki, nene korop wenen deze weleno kauluk kakone. Eso nene yewa wane kisi ine ramaine. ³³ Ene mo zinge wa more, Anutu wane wonino metmaike. Ene Magakño Asu Koboboine mo binjek qeke, yewa sunka mangi, Magak wane meto njine Asu Koboboine ma more, qe wat njongi, njine mo iwa kineine kamami, so detmami.

³⁴ Onoka wane, Dawit ene onjom qeliwo mi wake, ene iwa yaleka yemo rake,

‘Waomño nanane Waom olale rake, “Ge iwa nanane wazano wonno metnom, ³⁵ Met magenom na njabakopñone banj ebu ket biraonbe, geñane kietabe njonane bano gesoke togole togolenone okane waket mesikei.” ’

³⁶ “Ea wane Israel nei, nene korop iwa yale detluk warekene, njine Yesu ma more kiben qabego qeu seukke, pakimo Anutuño maki paki Waom so Kristo birakaki gemaikae.” Petoroño yalewa ra edange.

Nei Nerep Koropño Wetene Mainge More Miti Doku Taukoi

³⁷ Nei nerep ene don yewa detpi korop qomene kitopokke. Pakiso Petoro so aposolo natne ra qeson okane edane rakoi, “Kimakop, nene daleo okanjem menageake?”

³⁸ Rauso, Petoronjo edane rake, “Nine nei nɛrɛp bonep bonep wetɛnine maingeu paki, Yesu Kristo wane binɛk okane more, ɛɛane ɛnɛtko miti doku tauwi mo, Anutuɲo sotɛnine yewa qelige ɲibone more, mataliki siukwareake. Pakimo, Anutu wano ɲine bakom, Asu Koboboine ɲiboniakane binɛk qeke, ea ɲibongi maikei. ³⁹ Anutu ɛnɛ mokaka Asu Koboboine, yewa ɲiboniakane mo rake, ɲo ɲine ɲinɲine so ɲosa ɲabokopɲine, so ɲei nɛrɛp natne suaine korop ɲine abaran eri eri zok ge sarimami, ɲine korop Waomze Anutuɲo ɲidora newan ɲungi ɛɲino sariu Asu Koboboine ɲiboniakane binɛk yemo mo qe ɲibonge.”

⁴⁰ Petoro ɛnɛ yale ra more don natne loutne edane qebin mabin okanonge, paki girem don edane rake, “Nine nei nɛrɛp matali qetalien-erop ɛɛane maguo ɲine kakakone zinge sariu ɲibuyake.” ⁴¹ Pakiso, nei nɛrɛp ɛnɛ Petoro wane miti don dere detluke malipkau paki, kaiwe naso yewaoka nei nɛrɛp 3 tausen miti doku tauonbi, Yesu wane magu ɛɲano takotkekoi. ⁴² ɛnɛ sorin borin okane aposolo ɛɛane don detkoi, paki kito qesiɲ okane weteneɲo malip nagu more ruo ɲara nene weku okane gekoi. So wetene qeturage more meɲe meɲen urata ma gekoi.

Doku Tau Tau Magu Musele ɛɲane Masiene Maine

⁴³ Pakimo, Anutuɲo aposolo qesuɲongi, ɛnɛ masi kine kine loutne mau ka more oɲaene qaeki, ewe kito kito okane gekoi. ⁴⁴ Pakiso, nei nɛrɛp loutneɲo Yesu malipkakoi, paki doku tau tau magu mali malip korop gekoi, ɛnɛ

wetenero malip nagu more abon kine kineene korop owoeno pa ebongi magekoi. ⁴⁵ Ene kepeene so yeye kine kineene natne nei natne sunka ebonbi, eano wesi kiare ebongi, kine kine wane zuage geman koi, rokop ene wesi yewa damo qe ebonman koi, paki yewano nara doku qole ne okanman koi. ⁴⁶ Ene wet weku okane more kaiwe banem Bakom Urumgo lewage gekoi, so ruo nara yemo enjene mateno maneo maneo lewage mere ne gekoi, paki solaoken nara ea yemo wetene ketkele paki, batneka mapoke bororom rokopko ne gekoi. ⁴⁷ Paki naso banem ene Anutu enetine ora mawakakoi, pakiso, nei nerep korop ene enane tanik manikene kau simileonge, eso Waom ene kaiwe banem nei nerep mali malipenerop ebu takoton mageki, zaleene kirowone manerop weti weti wake.

3

Petorojo Nei Mane Kine Borikine Maki Menange

¹ Kaiwe mane Petoro so Yohane ere kepe zinge(3 kilok) rarapko, mene menen naso okangi, Bakom Urumgo wakoik. ² Pakimo nei mane kine bori worine nagaine kotino nine mo yaline wakonge, ene naso banem ma ari birakau, Bakom Urum wane madetine mane enetine “Madet Tasi-gaine,” yewa met mageke. Metki, nei nerep ene Bakom Urumgo wawa ketket okanbi, ene wesi abon manikei wane ra menen okan one met manke. ³ Nei yewa ene otki, Petoro so Yohane ere Bakom Urumgo wakesikeik wane okanbik,

eŋe kine kine natne manikeik wane qeson otkē.
⁴ Eso Petoro ŋo Yohane ere deetneŋo qoŋ qoŋ rora papapka okorakoik, pakimo, Petoroŋo olale rake, “Ge deŋone ŋere ŋotnom!” ⁵ Rakiso, ŋei eŋe kine kine mane ninikeik ra more erano deine potke. ⁶ Pakimo, Petoroŋo olale rake, “Na wesi aboŋ mi pa ninmaike, ŋo na kine kine weku ma gemaile, iwa ginikale, yemo Jesu Kristo, Nazaret ŋine, na eŋane eŋetko golatmaile, Ge wie gesoke arinom.” ⁷ Yale ra olale more, metine wongoka ma qesiŋ kaki wieke, pakiso eaka ŋei yewa wane kie metine qeluetine ea koropka koliki menage more, togoleki maine wie okorake. ⁸ Eso eŋe sontake wa more, ket kineŋo gesoke okora more lolike arike, pakiso, eŋe ererop Bakom Urum koto wenēŋ ari waket more, Anutu bakomine kito eŋetine ora mawakake, so batne basi wasine okane more gesoke det okangi menaŋgi wet pese detke. ⁹ ŋei ŋerep korop eŋe kau Anutu wane eŋetine ora mawaka bakomine kito more, eaka numa arike. ¹⁰ Pakimo, eŋe mo detkakoi, “ŋei iwa oŋoka Bakom Urum wane ‘Madet Tasigaino’ mere naso baŋem wesi aboŋ wane ra meŋen okane met mageke, oŋo mo iwa menaŋmaike.” Yale ra more oŋaene qaeki, welelepkekoi.

Petoroŋo Bakom Urumgo Miti Don Edange

¹¹ Eso ŋei yewa eŋe Petoro so Yohane erano makatake more malilip otki, ŋei ŋerep eŋe one oŋaene qaeki, korop eŋano ari Bakom Urum kotine mane eŋetne, “Solomon Wane Touŋ,” ora okanmami, yewa biririke lewaŋgoi. ¹² Yale okanbi, Petoro eŋe one more ŋei ŋerep yewa

edane rake, “Israel nei nine onoka wane iwa ka more onja nine qaemaikē, pakimo, nine ramami, nere netze zonomgo mate, nei iwa menanmaikē, nine yale ramami me? Midakaka! ¹³ Abraham wane Anutu, Isak wane so Yakop wane Anutu, ene nenane sakon qerakopze enane Anutu, onjo Qelit neiine Yesu wane kibi so zonom qelanan nei iwa wane kutno ma wakongi, nine kamami. Nine yemo nei yewa qaesikkau paki, ma more naba enane meteenō birakakoi. Pakimo, Pilat ene lolonka more birakaki ariakane raki, nine enane kaitko qik kakoi. ¹⁴ Nine Anutu wane nei Koboboine so Maine Weku, mane yewa mogare iwenjonge paki, nine ene qaisik kakoi so nadekkakoi paki, enane tungo nine Pilat boka olatpi, ene nei mane yewa, ene nei mane mo qeki seukki mulap urungo birakaki metke, yewa seseka more siwotka nibonge. ¹⁵ Pakimo, nine Nei Maine, gege togon numao iwenjonge, ene gege togon wane Netne, yewa qeu seukke. No Anutunjo yemo seu seuo nine ma wirik kaki wisikae wieke. Pakimo, nere netom deseno kakote, ea wane enane don kisi iwa ra qelananmaite. ¹⁶ Nere yemo Yesu Kristo malipka lukka more, detluk kamaite, ea wane nei iwa yemo Yesu wane zonom so enane enetno nei matko met met wawetine qoqoine, iwa zonom mangi togolemaikē. Nere Yesu Kristo malipka more, ene detluk kamaite, ea wane nei iwa ene Yesu enetine detlukkaki, enane enetinane ra more, mali malipinenjo nei nrep korop ninane denino qesinka more maki menanmaikē.

¹⁷ “Welekatne kimakop, na mo detmaile, nine so netne kopnine nine wet qelanjinane mi detluke

more, masi yewa Yesu wano okangoi. ¹⁸ No siluŋ ɲine yale okanbi mo, mokaka Anutu eɲe propet koune eɲane weteno don motki, dere ra qelaŋangoi, ea wane rokopko maki, wele wakonge. Paki Kristo eɲe baŋ wikile dere more seukke, wane ɲine don so numa yewa mo Anutu oŋom rake, rokop okanwarekoi. ¹⁹ Ea wane ɲine wetɲine maingeu paki dereret ɲine qotkoine, ea matalikei, so wetɲine maingeu, Anutuŋo baŋ koso borikine ɲine ea korop sauk wareake. ²⁰ Pakimo, yale okanbi, koso Waom wano zonom musele ɲine yewa maine ma wakone ɲiboniake, so Yesu eɲe Kristo ɲine, Anutuŋo mokaka ma wakonka biraka ɲibonge, eɲe talekaki ɲinano sariki, maine gege wane naso bomile ɲiboniake. ²¹ Iwa yemo Yesu eɲe qeliwo toma gema geki, Anutuŋo yeye kine kine musele korop ma wakon wareakane nasoine bomileake, mokaka Anutuŋo qelit ɲeikoune koboine, propet eɲane aɲaeno don motki ra qe okangoi, ea wane kop. ²² Mosenjo mo iwa yale rake, ‘Waom, ɲinane Anutuŋo na biranange, ea wane rokop ɲinɲine keu ɲino ɲine propet mane na yale ma birakaki, Anutu wane qelit ɲei okane mere more, don kine kine ra ɲidan okaniake. Yewa ɲine korop dere teweke okan warekei. ²³ ɲei mane eɲe propet yewaŋo don rayake, ea dere aɲaine mi tewekeake, yemo Anutu wane ɲei ɲerep magu Israel eɲane keuo ɲine mapokka more, eɲineka bira kayake, paki geki seukeake.’ ²⁴ So propet natne, Samuel so eɲane ɲadino propet natne wakone ge sarikoi, eɲe koropɲo Anutu wane don rakoi, so ukude

naso iwao pamaike, ea wane done yaleka mo raso qe okan warekoi, ukude iwa mo wakone pamaike. ²⁵ So nine propet gekoi, enane gipon boraso me nosa nabokopene, so Anutuño sakon qerakopnine enjerop tako rakot so ra rokop don ra mot okange, ea wane welakoune nine. Anutuño Abraham gorop tako rakot okane iwa yale olatke, 'Na genane nosa nabokopnone mosop onbe, mosop mayakatne yewano kepe banem nei njerop korop rokop onwareake.' ²⁶ Eso ea wane mo Anutu ene qelit neiine ma wie birakaki, mikip ninano sari wakonge, nibuki nine korop weku weku gege magenine borikine yewa nadek kawareu mauluk nune more, mosop nuniakane birakaki sari wakonge."

4

Petoro So Yohane Epu Lukotkoi

¹ Petoro so Yohane ere nei njerop don yeka edane okorauk, pris so Bakom Urum wane tebe nei ware wareene so Sadusi nei ene erano sarikoi. ² Ene sot osi osi okangoi, yemo onoka wane mida, Petoro so Yohane ere nei njerop miti edane more Yesu ene seu seuo nine wisikae wieke, ea wane kine, so nei seu seune ene ban ge mage korop wisikae wie warekei, ea wane kine korop ra qelanane edan warekoik, ea wane ene erane detpi borike. ³ Pakiso ene epu lukore more, dongo biraotkoi, no kepe mo qoekane mulap urumgo bira otpi pauk, kepe qaeke. ⁴ No Petoronjo miti don edangi detkoi, enano nine nei njerop loutnenjo

don yewa detluke malipka warekoi, nei n̄rep yewa en̄ane zaleene 5 tausen.

Petoro So Yohane Kaunsol En̄ane Kaiteno Don Rakoik

⁵ Kepe qaeki, Yuda nei wawaine, nei n̄etne, so don ra rokop wane kine dereret nei, en̄e Yerusalem lewan̄goi. ⁶ Pris suaine en̄etene Anas so Kaiapas, Yohane so Alekzander, so natne Pris Suaine en̄ane magu, en̄e wenen̄ korop lewan̄goi. ⁷ Paki rau, aposolo etke ere epu ari kaiteno biraotpi okorauk, so qeson ore rakoi, “N̄ire ma zonomgo kine kine yewa okanmamik? So ma en̄etko masi yewa mamamik?”

⁸ Pakiso, Petoro en̄e Asu Koboboinen̄o kotino watkeki edane rake, “Yuda nei wawaine, so nei n̄etnekopze korop rawe detpi, ⁹ N̄ere nei mane kine boriworine iwa qesin̄ka more mate menagike, ea wane n̄ine iwa n̄ere qeson n̄otmami, nei yewa en̄e daleo okane menage numa gegeine wakonike, n̄ine ea wane kine desikei wane zok pidin̄ n̄otmami. ¹⁰ Ea wane yemo rawe n̄ine so Israel magu korop detwareu, nei iwa n̄inane kait n̄ino okoramaike, yemo Yesu Kristo Nazaret matko n̄ine, en̄e n̄ido kiben̄ qabego qeu seukke, pakimo, Anutuŋo ma wirik kaki, wisikae wieke, en̄ane en̄etinane zonom̄o maki menagike. ¹¹ Yesu en̄e weku, mokaka Dawit̄o Yesu wane ra more Anutu wane papiao iwa yale qeke,

‘Mat mama nei n̄ine Yesu en̄e bosin̄ gotkoin̄e ra qikkau, eaŋo qeinge more bosin̄ togogole okange okoramaike.’

¹² Qesi qesin yemo enano weku paki kamaine, kepe banjem ea nane Anutuŋo enet kuneŋine mane mi ma wakone sikan nonmaike, onjo koso nebuyakane. Miti don yemo neiwo mi pamaike, me nei mane wane enetko lipanŋa more mena menan eamo kepeo mi pamaike.”

*Nei Don Teweke More Waom Don Qeli Qelin
Yemo Mi Pamaike*

¹³ Kaunsol ene otpi, Petoro so Yohane ere nei yauwine, ere kibi urumgo mi gekoik no kaet etne midaine don togoleka ra qelanane edanbik, ene dere more ze qokonge, so ere Yesurop mo wenen gekoi, yewa ene mo detluk otkoi. ¹⁴ So nei solaine mauk menange, numa gegeine wakonge, ene mo yewa ererop okoraki kakoi, no silun ea wane don turunine mainge etanikei wane numa zuanŋoi. ¹⁵ Zuage more, Petoro so Yohane ra otpi, ere Kaunsol urum qelige qeinat ketpik so ene enneneka don urata suaine zok auye more rakoi, ¹⁶ “Nene nei etke iwa daleo okan osikene? Ere masi kine mane memik, ea wane don kisiinenjo mo Yerusalem ariki, nei nerek koropno detwaremami, ea nene maine mi motkekene. ¹⁷ No ge mage don yewanjo sua nei nerek enano yau yaup ariakane, nene togoleka ra togole otjem ere koso nei nerek natne Yesu wane enet mane mi ra qelanane edane arikeik.”

¹⁸ Ene yale rau paki, koso etorau, ere urum koto wauk, ene Yesu wane don kisi mane mi ra qelanane edanikeik wane, so enet yewa nei nerek natne koso mi kito edanikeik wane ra togole otkoi. ¹⁹ No Petoro so Yohane eto yemo mainge

edane rakoik, “Nine n̄idom ra detpi, n̄ere n̄inane don tewekete paki, Waom wane don qeligete Waom̄o detki menageake me? ²⁰ Iwa yale wane, n̄ere kine kine mayakatne mo wakongi, deseno kakote, so ketseno det warekote, yewa ma waluke ma gege eamo mi okanikete.” ²¹ Paki, Kaunsol en̄e don togoleka etane more bira otpi arikoik, iwa yale wane, n̄ei n̄erep en̄e masi wakonge, Waom bakomine kitokoi, ea wane etkukei wane numaine zuage more qelingoi ²² N̄ei kine borikine Petoro n̄o Yohane eto mauk menange, en̄e ko-main̄e mo 40 yuange.

N̄ei N̄erep Mali Malip Korop En̄e Togolekei Wane Waom Men̄enkakoi

²³ Petoro n̄o Yohane ere zinge kimakopetne en̄ano ari more pris suaine so n̄ei n̄etne edo donba etangoi, yewa wane don kisi korop edan warekoik. ²⁴ Pakiso, en̄e detwareu qoeki, wetene qeturage more, iwa yale rau paki, Waom men̄enkakoi, “O Waom, ge qeli so kepe so kiwet so yeye kine kine ea wane kotino pamaike, korop ma wakon warekone! ²⁵ Goŋo Asu Koboboine tale kanom oŋo n̄aboze Dawit, geŋane qelit n̄ei, en̄ane wetino don motki, iwa yale rake,

‘Qelan̄ n̄ei en̄e onoka wane koto gerep zok okane gekoi, n̄ei n̄erep en̄e onoka wane wet yau yaup motkoi? ²⁶ Kepe ban̄em n̄ei waom en̄e mo abon̄ene makoi, ware ware en̄e mo wekuoka qeturangoi, Waom so Mesiaine n̄aba osikei wane.’

²⁷ Welekatne, Herot so Potius Pilat ere mo mat suaine yewao qelan̄ n̄ei so Israel n̄ei n̄erep en̄erop

qeturage more, Yesu geɲane qelit ɲei koboboine, ge Mesia bira kakone, eɲe ɲaba kakei wane lewanɲoi. ²⁸ Eɲe qeturage lewanɲoi, yemo ge mokaka geɲone zonomɲonane so wetɲonane don togonɲone ra togole motkone, wele ɲado wako-niakane, yewa korop ma wakon wareke. ²⁹ O Waom, iwa yemo ge eɲane qom sua don gere-unerop ramami, yewa dere ma papap kaikene, paki, qelit medewekopɲone ɲene qesiɲ ɲonnom togole more, don kisiɲone kaet midaine ra qe-lanɲanikene. ³⁰ Okanɲem, ge meterɲone ma wie more, zoma ɲei ɲerep ebunom menanɲei, so masi kine kine togole korop qelit ɲeiɲone koboboine, Yesu wane eɲetko ma warekene.”

³¹ Yale ra meɲenkau qoeki, matpa lewage metkoi, yewa qiseke, pakiso, Asu Koboboinenɲo ket more korop qe watone rokop ongi, Waom wane don kisi yewa kaet midaine togole more ra qelanɲane arikoi.

Doku Tau Tau Magu Eɲe Wet Weku Okane Gekoi.

³² Doku tau tau magu mali malip korop eɲe wetene so dereretene wekuku motpi paki gekoi, manenɲo kine kineine mane ea wane iwa nae bonepne yale mi ramanɲke, midakaka, eɲe yeye kine kineene bonep bonep yewa korop qetu-ranene pa ebongi, ma poke amanagu okane gekoi.

³³ Pakimo, aposolo eɲe Waom Yesu seu seu ɲine wisikae wieke, ea wane don kisiine zonom gorop ra qelanɲane ariu, enɲene don so dereretene ea manerop sua ariki paki, Waomɲo doku tau tau magu yewa eɲane zok manerop siminkaki,

qesiṇone more mauluk one mosoponge. ³⁴ Enjane keueno ṇine ṇei manenjo abon kine kineine midaine ma zuan mane mi okane geke. Nei natne kepe saierop me matenerop, ene ṇei natne sunonbi, edo ea wane lewine wesi ebon okangoi. ³⁵ Pakimo, ene wesi yewa mainge ma sari aposolo ebon okangoi, eso aposolo edo wesi yewa mage more ṇei ṇerep yeye kine kine mane wane zuangoi, yewa ma poka qesiṇone gekoi. ³⁶ Eso ṇei mane geke, enetine Yosep, aposolo ene Barnabas oramanṇkoi, ṇenze dongo, “ṇei wetze ma togole,” ene Lewi, Yuda wane magu maneo ṇine, Saiprus Siao wakonge, ³⁷ ene kepeine sisine nat ṇei mane mangi, onjo lewine wesi mangiso, wesi yewa koropka mainge ma sari aposolo ebonge.

5

Ananias So Sapira Erane Don Kisi

¹ Nei mane geke, enetine Ananias, ṇanomine enetine Sapira. Ananias ene kepeine natne ṇei mane mangimo, onjo lewine wesi mange. ² Pakimo, ene wesi natne enine ma walukki metke, yewa ṇanomine ene mo wenen detke, Ananias ene wesi natneka ma ari isi one more rake, “Na wesi mo iwa korop ma sarimaile,” yale ra more aposolo ebonge. ³ Pakimo, Petoronjo olale rake, “Ananias ge onoka wane Satanjo detkanom, wetṇone waket more ma siukki, Asu Koboboine isika more kepenonane lewine natne geṇone motkenom metmaiḱe? ⁴ Ge alakan kepe yewa ebonine, yemo geṇone similenonane, ṇo wesi mene, ea ene geṇane biṇek, paki

onoka maikenane wetke similenjone yewa mog-are maine manom rap, ŋo onoka wane dereret gotkoina yewa mene? Ge misuk raikene, na ŋeika isionmaile, midakaka, ge yewa mo Waom enjine isikene!” ⁵ Yale raki, Ananias enjere don dere, eaka ket rasu more seukke, pakiso ŋei njerep korop enjere Ananias wano masi wakonge, ea detwarekoi paki, oŋaene qaeki zok kaet onge. ⁶ Pakimo, ŋei medep edo wie sari more, parenjine yewa lap lapŋo kawetka wokonge so tewekka ma ari dukkakoi.

⁷ Naso nigatne aua karewe(3) wane rokop qoeki, ŋadino Ananias ŋanomine enjere sari saketke, enjere tanik manik pa daleo ŋaone wakonge, yewa mi detke. ⁸ Pakimo, Petoroŋo iwa yale qesonka rake, “Ge nolatnom, kepe ea wane lewine ge so ŋaonjone njere memik, mo korop rokouno iwa me, mida?”

Njerepŋo rake, “O, mo korop rokouno yewa.”

⁹ Eso Petoroŋo olale iwa yale rake, “Ge so ŋaonjone njere onoka wane Waom wane Asu liwek kaikeik wane wet qeturage don ma togolimik? Detmaine ŋei medep ea ŋaonjone ma ari dukemi, enjere mo madetko sari saket okoramami, wane mo ge koso yaleka geu ari koso enjere wenenj yewaka duk ganikei!” ¹⁰ Rakiso, eaka njerep enjere Petoro wane kino ket rasu more seukke, pakiso ŋei medep enjere mat koto wa kau, enjere mo seuke pake, eso enjere ma teweke ari more ŋaonane wazaino dukkakoi. ¹¹ Eso doku tau tau magu so ŋei njerep natne korop enjere don kisietne yewa korop dere, kaet suaine zok manerop okangoi.

Aposolo Eje Masi Kine Kine Makoi

¹² Aposolo eje masi togole kine mane kine mane nei nɛrep ɛɛane keueno makoi, pakiso doku tau tau magu mali malip korop wet qeturage more, Solomon wane Touŋ, Bakom Urum wane kotino, yewao lewage gekoi. ¹³ Lewage geu, nei nɛrep natne ɛɛane tego mi takotke gekoi, ɛɛe ewe kito kitoinerop okane mawa one gekoi, ɲo nei nɛrep yewa ɛɛe kaet okangoi, yalinane ɛɛe ɛɛerop lewa lewaŋ wane mi sariu weneŋ lewaŋ maŋkoi. ¹⁴ Pakiso, nei nɛrep zok manerop ɛɛe Waom detlukka malip kakoi, ɛɛe sari ɛɛane maguo takotkekoi. ¹⁵ Aposolo eje masi kine kine nei nɛrep keueno makoi, ea wane nei nɛrep ɛɛe zoma ɲeikopeene tewekone sari numao yaup tewino uam kine kineene lameke mauluke bi-raonbi pa arikoi, so ɛɛe wetke rakoi, Potoroŋo ɛɛane osoenoka sa ariki, so oŋa lulupineŋo qoe ket ɛɛane kuteno wa rokop ongi, so menangei ɛɛe yale rau paki okangoi. ¹⁶ So Yerusalem mat loli lolik yewao nei nɛrep gekoi, ɛɛe korop yaleka sari aposolo ɛɛano watkekoi, ɛɛe zoma nei so asu borikineŋo kotoeno ket matali ongi gekoi, yewa ebu sariu, korop solaene koso menaŋ onwareke.

Aŋeloŋo Aposolo Mulap Urumgo Njine Makokonge

¹⁷ Ɓo Pris Wawaine so ɛɛane magukoune Sadusi korop, ɛɛe onbi, aposolo edo kine kine ea korop mau, ɛɛe manerop dere worikongoi, paki mulapko bira onikei wane rakoi. ¹⁸ So ɛɛe wie more, aposolo malip one ebu ari mulap urum suaino, nei borikine ɛɛerop biraongoi. ¹⁹ Ɓo ruo

yewao yemo Waom wane anelo manenjo mulap urum wane madetine lalage more, inat ndadino ebu saket biraone more, edane rake, ²⁰ “Nine ari Bakom Urum koto wa okorau paki, nei nrep korop gege musele iwa wane don tanik manikine ebu kito edanbi.” ²¹ Aposolo ene don yewa dere more kepe qaeki ruoropka Bakom Urumgo wa more nei nrep sigi maep don ra qelanane edangoi.

Pris Wawaine enine so kimakoune, ene sari Israel suaine so Kaunsol korop edorau sariu qeturage lewangoi, paki don edane qebinonbi, mulap urumgo ari edanbi aposolo ebu enano sarikoi wane arikoi. ²² No tebe nei ene mulap urumgo ari lotke more, onbi aposolo ene mi metkoi, ene zuanonbi boriki, ene koso zinge sari more Kaunsol edane rakoi, ²³ “Nene ari mulap urumgo lotke more kanem, madet mo togoleka ki okora warike, so diam nei ene korop madetko diam okora warimi, no nene madet lalagine naso yewao nei mane urum kotino mi metpi onine!” ²⁴ Bakom Urum wane diam gege tebe nei suaine, so pris netne suaine, ene don yewa dere more, dereret urata loutne mau paki rakoi, “Iwa daleo wakonmai? Nei ea ene daleo siukmami?” ²⁵ Pakimo, nei mane onjo wa more edane rake, “Detmami! Nine nei ea mulap urumgo bira onimi, ene mo Bakom Urum kotino okora nei nrep sigi maep don ra qelanane edanmami!” ²⁶ Yale edanbiso, Bakom Urum wane diam gege, tebe nei suaine so neikoune ene ari koso aposolo ebu sarikoi, ene engu kito mi okangoi, onoka wane

eŋe ŋei ŋerep edo wesinŋ engukei wane kaetonge.

Aposolo Eŋe Kaunsol Eŋane Lewa Lewago Don Kaet Midaine Rakoi

²⁷ Tebe ŋei eŋe aposolo ebu ari biraonbi Kaunsol eŋane kaiteno okorakoi, pakiso, Pris Wawaine manenŋ edane rake, ²⁸ “Nine ŋei yewa wane enetine ŋei ŋerep eŋano mi ra qelaŋane kito edanikei wane, ŋene mo togogoleka rawetŋune more, mi ra togole ŋungone me? No ŋine yemo siluŋ don yewa Yerusalem matko ra suae motpi, sua arimaike, pakimo, ŋenane solazo qe more, ŋei yewa nedo qeŋem seukkane weneminane turuŋ so sot yewa baŋ ŋenane kutzo payake, yale ra ŋei ŋerep edanmami.”

²⁹ Rakimo, Petoŋo so aposolo natne eŋe iwa yale mainge olatkoi, “Lewine, Anutu wane don tewekkene! Nei don yewaŋo nado kitomaikae!

³⁰ Nine Yesu kibenŋ qabego rasukoi so qeu seukki, ŋenze nabokopze eŋane Anutuŋo ma wirikkaki wisikae wieke. ³¹ Wieki, Anutuŋo mawa more, eŋine metine wonino Netne so Mapi Mapik Neize birakake, oŋo Israel ŋene qesiŋ ŋongi, wetze maingenem borikineze ŋebu mayake. ³² Nene kaŋem, Waomŋo urata ea mamaikae, paki ŋene sigi maep don ea ra qelaŋanmaine, so Asu Koboboine eŋe yale waka kine kine korop ea wane ra qelaŋanmaikae, so Anutu eŋe mo eŋane don tewek okanmami, eŋe Asu Koboboine sunka ebon okanmaikae.”

Gamelielŋo Kaunsol Wetene Kito Peseke

³³ Kaunsol magu eŋe Petoroŋo don yale edangi detpi, qomene kito poke ebu ket biraongi, dere

worik suaine okane more, aposolo ebu engukei wane okangoi. ³⁴ No Kaunsol enjane keuo njine nei mane enetine Gameliel, enjane Parisi, ra rokop don wane kito ebo ebon, enjane nei njerep koropjo ewino kitou geke, onjo Kaunsol enjane keuo wie okora more ra ongi, aposolo ebuwi nigatne qeinat waketkoi. ³⁵ Ene qeinat njadino ketpiso, Gamelieljo Kaunsol natne edane rake, "Israel nei, njine nei iwa kine kine daleo okan ongei, wane rau paki, njine silun mikep detluke more kauluke okan onikei. ³⁶ Njine mo detmami, naso natne mo arike, ea wane bano qei, Teudas mane enjane wakone more rake, na nei waom enjane suaineene, yale raki, nei 400 enjane enjano takotke njadino mogare arikoi, jo gavaman enjane geu seukki, nejikoune enjane don detpi wele okangi anjane teweke gekoi, enjane korop din bun wiri ket yeo yeo ari wareu, urataene wele midaine okange. ³⁷ So ea wane njadino nei mane Yudas, Galili njine, onjo kepe ware warejo nei njerep natne ebu waran ongi, enjane don teweke njadino mogare arikoi, paki kepe ware ware esopkaikei wane kawali ma wakone gekoi. No enjane yaleka geu seukki, so nejikoune anjane teweke njadino mogare gekoi, enjane kakakone ket yeo yeo ari warekoi. ³⁸ Eso na kine yalewa, wane na ukude don iwa njidanmaile, njine nei yewa sulu kine kine mane misuk okanongei, midakaka, njine qelinonbi enjeneka geu, onoka wane dereret so urata yewa nei enjene dereretko njine sarimaikeo, yemo ban bori more siukeake. ³⁹ No Anutu onjom ea wane kine okangi paki wareki, enjane njine sarimaikeo,

yemo njine maine mi kitat onikei, pakimo njine kawali gekeimo, njine Anutu njaba kamami, yale okaniake!”

Aposolo Eje Yesu Wane Ejet Wane Gamu Makoi, Ea Wane Bakom Kitokoi

⁴⁰ Kaunsol eje Gamalieljo yale ra edangi detpi menangi, so ejane don dere, aposolo edorau sariu, jei edo kumunamjo dime ongoi. Pakiso, Yesu wane ejetine ora don kisiine jei njerep koso manerop mi ra edanikei wane togoleka rawet one more biraonbi arikoi. ⁴¹ Aposolo eje Kaunsol qelin one more qeinat mat njadino ketkoi, paki, eje Anutujo detongi, Yesu wane ejet wane ra more wikile wane gamu marat kakoi, ea wane wetene peseki, bakom kitokoi. ⁴² So kaiwe banjem Bakom Urumgo me enjene mateno eje jei njerep sigi maep don kito eda edan urata ea mane mi qelinkoi, midakaka, eje Yesu Mesia wane sigi maep don, yewajo tako rakot iwa yale ra qelajane edane gekoi. Anutu eje ra rokop donine mo rake, yewa teweke more, Yesujo birakaki, jei okangi paki, jei njerewekoune koso borikino njine mainone sa biraonge.

6

Aposolo Qesinjongi Wane Jei Sewen(7) Ma Wakonongoi

¹ Naso yewao Yesu wane dokoine doku tau tau magu zok loutne wakone sua leule okane arikoi, Yuda doku tau tau magu natne eje Grik don ra gekoi, eso Yuda natne eje Hebru doku tau tau magu enjene don ra gekoi, ea wane Grik don

ra gekoi, eɲe Hebru don ra gekoi, eɲane detpi boriki rakoi, “Nɲine naso baɲem Yuda ɲei ɲerep ɲara wane seuke ma zuaɲ okanmami, eɲe ɲara maine qesiɲon okanmami, ɲo Grik ɲenane ɲerep mala iwa ɲaokopene seu seune, eɲe yemo ɲara mi qesiɲon okanmami.” ² Eso ea wane aposolo 12, eɲe doku tau taune magukopene korop edorau sari lewageu edane rakoi, “Nene Anutu wane don miti rara yewa qelige more solaoken ɲara mato matok urata maɲem mi menageake, ³ ea wane kimakop, ɲine ɲei sewen(7) ɲinɲine keuɲino ɲine, eɲe eɲet biɲekene maine, mitirop so Asuɲo ko-toeno watke pamaike, so eɲe dereretene maine, onbi menaɲgi ma wakon onbi. Pakimo, ɲene ɲei yewa eɲe bira onɲem urata yewa naso baɲem warekei, ⁴ ɲo ɲedom yemo naso baɲem meɲe meɲen urata maikene so Waom wane miti don yewaka ɲei ɲerep ra edan okanikene.”

⁵ Don yewa rau, ɲei ɲerep korop eɲe aposolo eɲane don yewa detpi menaɲ wareke, pakiso, eɲe Stiwen ma wakonka bira kakoi, eɲe mali malipine togogole so Asu Koboboinenjo kotino waket pake, so Pilip, Prokorus, Nikanor, Timon, Parmenas so Nokolaus, eɲe Antiok matko ɲine, eɲe lobo, ɲo eɲe mo sogino sari Yuda doku tau taune eɲane maguo takotkeke. ⁶ Eɲe ɲei ea ma wakon one more, aposolo eɲane kaiteno bira onbi okorakoi, paki eɲe meteene leweteno ma wa motpi paki, meɲenka mosop ongoi.

⁷ Pakiso, Anutu wane miti donɲo ket sua nat nat rokopke arike, eso ɲei ɲerep maguine maguine, eɲe Yerusalem yewao aposolo eɲane ɲadeeno doku tau tau magu loutnenjo ari takotke warekoi,

so Yuda wane pris magu suaine natne ene miti don dere teweke malip kakoi.

Yuda Edo Stiwen Dongo Birakakoi

⁸ Stiwen ene Anutuŋo qesiŋka more, mosop zok manerop mosopkake, so zonomine manerop wat watko qe watke mange, ea wane ene nei nɛrep enane keueno masi kine kine suaine so togogole zok make. ⁹ No nei natne ene wieu paki, Stiwen gorop donŋo yakukoi, nei yewa ene Yuda enane lewa lewaŋ urum ea wane magu, enetene, “Yuda Nei Yaup gegine enane Lewa Lewaŋ Urum,” yale orakoi. Nei yewa ene Sairin matko nine, Alekzandria matko nine, Silisia kepeo nine so Asia kepeo nine. ¹⁰ No Asuŋo yemo Stiwen dereret maine so koboboine zok manerop mangane, ene don raki, nei ene donŋo qekei wane zok manerop makararapkakoi. ¹¹ Paki, ene isiu paki, nei natne sanko wetko ket okanonbi rakoi, “Nei yewa ene Mose so Anutu don gotkoine ra etoraki, nene det kakone.” ¹² Ene tanik yale okane nei nɛrep magu so nɛtne mama, so ra rokop don kito ebo ebon wane nei, wetene qe pokkoi, pakiso, ene Stiwen wano ari kitatka malipka tebaka Kaunsol enano ma arikoi. ¹³ Eso ene nei natne isi don Stiwen wane aŋao more raikoi wane bira ongoi, ene iwa yale rakoi, “Nei iwa ene naso baŋem nene detkaŋem Anutu wane Mat Kobekine iwa so ra rokop don erane don borikine ea naso baŋem qik ore more ra okanmaike, ¹⁴ nene detkaŋem, ene iwa yale rake, neiwa yewa Yesu Nazaret welaine, onŋo mat Kobekine iwa baŋ mataliki siukeake, so Mosenŋo ra rokop donba nɛbonge, yewa baŋ

wenen ma papkayake, yale rake!” ¹⁵ Pakiso, nei korop Kaunsol urum kotino metkoi, ene deene Stiwenka kalilip kakoi paki, ene kau de kaitine yewa korop anelo mane wane de kait yale qelanjane arike.

7

Stiwen Kaunsolwo Bijek Don Ra Qelanjane

¹ Pakimo Pris Netne Suainerjo Stiwen qesonka rake, “Don iwa nei ene gerjano qe more ramami, ea welekatne me?”

² Paki mo Stiwen ene donine mainge more iwa yale rake, “O, magakop tarekop, nine detpi, sogino njaboze Abraham ene Haran mi ari ari Mesopotamia kepeo metke, naso yewao Anutu qelanan gorop qeli welaine so Anutu zonomine kakapa suaine ene Abraham wano sarike, ³ Anutu ene sari more iwa yale olatke, ‘Ge kepe matjone so non tarekopjone iwa qelinone more, nonjo kepe mane sikan ganikale, yewao wie arikene.’

⁴ Yale wane Abraham ene Kaladia kepeine yewa qelige more wie ari Haran metke. Paki mo magaine seuki so njado ban Anutuno birakaki sari kepe iwa ukude gemami, iwao metke. ⁵ Anutu ene Abraham enine kepe bijek mane malipka geakane wan(1) mita, ea wane rokop nigatnemde mane mi mange. Me kepe sisikatnemde mane mi sunkake, midakaka, jo Anutu ene rake, Abraham ene njado enine kepe bijekine malipka geake, ea manikale. Pakimo njado njosa njabokoune ene yaleka wie more kepe yewa malipka gekei. Abraham ene medeune midaine geke, jo naso

yewao Anutu ene don yewa siluŋ rake. ⁶ Anutu ene don maine iwa yale rake, ‘Doko ɲosa ɲabo tegokopɲone ene ɲei tego natne enane kepeo gekei. Pakimo ɲei tego natne yewa edo geɲane doko ɲosa ɲabokopɲone, ea biraonbi ene enane qelit qeqe okane enane urata ma geke. Paki, ene koma 400, ea wane rokop, manerop matalione gekei. ⁷ No baɲ ɲado, na ɲei ɲerep tego masi yewa okanmami, ea wane na dongo biraonikale, doko ɲosa ɲabo tegokopɲone, ene enane qelit qeqe gekei, paki ene kepe yewa qelige more sa arikei, ene sari naɲano kepe iwa wane bakom kito qelitne qe gekei.’ ⁸ Paki Anutu ene Abraham doko ɲosa ɲaboine ene Waom gorop tako rakot okane gekei wane, rara togon don ra more, ene yaene solaine kitasikei wane rakoke mange. Wane ɲado Abraham ene gipole Isak wakongiso, ene kaiwe mama 8 yewao, yaine solaine kitatke. Isak ene Yakop wane magaine, ɲo Yakop ene ɲei waomkopze 12 enane magaene.

⁹ “Yakop wane gipolekoune ene Yosep wane dere worik okan more, ene ɲei natne enano biraka more urata medep yauwine yale wesi makoi, pakimo, ene Ezipt kepeo ma arikoi. No, Anutu ene wenenj enerop geke. ¹⁰ Wane oɲo mapitka more umat kine kine korop eao ɲine ma birakaki saki, wet maep so dereret wekumane mangi, ene Ezipt ɲei waom Parao wane kaitko kine kine okangi menaɲ menaɲine okan mageke. Parao, ene Ezipt wane ware ware suaine, wane Yosep mawakonka birakaki, Ezipt wane kepe ware ware ɲetne okange, pakimo, ene Parao wane matkotino kine kine korop ea wane ware ware

okange. ¹¹ Nado nara wane bodi suaine Ezipt kotino so Kanan kotino korop wakongi, nei nrep ene umat suaine zok maratkakoi, pakimo, aso nabokopze ene nara maine mi maratkakoi. ¹² No Yakop ene yale detki nara eri Ezipt metke, paki Yakop ene aso nabokopze biraongi, mikep atak weku arikoi. ¹³ Nado koso ariu atak etke okange, pakimo, Yosep ene tarekoune enine kineine ra qelanane edane rake, 'Na Yosep' Naso eao Parao ene Yosep wane tego ea ene enine tarekoune, yale detonge. ¹⁴ Wane nado Yosep ene magaine Yakopno enano sariakane don raki ariki, magaine ene enine so, nei nrewekoune 75 ea wane rokopno sarikoi. ¹⁵ Paki Yakop ene Eziptwo ket ge more ea seukke, wane gipolekoune aso nabokopze ene wenen yalewaka ene wenen yewa ket ge more seukwarekoi. ¹⁶ Pakiso parenene ea ebu tewe one zinge koso Sekem ari dukongoi, denesere yewa mo sogino Abraham ene wesino Hamor wane dokoine, Sekem matko, qole one more ebu make.

¹⁷ "Anutu ene nado enine nasoo kine kine ban mayakane sogino Abraham rara togon don olatke, ea togoleakane okangi, nasoine bomile sariki, Ezipt kepe Israel wane tego ene zok manerop wakone sua loule okangoi. ¹⁸ Pakimo, nado Ezipt wane nei Waom mane wakonge, no ene Yosep ea mi detkake. ¹⁹ Nei yewa ene nenane tego ea isione masi borikine okan one geke, ene raki dokoene nei abubuo wakonbi, qela nadino touko me doku namugo biraonbi yeine seukmankoi me engumankoi. ²⁰ Paki Mose ene naso yewao wakonge, ene medep wekumane paki

Anutu ene enane siminkake, naga magaine eto meso karewe (3) ea wane rokop wareka gekoik. ²¹ Paki ene nadino tomoko birakau, Parao wane borasinejo ma more enine medep yale bororom mauluke wareka geke. ²² Paki, Mose ene Ezipt enane papia urumgo wa more enane dereretene korop manerop detwareke, wane ene don togole zonom gorop raraino me urata mamaine, yewao nei nrep ene ka more enet binjekine ora bukeu manerop wake.

²³ Nado Mose ene komaine(40) qoeki, ene Israel ari tegokoune oniakane wetkeke, ²⁴ ene kaki, Ezipt maneno Israel mane qe matali kake, paki ene Israel yewa qesinkake, paki ene Ezipt neino Israel nei yewa komu komune zok qe matalikake, ea wane Mose ene kimaine Israel nei yewa ka more, Ezipt nei yewa qeki seukke. ²⁵ Paki, Mose iwa yale detke, 'Naso iwa nanane tego edo dere raikeli, "Anutuno Mose qesin kaki, nene qelit qege wikile uratao nine makok nonmaike." 'No Israel edo yale mi detkoi, ene yale mi dere qelanangoi. ²⁶ Ea wane nadino kaiwe maneo Israel nei etke yakuwik, Mose ene erane osoetno sari otki paki, kito pese ma momoe osiakane okane more rake, 'Ai, kimatke, nire tati non, eamo onoka wane niritne matali nagumamik me?' ²⁷ No nei mane kimaine matali kake, ene Mose kito papkaki zinge arike paki, ene rake, 'Yai, ge manjo nenane ware ware ra birangangi okoramaine? ²⁸ Ge yatne Ezipt nei mane qenom seukike, yalewa koso na nekukenane okanmaine me?' ²⁹ Ene yale raki, Mose ene don ea dere kaet okane wie arike, ene

ari mage Midian enjane kepeo lotke more yewa lobo nej okane geke. Nado enje njerep mane make, paki medewetkine nej etke wakongoik.

³⁰ “Pakimo koma 40 ari qoeki, kepe yaup papaine nej midaino anelo manenjo wakonkake, eamo Sainai Bonaga osino, eki nigatne mane wakelerop, ea wane naune kotino gerep bolamine yale laweke, ea wane kotino agelo eao metke, ³¹ Mose enje ea ka more dereret urata ma mage rake, ‘Iwa onokakanjo wakonmai,’ yale ra osinoka kaulukeakane ra arike, pakimo Waom suainerjo boka iwa yale olale rake, ³² ‘Na genjane aso njabokopjone enjane Anutu, na Abraham so Isak so Yakop enjane Anutu,’ raki, Mose enje qomine poradangi qise more kayakane kaetkake. ³³ Pakimo, Waom suainerjo olatke, ‘Kienjonane kaweune kie kulitjone, ea makokenom, kepe yewa okoramaine, ea kepe kobekine, enje nanjane kepe binjek. ³⁴ Na masi kine kine qotkoine Ezipt edo nej njerewekopne enjano mamami, na nia ea mo korop ka waremaile, na Yuda nej njerep aroene mo derile, pakimo na ukude iwa Ezipt enjane meteeno njine qesinj onikalane ketmaile, so umatene yewa ma birawe ariake, ea wane ge wienom, na biraganbe Ezipt arinom.’

³⁵ “Enje sogino Mose kito papka more olale rakoi, ‘Ge manjo njenane ware ware so wano wanok nejze ra more biraganike?’ Pakimo, nej wa yewa Mose, enjeka Anutujo anelo birakaki, enjano ket more olatke. ‘Na ge bira ganbe, Israel wane njetne okora more tegonjone zonom gorop qesinjone more qelit qeqe wikile uratao njine

makok one more ebu sakene.’ Waom eɲe aɲelo wane metino more gerep bolamino eki nigatno wakonkake ³⁶ Mose eɲe ebu ari more, masi tanik kine kine togogole Ezipt make, so Kiwet Takitne so kepe yaup papaine ɲei midaino eɲe masi korop mawareke, eɲe koma 40 yale, kepe ɲei midaino geke. ³⁷ So Mose eɲe oɲoka Israel ɲei ɲerep ra edange, ‘Ban Waomɲo kimanine ɲei mane ma birakaki, na yale propet okane mesiake.’ ³⁸ Ban Mose eɲe aso ɲabokkopze Israel ɲei ɲerep eɲerop kepe yaup papaine, ɲei midaino gekoi, ɲado koso Mose weku oɲoka, eɲe ɲabokkopze eɲerop gekoi, paki eɲe Sinai Bonagao yewa waki aɲelonjo don olatke, naso yewao aɲelonjo Mose Anutu wane ra rokop don togoninerop olatke, wane Mosenjo don yewa papiao qeke, wane ukude ɲene don yewa dapore detmaine.

³⁹ “No ɲabokkopze eɲe Mose wane don de-sikei wane bauene waki mi detkoi, midaka, eɲe ma papka more wet mali malipeneɲo koso Ezipt kepeo zinge arikei wane simile zok detkoi. ⁴⁰ Eɲe Aron olatkoi, ‘Nene mi detmaine, Mose wano mo daleo wakonike, ɲei oɲo Ezipt kepeo ɲine iwen ɲone sarike, yale wane ge ɲenane waomkopze natne ebunom, pakimo edo ɲene alakane ɲebonbi, ɲene numa arikene.’ ⁴¹ Aron eɲe aɲaene teweke naso yewao bulamaka ɲei oɲa oɲaine maki motpi okoraki, eɲe waom isisine edom meteeneɲo makoi, ea wane kino ɲara soep engu mire mau zeki, ea wane epa kebu suaine ma more bulamaka oɲainane ewine kitokoi. ⁴² Eɲe yale okanbi, Anutu eɲe ea wane ra more ɲadekongi, eɲe kepe deine so meso serekin

ea bakom kito menjenone gekoi, wane propet enjane papiano iwa yale ramaike,

‘Israel magu njine sogino koma 40 yale kepe yaup papaine nei midaino ge more, njine bulamakau so lama engu njara soep mire epa kebu suaine mama ea njine manano njine dere more makoi? Nanano njine, yem midakaka, ⁴³ njine Molek anutu isisinane seli kise ea ma tewekkoi, eamo nanane seli kisi midakaka, ea yemo nemu Rapan wane serekin onjaine ea bakom kito tewekau paki, menjenkamami, njine onja onja ea makoi so njine wet dereret njine anutu isisine enjano motpi paki, njine wetnjinejo nanane ewene mi kitokoi, ea wane na njibu biranjunbe kepe mat njinnjine ea qelige more Babilon enjane kepe mat nat paromino ari yewa gekei.’

⁴⁴ “Sogino mokaka aso njabokopze enje kepe mat nei midaino gekoi, naso yewao enje Anutu Wane Seli Kise magekoi, Seli Kise yewa mo Anutu enje donine wele ma wakonge, Seli Kise yewa makoi, naso yewao yemo anutuno maikei wane rake, rokop enje makoi, ea yemo Mosenjo onja onja mo kake, ea wane rokop makoi, Anutu enje mo Mose yalewaka mayakane olatke. ⁴⁵ Nado aso njabokopze enjane dokoene enje Seli Kise ea ma more Yosuarop sari, nei tego natne enjane kepe mat natne makoi, pakimo Waomjo aso njabokopze enjane kaitko njine esoponge. Naso yewao Anutu wane Seli Kise birau ket kepe yewao metke, mere sari mageki, ukude Dawit wane naso okanmaike. ⁴⁶ Waomjo Dawit wet

maep okankake, paki Dawitjo menjenkaki, onjo detkaki, Yakop wane dokonjosaine enjane urum mayakakatne mane maine mayakane, okange. Eje banj ea wane kotino waket Anutu menjenka gekei wane, ⁴⁷ pakiso Solomonjo enjane Bakom Urum ea banj make.

⁴⁸ “No propet manenjo iwa yale ramaike, Waom suaine wetika weti, eje jei metenjo urum maine, eao mi waket met okanmaike, ⁴⁹ Waom suainenjo iwa yale ramaike,

‘Qeli eanjo nanjane jei waom met metne okanmaike, jo kiene yemo kepe kutno more mere zonom makale, yale wane mo, njine nanjane mat dalino maikei wane okanmami? Na diawao mere zonom maikale? ⁵⁰ Ea yemo na nonjom metenenjo kine kine yewa korop ma warekole.’

⁵¹ No Stiwen eje Kaunsol korop koso edange, “Njine wawaine jei, njine ket wetnjine midaine, qelanj magu enjane rokop, naso banjem njine ketnjine wongeki, Waom wane don mi det okanmami, njine Asu Koboboinane don mi dere, ea ma papka okanmami, njine aso njabo kopnjine eje okane gekoi, gegenjine weku eaka okanmaike.

⁵² Sogine propet mane manjo geki, eje masi maine okankakoi? Ea midakaka, njinane aso njabonjine, eje Anutu wane don nanjane rara jei, propet korop wikile ebone more, natne enguwi seukkoi, ge mage koso Anutu enjine qelit jei koboboine sariakane ra wakongoi, jei yewa wenenj enguwi seukoi, pakimo, njine koso enjine Waom Koboboine wetko ket okan nagu more qeqe ea njido okangoi. ⁵³ Njine Waom wane ra rokop don,

ea agelo enjane meteo njine makoi, njo njine ea mi mogat kamami.”

Ene Stiwen Wesijo Qeu Seukke

⁵⁴ Kaunsol magu korop ene don ea detpi, qomeno qeki begiringi, ene koto so sola wenen net kitipke more, Stiwen wane koto gerep yemo manerop zok okangoi. ⁵⁵ No Stiwen ene Asu koboboineno watka okorakane, ene qeliwo pore togoleka kalilipka okora potlotke, Anutu qelanjane kake, so Yesu ene Anutu wane wazaino wonoken qeli ewe zonom so kibi maepine wenen metke, ea wenen kake. ⁵⁶ Paki Stiwen ene rake, “Nine detmami, na qeli potlotke nei Welaze, Nei Wawainane Gipole, ea Waom wane wazaino wonoken metki kamaile.”

⁵⁷ Ea wane ene togoleka boka kuroge more, ketene qewonge orodonj wie biririke ari Stiwen malip kakoi. ⁵⁸ Pakimo ene esopkau, mat suainane njadino erinat ari waketki, ene kieke more wesi lewino seukeakane birakoi, mikep ene qesat don ra olale more, takotine ea kito qoke more, nei medep qaluwit mane enetine Saul enjane kine magukkeu metke. ⁵⁹ Paki, ene wesijo Stiwen kinj qunj qekoi, Stiwen ene iwa yale menjen kake, “O Waom Suaine Yesu, ge asu onja onjane manom!” ⁶⁰ Koso pese ket wawetine qe mere more, togoleka manerop boka rake, “O Waom suaine ge enjane sot ea qelige ebonnom niget ganiake!” Stiwen ene yale ra more, so eaka seukke. Masi tanik ea mo Saul wane deino koboboineka ene Stiwen wano okangoi.

8

Saulho Doku Tau Tau Magu Nabaone More Engu Kito Okane Matalionge

¹ Stiwen geu seukke, ea wane doku tau tau magu ene Yerusalem osino metkoi, wane naso yewaoka kieke nabakopene edo zok manerop matali qetali okan ongoi, ea wane doku tau tau magu ene korop kaet ket nat nat Yuda so Samaria ari warekoi, pakimo aposolo enjeneka Yerusalem metkoi. ² Nei natne ene Waom wane masi koboine mogare gekoi, Waomho enane detki menange, ea edo Stiwen dukka more, ene aro suaine zok manerop enane arokkoi.

³ No Saul ene doku tau tau magu zok manerop yeka matali oniakane geke, ene mat koto ari waket more, nei so nerep ebu waran one sari, mulap urungo bira onmanke.

Ene Sigi Maep Samaria Yewao Ra Qelanjanganoi

⁴ Doku tau tau magu ene naba enane kaetongi, kakakone ket mat maneo maneo ari more sigi maep ra qelanjanganoi, ⁵ Pilip ene Samaria wane mat mane suaine yewao ket more, Kristo wane enetine ora more, ea wane sigi maep, ea ra qelangan onge. ⁶ Nei nerep loutne manerop ene Pilip wane don detkoi paki, ene masi tanik togogle maki kakoi, ea detka more, ene ketene enanoka more metpi edange. ⁷ Nei nerep loutne manerop ene asu qotkoine kotoeno pake, wane asu qotkoine yewa ene togoleka aroke more, qelin one saket arikoi. Paki nei loutne setene seu seune me kie meteene qotkoine, ea ene korop mo maine menan warekoi. ⁸ Ea wane nei nerep

enʒano bakom suaine zok manerop mat suaine yewa enʒano wakonge.

⁹ Nei mane mat suaine yewao metke, enetene Simon, ene sogino sunʒa gare kine kine ma okanmanke, ene yale okangi, Samaria nei nɛrep korop ene wet dereret loutne detkoi, yale okangi so Simon ene ramanke, “Na, nae nei suaine mane.” ¹⁰ Paki, nei nɛrep enetenerop, so nei nɛrep enetene midaine, ene korop Simon wane don desikei wane sorin gekoi, ene rakoi, “Nei yewa ene Anutu wane zonom gorop gemaik, ene, ‘zonomine suaine,’” ene yale ramankoi. ¹¹ Pakimo, ene enʒane don desikei wane sorin gekoi, onoka wane, naso loutne ene masi kine mane maki, ene kau masi togogole yale okangi, ene wet dereret loutne detkoi. ¹² No ban Pilipno sigi maep, Anutu wane geli ewe zonom wane don kisi maine ea so Yesu Kristo wane sigi maep, ea ra qelanane edangi, ene naso yewao malipka more nei so nɛrep doku tau warekoi. ¹³ Pakiso, Simon ene yaleka malipka more, doku tau more, Pilip korop gekoik, ene kaki masi tanik kine kine togogole Pilipno maki wakongi, ka more onʒaine qaeki, dereret urata zok manerop make.

¹⁴ Aposolo ene Yerusalemka mere detpi, Samaria ene Waom wane don mo mamami, ea dere more, ene Petoroŋo Yohane biraotpi, ere enʒano ketkoik. ¹⁵ Ere ket more, Waomno qesinongi, Asu Koboboine makei, ea wane menen kakoik. ¹⁶ Ene Yesu wane enetko doku taukoi, no Asu Koboboinenʒo enʒane kuteno mi ket kitoke, ¹⁷ ea wane ere meteetne kuteno motpik, so ene

Asu Koboboine korop makoi.

¹⁸ Simon eje otki aposolo etke, ere meteetne kuteno motpik, eje Asu Koboboine makoi, ea wane eje wesi erano ma sari more rake. ¹⁹ “Nire zonom yewa nanano wenen motpik, pakimo na yale waka metene nei mane wane kutino motpe so, eje yale waka Asu Koboboine ea, eje maine mayake”

²⁰ Yale rakimo Petoronjo olatke, “Waomnjo kine kine ea wet pesek wane nebonmaike, ea ge maine wesinjo mi qolekene, ea midakaka, ea wane wesinone ea mo genonerop sola gerepko wenen jisoki rap. ²¹ Genane wet dereretnjo ne ea Waom wane deino koboboine zok mi okanmaike, ea wane ge zonom so urata i wane kotino maine mi wakesikene, ea midakaka, ²² ea wane ge silun wetnjo ne mainge more, masi taniknjo ne qotkoine ea qelige more ndekkanom, paki, ge Waom suaine menen kanom, onjo maine wet dereret njonane bailalan so sot turunjo ne ea ma biraki ariake. ²³ Na yalewa ramaile, onoka wane na ganbe, ge naso banem Waom wane zonom iwa maikenane bailalan det mankene, ea wane umat suaine kaukmaine, so dereretnjonane zoma qotkoine eanjo borikine ma wakone more walip ganmaike.”

²⁴ Pakimo, Simonjo don iwa yale ra more main geke, “Nire silun Waom suainano nanane menenkauk, eje wet maep okane more qesijnangi, nire kine kine ea ramamik, ea nanano koso mi wakoniake.”

²⁵ Pakiso aposolo etke ere Waom Suainane sigi maep don nei njerep ra edanbik paki, Waomnjo

kine kine erano make, ea wane ra wakone edane more, so ere koso zinge Yerusalem arikoik, ere numao Samaria wane mat loutne ea sigi maep don ra edane arikoik.

Pilip Eje Etiopia Nei Enjano Sigi Maep Don Ra Edange

²⁶ Pakimo, Waom Suainane anelono Pilip iwa yale olatke, “Ge wie more, kepe nat paromino rai woken arinom, numa yewa Yerusalem yuane qei Gaza ketmaike.” Numa ea nei midaine, yaup togole pamaike. ²⁷⁻²⁸ Eso Pilip eje wie more ari numao Etiopia nei mane kake, nei ea eje kepe ware ware suaine mane, eje Etiopia ware ware njerep waom Kwin enjane wesi mat ware ware, eje labine mo kitokoi, onjo Yerusalem sari Anutu ewine kito more, koso zinge Etiopia ariakane numao horsi kare kutno mere more propet Asia wane papia, ea dapore arike. ²⁹ Pakimo Asuno Pilip olatke, “Ge horsi kare yewa wane osino ari ikop maratkanom.” ³⁰ Paki, Pilip eje biririke osino ari more detkaki, eje propet Asia wane papia dapore metke, eje yale okangi, Pilipno rake, “Ge don yewa dapore kineine maine detkamaine me mida?”

³¹ Pakimo, nei yewa eje don iwa yale mainge rake, “Na nei maneno numa mi ra wakone sikan nangi, na nonjomka ea wane kineine dalino desikale? Ge sanom narop wenen horsi kare kutno mette.” ³² Waom Wane kibi nat parom dapotke, ea yemo iwa yale wenen ramaike, “Enje don mane mi rake, enje anjaine kilipkeki, lama yale qeu seukeakane ma sarikoi, enje lama medeune zoune kitatpi mi arok

mankei, yale waka nei yewa ene anaine mi ananje ³³ Ene maket biraka more zok manerop mabaik kakoi, paki ene dongo biraka more enano don mane koboini mi rakoi, so enine tego me dokoini mane manjo nei njerewekoune enano don kisi maine okangi rap? Midakaka, ea wane ene gegeine mau siukke, paki ene kepeo gegine ea koso mi geke.”

³⁴ Nei yewa ene papia ea dapotki goeki, ene Pilip olatke, “Na qeson ganbe, propet ene manane ra more don yewa rake? Ene eninane rake, me ene nei mane wane rake?” ³⁵ Ea wane Pilip ene nei yewa don dapotke, ea wane kine ra wakone olatke, ea wane nadino yemo ene Anutu wane sigi maep ra qelanjane more, Yesu wane kine natno kito olat wareke. ³⁶ Ene numaka ari mage doku mane yewao ari lotkekoik, paki nei yewano rake, “Doku kanom pamaike, no na onokano numane lejnangi, na miti doku mi taumaile?” ³⁷ Pakimo Pilipno rake, “No ge wetjonejo korop malip kakeneo, ea yemo ge maine taugangale.” Ene don mainge rake, “Na Yesu Kristo malip kamaile, ene Waom wane medep.” ³⁸ Pakimo, ene horsi kare ware ware olatki, ma walukkaki okorake, paki Pilip so ware ware nei yewa ere dokuo ket more so Pilipno ene taukake. ³⁹ Pakimo, ere doku qelinjka more sauk, eaka ikop Waom suainane Asuno Pilip ma arike, so nei ware ware ene koso mi kake, ene bakom kito more so numaine eaka mogare arike. ⁴⁰ No Pilip ene Asdot matko lotke more, mat suaine loutne yewa ari korop Yesu wane sigi maep don ra qelanjane ari mage njado

banj Sisaria matko ari lotkeke.

9

Saul Eje Wetine Maingeke

¹ Naso yewao Saul eje Waom suainane dokoine engu mataliongi, seukei wane don togogole rake, ea wane eje Mosop Nei Nete Suaine enano ari, ² olale rake, “Ge kibi mane Yuda magu Damaskus matko gemami, enane ge ninnom, ge iwa yale qekene, ‘Nene Saul iwa bira kanem njinano umaiké, eje nei so njerep magu Yesu mogat kamami, ea zianje ebu ma waranone, Yerusalem sari mulap urungo biraoniake, ea wane birakamaine.’ ”

³ Eso Saul eje Yerusalem mat qelige more, moea Damaskus arike, eje ari Damaskus osino lotkeki, ikop eaka qelanan mane qeliwo njine yewaka enano ket more qelanan kake. Qelanan yewa mo zok manerop togogole. ⁴ Paki Saul eje mo eaka kepo ket rasu pa more, detki nei maneno don mane iwa yale olale rake, “Saul, Saul, ge onoka wane na neku matali qetali okan nanmaine me?”

⁵ Saul eje rake, “Waom, ge manjo?”

Pakimo eje rake, “Na Yesu, ge na zok manerop matali qetali okan nanmaine. ⁶ No ge silun wie more, Damaskus mat suaino waketnom, pakimo banj njado nei maneno ge kine kine mane onokaka makene, ea eje golasiake.”

⁷ No nei natne eje Saulrop wenen arikoi, eje doneene midaki, zonomene ketki okorakoi, so eje don rake, ea detkoi, no eje nei enine mane mi kakoi, ⁸ Saul eje wie deine pore kaki, deine

zok mupke panamange, ea wane eɛe qesiŋka more, metino malipka ma ari Damaskus matko waketkoi. ⁹ Eɛe kaiwe karewe yale deine yeka mupke metki, eɛe ɲara doku mi neke yaupka pake.

¹⁰ Yesu wane qelit ɲei mane eɛe Damaskus matko geke, ɲei ea eɲetine Ananias, eɛe kulu kulu mane kaki, Waomɲo Ananias orake, paki eɛe olale rake, “Ananias!”

Ananias eɛe dere more mainge rake, “Waom, na iwa metmaile.”

¹¹ Waom eɛe Ananias olale rake, “Ge wie, numa eɲetine, ‘Numa Koboine,’ yewaka ari Yudas wane matko wa more, ɲei mane eɲetine, Saul, eɛe Tarsus matko ɲine, eɛe ka more, eɲine eɲetinane gesonnom, so eɛe yewa meɲenka metmai ke, ea marat kam paki, eɲine kanom, ¹² Saul eɛe so-lainane deine ea mo welekatne mupkeke, ɲo eɛe kulu kulu mane iwa yale kake, eɛe kaki ɲei mane eɲetine, Ananias, eɛe sari sak et metine mawa eɲane kutno motke, paki eɛe deine ea koso mo maine menaŋkake.”

¹³ Ananias eɛe Waom wane don dere mainge rake, “Waom, ɲei ɲerep loutne eɛe ɲei ea wane donkisi nolat koi, eɛe Yerusalem mat kotino geɲane ɲei ɲerep magu masi kine kine qotkoine okan one more zok manerop matalionge, so koso, ¹⁴ Mosop ɲei Suaine eɲano ɲine rako rakok kibi maki, ɲei ea iwa Damaskus birakake, eɛe ɲei ɲerep iwa geɲane eɲet gora magemami, ɲei yewa oɲo geɲone magu ea ebu ari mulap urum togole bira oniakane sarimaike.”

¹⁵ Pakiso Suainero iwa yale olatke, “Ge arinom, na nei ea nanane qelit qeqe uratane mayakane mo birakakole, ono Israel kotino nei nrep, so nei nrep Israel nadino qelan gemami, so kepe ware ware suaine, enane kaiteno nanane enetne ra qelanoniake, ea wane ge arinom, ¹⁶ ene nanane ra more wikile desiake, na nonom wikile kine kine mo ea sikan kaikale.”

¹⁷ Waomjo yale raki, Ananias ene ari more mat ea wane kotino waket more, metine mawa Saul wane kutno more rake, “Saul kimane, ge iwa sari dumao Yesu kene, Waomze Yesu onomka na genano bira nanmai, ea wane Yesu ene denone ma menange more, Asu Koboboine qe watke more rokop ganiake.” ¹⁸ Ananias ene don olatki goekiso, ikop yewaka kine kine natne, zawon lesoine yaleno Saul wane deino nine qe qake ketpi, deine menange, so ene wie okoraki mo Ananiasjo doku taukake. ¹⁹ Saul ene nara neki nado zonomine koso motke.

Saul Ene Damaskus Matko Don Maine Ra Qelange

Saul ene malip malip nei nrep enerop Damaskus matko kaiwe kareweka geke, ²⁰ so ene Yuda lewa lewan urumgo koboine ari more, Yesu ene Anutu wane gipole ea ra qelange.

²¹ Nei nrep korop ene Saul wane don ea dere more, onane qaeki, auye rakoi, “Nei yewano nei nrep loutne ene Yesu wane enet ora bukeu wake, yemo korop mo Yerusalem mat kotino nine enguki seuke siukwarekoi, wane ene koso nei nrep ea yaline ene ebu more Mosop Nei Suaine, enano

bira oniakane matzo iwa sarike.” ²² No Saul wane don rarainenjo yemo zok manerop zonominerop, ea Yuda enjane Damaskus matko ra qelanange, so Yesu enjane Kristo enjane kepe nej magu borikino njene makok njoniakane, Magakno birakaki ketke, enjane Saul wane don ea dere more Yuda nej Damaskus gekoi, onjane qaeke qiseu paki, don natne ra maket birakakei wane mi okangoi. ²³ Kaiwe loutne goekiso, Yuda edo lewage more Saul qeu seukeakane don numaine ra ma togolekoi, ²⁴ no nej manenjo Saul don dereret ea mo olatke, paki Yuda nej enjane mat suainane madet banjem ea mo korop warekoi, ea mo ruoo so kaiweo Saul qeu seukeakane ra more yale okangoi. ²⁵ No ruo mane Saul wane dokoine, enjane Saul ma more mat wane wesi sen anjane mau lotkeki iwenka ari rosa suaine kotino birakau waket metki, so dokoine enjane rosa mulapno bororom bororom mau qoron qoron ket kepo kitoki, Saul enjane saket arike.

Saul Enjane Yerusalem Geke

²⁶ Saul enjane Damaskus qelige more, Yesu wane dokoine marat oniakane Yerusalem arike, enjane Yesu dokoine enjane wenen lewangoi wane ra arike, no Yesu wane dokoine enjane Saul mo Yesu wano takotkike, ea wane donkisi yewa dere mi malip kakoi, yemo enjane koropno manerop zok kaetonge. ²⁷ Pakiso, Barnabasno Saul qesinka more, aposolo enjane iwenka ari edange, “Waomzenjo Saul Damaskus matko numao maratka more olatke, Saul enjane Yesu wane enjetko Damaskus kaet midaine ra qelanange.” ²⁸ Yale raki, so Saul enjane

aposolo enjeron wenen geke, ene Yerusalem mat korop ari sari ge more, Waomzane enet kaet midaine ra qelanange, ²⁹ ea wane Yuda nei natne ene Grik don rakoi ea Yerusalem gekoi, Saul ene nei ea don ra kitat okane aukoi, no nei eno Saul qekei wane ra numa dale maratka more qenjem seukeake ra okangoi. ³⁰ Pakimo, doku tau tau magu ene don kisi ea dere more, Saul Sisaria matko iwenka ari more birakau, Tarsus matko arike.

³¹ Saul ene ariki, so doku tau tau magu korop Yuda kepeo, Galili kepeo so Samaria kepeo ene nei maneno mi borikine kine kine mane okanongi, ene korop peamine gekoi, Asu Koboineno doku tau tau magu qesijongi togolekoi, maguo nei njerep zaleene suakiso nei njerep korop ene Waomze ewino kito gekoi.

Petoroŋo Lida So Yopa Matko Arike

³² Petoroŋo mat banjem mat banjem ari sari okange, so Anutu wane nei njerep natne Lida matko gekoi, atak mane Petoroŋo nei njerep ea enano ari geke. ³³ Naso yewao ea ge more, nei mane enetine, Ainias maratcake, Ainias wane kie metine yemo zok seu seune pake, ea wane Ainias ene koma eit(8) yaline kulu papainoka naso banjem pageke. ³⁴ Petoroŋo Ainias olatke, “Ainias, Yesu Kristono ma menan ganmaike, ge wie kulu papanone maulukenom!” Raki, ikopka Ainias ene anaine teweke, yewa kamde eweke more wieke. ³⁵ Lida matko njine nei njerep korop so Saron kepe mat digin togogole nei njerep yewa gekoi, ene Ainias kau, mo menage wekumane

okange, yale ka more, eje wet maingeu paki, zinge Waomze mogat kakoi. ³⁶ Naso yewao, mali malip n̄erep mane, enetine Tabita Hebru dongo, Yopa matko geke, enane enetine mane Grik dongo ea mo Dorkas, enet ea wane kineine, yemo nonin zuba, n̄erep ea Yesu mogat ka more naso ban̄em naso ban̄em masi weku mane ma more, nei n̄erep abonene midaine qesinonge, ³⁷ naso yewao Petoro en̄e Lida wane matko geke, naso maneo yemo Tabita zoma suaine zok manerop kaki pa eaka seukke. Seuki so kimakoune en̄e paren̄ine ea saukka more, mat an̄aone mane kutno weti yewao birakau pake. ³⁸ Yopa ea mat aman̄ mida, bamgo Lida osino metke, ea wane doku tau tau nei n̄erep Yopa gekoi, en̄e Petoro wane don kisi dere more don more more nei etke Yopa biraotpi, Petoro wano ari olatkoik, so en̄e rakoi, “Ge silun̄ mi mesikene, ge ikop nenano sarinom, n̄erep mane en̄e mo seukeakane okanmai, ge silun̄ ikop mide biririke sarinom!” ³⁹ Petoro en̄e abonene mauluke more, ererop wenen̄ ari Yopa matko lotkeke, pakiso en̄e Petoro iwenka ari mat kutno weti an̄aine mane yewao wakoi. N̄erep mala loutne en̄e urum eao watke rokopkekoi, Dorkas en̄e wisika geke, naso ea en̄e takot suaine so nigatne loutne ma more, nei n̄erep abonene midaine ebonge, n̄erep mala yewa en̄e takot ea Petoro sikanka more arokkoi. ⁴⁰ Potoron̄o n̄erep korop urumgo n̄ine raongi ket wareu en̄e wa wetine qe mejenka more zinge paren̄ olatke, “Tabita wienom!” Yale raki so deine pore Petoro kaki paki mo eaka wie more metke. ⁴¹ Potoron̄o metino ma qesinkaki wie okorake,

pakiso, eñe doku tau tau ñei ñerep so ñerep mala edora more, Tabita mo wisikae wie more, koso gege maratkamaike, ea edane sikanongi pakiso, birakaki metke. ⁴² Don kisi yewa Yopa mat Petoroño make, ea wane korop lolike watke rokopkeke, ea wane ñei ñerep loutne eñe Waom detlukka malipka more mogat kakoi. ⁴³ Pakiso, kaiwe loutne Petoro eñe Yopa matko geke, so ñei mane, eñe bulamakau so osom solaine natne ma urata natne eaño mamanke, ñei yewa wane eñetine Saimon, eñe ñei ea eñerop eñane matko geke.

10

Petoro Eñe Kornilius Wane Matko Arike

¹ Ñei mane Sisaria matko geke, eñetine Kornilius, eñe Roma kawali ñei magu(100) eñane ñetne. Kawali ñei magu ea eñane eñetene “Italian wane kawali ñei magu.” ² Kornilius eñe Anutuño onokaka wane simin kamaike, ea malipka more ewine kitoke, eñine so dokoine korop eñe Anutu wane bango tamge more, eñetine ma bukeu wake, so eñe Yuda ñei aboñene midaine qesiñ onmanke, ño meñe meñen yemo Anutu wano meñenka mageke. ³ Rarap maneo 3 kilok, kepe qoe qoe naso, eao eñe kulu kuluo yale kine kine mane kake, eñe Anutu wane añeloño tingo kaki, añeloño eñe sari mat koto saketa olale iwa yale rake, “Kornilius!”

⁴ Pakimo, Kornilius eñe eñano pore kalilipka more, kaetkaki siluñ rake, “Waomne daleo?”

Anjelo eɲe donine mainge rake, “Anutuɲo geɲane masi weku mane ɲei ɲerep wesi aboɲene midaine geu, ge qesiɲ onmaine so kine kine wane qekau, ge mapik onmaine, ea mo Waomɲo ka more meɲen meɲenɲone dere more, siminkaki qesiɲ ganiake. ⁵ Ge nasomde iwaka ɲei mane bira onnom ari, ɲei mane eɲetine Saimon, ɲo maneine Petoro, eɲe Yopa gemaikɛ, iwa iwenka sarikɛi wane bira onikene. ⁶ Petoro eɲe Saimon osom solainɲo kine kine mama eɲane matko kulit gemaikɛ, Saimon eɲe matine yemo kiwet mezeno gemaikɛ.” ⁷ Anjelo, eɲe yale ra more Kornilius don olatki qoeki arikɛ, pakimo Kornilius eɲe ɲei etke etoraki sarikoik, ɲei mane eɲe Anutu ewine kito more Kornilius wane matino geke, eɲe Kornilius maulukka magekɛ. Kornilius eɲe ɲei ea so kawali ɲei mane so qelit qeqe ɲei etke edoraki sarikoi. ⁸ Sariu so Kornilius eɲe kine kine wakonge ea wane done edane more mauluke, so Yopa biraongi arikoi.

Petoroɲo Kine Kine Kulu Kuluo Yale Kake

⁹ Korniliusɲo ɲei biraonge, eɲe ari mage numao pakoi, kepe qaeki, ɲei etke so etke ea eɲe Yopa osino ariuso, kepe deine mo oɲa bango okangi, mo Yopa matko lotkekoi, pakiso naso yewao Petoro eɲe tiri woka mat bakino kutno meɲen kayakane wake. ¹⁰ Yewa meɲenka more ɲara wane seuke more, qelit qeqe ɲei mane ɲara maulukeakane olatkɛ. Qelit ɲei eɲe ari ɲara maulukki, so Petoro eɲe kulu kulu yale kine kine mane de kunɛɲine kake. ¹¹ Petoro eɲe kaki qeli aɲaɲgi, kine kine mane ketkɛ, ea yemo lap lap kakapa

suaine mane yale wakonge, eamo wazaine etke so etke pise pisiine ea yale waka metki, laplap ea bira qesunjkaki, kepeo qeredege ket sarike. ¹² Osom kine mane kine mane, koma, logum, parewa, nanji zubaine, ea ene korop laplap ea wane kotino watke pakoi. ¹³ Nei manenjo Petoro olatke, “Petoro, ge wie qe nenom!”

¹⁴ Pakimo, Petorojo mainge rake, “Waomne, na maine mi okanikale, Mose ene osom kine kine iwa pamami, ea korop qotkoine, Yuda tegono mi nenine rake, sogino na osom yaline mane mi nekole.”

¹⁵ Nei eano Petoro koso olatke, “Anutuno kine kine ra sauk okangi libeka okange, ge maine misuk raikene, ‘mi nenine’ . ¹⁶ Laplap ea atak karewe ket wakongiso, koso ikopka qeliwo mainge more warangi kerewake.”

¹⁷ Waki, so Petoro ene dereret urata so dere geka okane more rake, kulu kulu iwa kele, ea wane kine yemo daleo? Ene dereret urata yale ma metkiso, nei magu natne Korniliusjo biraonge, ene lotkekoi, ene sari lotke more, ra qeson okane rakoi, Simon wane mat, eamo di-awao metmaiike? Ene yale ra qesone ari mageso, madetko lotke more yewa okorakoi. ¹⁸ So ene qesone more iwa yale rakoi, “Nei mane enetine Simon Petoro ene iwa kulit gemaikae, nei ea ene iwa metmaiike me mida?”

¹⁹ No Petorojo yemo ene kulu kulu kake ea wane kine desiakane zianjka mat kutno weti metke, naso yewao Asu Koboboine ene Petoro olatke, “Detnom, nei karewe ene qelawa sari ge zianj ganmami. ²⁰ Yale wane ge wie ketnom, na

nei ea biraonbe sarimami, ea wane ge abonone mauluke more ikop ket enjerop arinom, ge dereret urata koso misuk maikene, nei yewa nonjom biraonbe sarimami.” ²¹ Rakiso, Petoro ene nei ea enano ket nei ea edange, “Nei iwa nine na zian nanmami, yemo na iwa, no nine onoka wane sarimami?”

²² Yale rakiso, nei ea ene mainge olatkoi, “Kawali nei magu(100) enane netne, enetine Kornilius, ono bira nongi sarimaine, ono nei wele, ene Anutu enetine ora mawa kamaike, so Yuda nei nrep Kornilius ewine kito okanmami. Anutu wane anelo mane ono Kornilius olatke, ene gono don mane daleo ra gelanane olatnom desiakane newan ganmaike.” ²³ Petoro ene don ea dere more, nei ea ene mat yewao ruoo kulu paikai wane newanonge.

Kepe qaeki, Petoro ene abon mauluke more, enjerop arike, doku tau tau nei nrep natne, Yopa nine ene enjerop wenen arikoi. ²⁴ Petoro so nei magu ea ene ari mage numao pakoi, qaekiso kaiwe maneo Petoro ene Sisaria matko lotkeke, Kornilius ene wenem sotakkoune so kimakoune natne newan ongi, sari matino Petoro toma kakoi. ²⁵ Petoro ene matko wayakane okoraki, Korniliusno maratka more Petoro wane kino kepeo ket rasu more, umi ket kaitne kepeo uakake. ²⁶ No, Petoro ene maki wieki olatke, “Wienom! Na kepe neika.” ²⁷ Petoro ene Kornilius don olatki, ari mat koto wakoik, nei nrep loutne lewage more erane toma metkoi. ²⁸ Petoro ene yale edange, “Nidom detlukmami, Yuda ra rokop don togono iwa yale ramaike, Yuda nei mane ene Yuda tego

ɲadino, qelan ɲei, eɲerop maine kulit mi geake, so Yuda mane eɲe tego ea eɲane osoeno mi ariake, ɲo na yemo Anutu oɲom mo sikan nanike, Anutu wane deino me kaitko, na mi raikale, Anutu wane zonom me deinane qelananno ɲei mane wane sot turuɲ me panaman mane mi mataliki siukeake, ea midakaka. ²⁹ Ea wane na ɲinane don dere mi qile, na ɲinane don boka woka ea dere iwa sarile, ea wane na qeson ɲunmaile, ɲine onokaka wane rau na sarile? Eaka rau na detpe.”

³⁰ Pakimo, Kornilius eɲe mainge iwa yale rake, “Kaiwe karewe bano, naso yewao, 3 kilok na matne koto mere meɲen kakole, ikopka ɲei mane laplap qelaninerop eɲe naɲane kaitno okora more, ³¹ nolatke, ‘Kornilius! Anutuɲo geɲane meɲe meɲen dere more geɲane masi weku mane kake, ³² ea wane ge ɲei mane Yopa bira kanom, eɲe ari Saimon Petoro maratka more, iwa sariakane olatkep, Petoro eɲe Saimon, osom solaine mama eɲerop metmaike, eɲe matine kiwet osino kulit gemaik’e’ . ³³ Yale raki, so na ikopka ɲei natne biraonbe sariu mo, ge masi weku mane okane more sarimaine. Naso iwao, ɲene korop Anutu wane kaitko mere geɲane don desikenane tomamaine. Anutuɲo ge kine kine ginge, ge ea korop ra qelanannom desikene.”

Petoro Eɲe Kornilius Wane Magu Ra Qelanonge

³⁴ Kornilius eɲe yale rakiso, Petoro eɲe kiekake rake, “Na iwa mo detlukmaile, Anutuɲo ɲei ɲerep korop eɲano masi tego wekuka raki paki detongi, magu weku okanmami. ³⁵ ɲei ɲerep kepe banjem

maguine maguine, eɲe Anutu ewine kitokeiwo, so koboine ge okanikeiwo, Anutuɲo ɲei ɲerep ea eɲane simin kaki qesinɲ oniake. ³⁶ ɲine don iwa yale eamo detmami, Anutuɲo Israel tego ɲebonge, eɲe sigi maep don iwa yale ra qelaɲange, Yesu Kristo eɲe kepe baɲem ɲinane Suaine, oɲo ɲebuki, ɲene Anuturop wet weku okangone, ɲine ea korop detlukmami. ³⁷ ɲine ɲidom kine kine korop wakonge, eamo detka waremami, eamo Israel kepeo Yohanenɲo ɲei ɲerep doku tauonge, sigi maep ra qelaɲange, ea wane ɲadino mo korop wakon wareke, Yesuɲo urata eamo Galili kepeo kieke more, maki takotke kepe baɲem rokopke ari wareke, ɲine eamo korop detlukmami. ³⁸ Anutuɲo Yesu, Nasaret ɲine Asu Koboboine zonominerop qe watke rokopkake, Yesu eɲe kepe baɲem lolike korop masi weku mane ma more, ɲei ɲerep Satan wane asu qotkoinerop ma menaɲ onge. Anutuɲo Yesurop geke, ea wane, eɲe kine kine maki, ea wakonge, ɲine ea korop detlukmami. ³⁹ Yesu eɲe kine kine Israel eɲane kepeo so Yerusalem kotine make, ɲene ea korop kakone, pakiso eɲe Yesu kibego geu seukke. ⁴⁰ ɲo, kaiwe mama karewe kutno Anutuɲo eɲe ma wisikaekaki, wie more ɲei ɲerep eɲano wakonge. ⁴¹ ɲei ɲerep korop eɲe mi kakoi, Yesu eɲe seuseuo ɲine koso wisikae wieke, Anutuɲo ɲene bira ɲongi, ɲene koso Yesurop wenenɲ doku so ɲara nekone. ⁴² So Yesu eɲe ɲene urata don ɲebone more ɲedange, ɲene ɲei ɲerep eɲano miti don iwa yale ra qelaɲanikenane ra ɲedange, Anutuɲo Yesu eɲe ɲei ɲerep wisikaune so seuse-

une kineene ma wanokoniakane birakake, ñene don ea ñei ñerep edangene. ⁴³ Anutu wane qelit ñei propet eñe korop Yesu wane don ra qelanangoi, paki, eñe iwa yale rakoi, ñei mane eñe Yesu wane don dere mogat kayakeo, eñe Anutuño ñei ea wane sot turuñine ea korop Yesu wane eñet malipka maikane, qelinika maniake.”

Ñei Ñerep Qelan, Israel Nadingo, Asu Koboboine Ebonge

⁴⁴ Peto eñe sigi maep don ra okoraki, eaka Asu Koboboineño ñei ñerep korop Anutu wane don dere metkoi, eñane kuteeno ketke. ⁴⁵⁻⁴⁶ Yuda tegoo ñine doku tau taune Petororop weneñ sarikoi, yewa eñe detpi don kuneñine kine mane kine maneoka, Anutu bakom kito eñetine ore ma wiekoi, paki eñe dereretene qeyauki qise more, iwa yale rakoi, “Kau, Anutu eñe qelan ñei ñerep Asuine Koboboine ebone more, mainongi eñane biñek mo okanmami.” Pakimo, Petoroño iwa yale rake, ⁴⁷ “Ñei ñerep tego iwa Asu Koboboine mo mamami, eñe mo ñenze rokop okanmami, ea wane mo koso maño mane doku taukei wane rawetoniake?” ⁴⁸ So Peto eñe koso ñei ñerep yewa eñe edange, “Ñine ukude mo iwa Yesu Kristo wane eñetko doku taukei!” Eñe doku tauwi qoekiso, eñe koso eñerop kaiwe mama natne weneñ gekei wane ra olatkoi.

11

Peto eñe Kornilius Wane Donkisi Mali Malip Magu Yerusalem Edange

¹ Petoro eɛe qelan ɛei ɛerep Yuda ɛadino Anutu wane don edange, aposolo natne so mali malip magu Yuda kepe korop Anutu wane don kisi ea detkakoi. ² Naso yewao mali malip magu keueno ɛine ɛei natne edo iwa yale rakoi, “ɛei qelan natne Yuda ɛadino eɛe Yesu mogat kakei wane, yaene solaine kitasikei.” Pakimo, Petoro eɛe Yopa ɛine zinge Yerusalem ari lotkeki paki, Yuda ɛei edo Petoro ra wetkakoi, ³ Eɛe iwa yale rakoi, “ɛei ea eɛe yaene solaine mi kitatkoi, ge eɛane matko arikone, ari ɛei yewa eɛe yaene solaene mi kitatkoi, ge eɛerop mere ɛara nekone!”. ⁴ Yale rau so Petoro eɛe kine kine wakonge, ea korop ra qelanane edange.

⁵ “Kaiwe mane na Yapa matko meɛenka more kulu kulu mane kakole, laplap suaine wakonge, kine kine natne eɛe laplap ea nat parom etke so etke piseke so yale waka laplap qeliwo ɛine qere-dege ket more, nanane osono lotkeke, ⁶ na mat osomine, osom zubaine, koma, logum, parewa so nanɛi zubaine laplap kotino ongole. ⁷ Pakiso, ɛei manenjo nolatke, ‘Petoro, ge wie more engu nenom!’ ⁸ ɛo, na mainge rakole, ‘Waom, na mi okanikale midakaka! Mose eɛe osom kine kine mi nenine rake, sogino na osom ea mi nekole’ . ⁹ ɛei ea qeliwo ɛinenjo koso nolatke, ‘Anutunjo kine kine ea mo raki libeka okange, ge maine misuk raikene, ‘mi nenine.’ ¹⁰ Atak karewe laplap ket wakongi kawee, so koso qeliwo wake. ¹¹ Naso yewao Kornilius wane ɛei karewe Sisaria ɛine Simon wane matko lotkekoi. ¹² Asu Koboboinenjo nanano wakonnane rake, ‘Ge eɛerop ikop ari-

nom.’ Nei 6 nenze mali malip magu, Yopa njine ene narop wenenj Siraria arikoi, paki njene koropno Kornilius matko wa ketkone. ¹³ Ene enjine donkisi nedange, ene anelo maneno matine koto wakonkaki paki olatke, ‘Ge nej mane Yopa birakanom, ene ari Saimon Petoro maratka more, iwa iwenka sariake. ¹⁴ Petoroŋo don welerop njidaniake, ea wane Anutuŋo ge so dokonone ban korop ma menan njuniake’ ¹⁵ Pakiso, na ene don kieke edanbe, so Asu Koboboineŋo enane kuteno ketke, Asuŋo sogino njenane kutzo ketke, masi yaleka okane ketke. ¹⁶ Ketki, so na don mane detsorokkole, Waomzeno rake, ‘Yohane ene nej njerep doku tauonge, ŋo, nono njine Asu Koboboine njibonikale.’ ¹⁷ Sogino njene Waomze Yesu Kristo mogatkanem so Anutuŋo njene Asu Koboboine njebonge, naso iwa na kaulukmaile, yalewaka, Anutuŋo qelan nej njerep Yuda njadino, Asu Koboboine ebonge, na Anutu maine mi rawetkakole!”

¹⁸ Petoro ene raki qoeki, mali malip magu ene dere more, Petoro mi rawetka more, Anutu wane enetine mau waki rakoi, “Anutuŋo rake, ‘Nei njerep qelan, Yuda njadino, ene sotene njadek kaikeiwo, na ene ebuwe gege togongo wake-sikei.’ ”

Mali Malip Magu Ene Antiok Matko Gekoi

¹⁹ Naso sogino Kaunsol ene Stiwen qeu seukki, so mali malip nej njerep wikile suaine detkoi, ea wane kakak nagu arikoi, ene Yerusalem njine Ponisia kepe, Saiprus sia so Antiok matko arikoi. Ene Yuda nej njerep enanoka don kisi maine ra

qelanane edangoi. ²⁰ No mali malip nei natne, Saiprus sia so Sairin matko njine ene qelan nej nrep, Yuda nadino gekoi, enano yaleka ra qelanane edangoi, ene Waomze Yesu wane don kisi maine Antiok matko ra qelanane edangoi.

²¹ Waomzenjo nei ea zonom ebonge, ea wane nei nrep loutne ene Waom malipka more, Waom wano wetene maingekoi.

²² Mali malip magu Yerusalem kotino gekoi, ene donkisi ea dere more Barnabas, Antiok matko birakau arike. ²³ Barnabas ene Antiok ari lotke more, so Anutujo dalino nei nrep mosop onge, ene ea ka more bakomine kitoke. Ene nei nrep qebinone rake, “Njine Waomze wetjinejo naso banem malip kaikei.” ²⁴ Barnabas ene nei wele, mali malip so Asu Koboboinejo enano watke rokop kake, ea wane nei nrep loutne ene Waom mogat kakoi.

²⁵ Urata ea goeki so Barnabas ene Tarsus matko ari Saul ziankake. ²⁶ Barnabas ene maratka more, Saul iwenkaki ere Antiok arikoik. Koma weku Saul so Barnabas mali malip magu enerop lewanjo, ere nei nrep magu suaine kito ebonjoik. Antiok mat welaine ene malip malip magu enane masi ka more, enetene “Kristen” edorakoi. Enet iwa sogino mi wakonge.

²⁷ Naso yewao propet nei natne ene Yerusalem njine Antiok arikoik. ²⁸ Nei mane, enetine Agabus, ene mali malip magu keueno wie okora more, Asu Koboboine enane zonominejo olatki rake, “Njara wane bodi suaine kepe banem kepe banem wakoniake”. Naso Klaudius, Roma kepe ware ware geke, naso ea njara wane bodi wakonge.

²⁹ Mali malip magu, enje lewage rau togoleke, “Nene bonep bonep wesi abonje wane kop qeturage more, mali malip kimaze Yuda kepeo birakakene.” ³⁰ Yale ra more wesi abon qeturage more, Barnabas so Saul eponbi, so Barnabas so Saul ere Yerusalem ma ari more, mali malip magu nei suaine ebongoik.

12

Herotño Yakop Qeki Seukiso Petoro Mulap Urumgo Birakake

¹ Naso yewao kepe ware ware Herot enje mali malip magu wikile kieke ebonge. ² Enje kawali nei koune edangi enje Yakop, Yohane wane tatine pilanño qeu seukke. ³ Herot enje masi ea maki, so Yuda nei nrep enje kau siminonge, ea wane enje kawali nei koune biraongi, so enje Petoro mulap urumgo birakakoi, Yuda enjane zonom ma met met nasoo so mere bret sap saune ne okangoi, naso yewao. ⁴ Enje Petoro malipkaki paki, mulap urumgo birakaki waketke, paki kawali magu etke so etke, enje Petoro ea enjane meteo birakake, paki enje enjane diam okorakoi, paki tego etke so etke ea njine mapok ongi, kawali nei enje koso etke so etke so etke so etke okangoi. Paki Herot enje detke, njado Anjelo Lolonon Lolonon Naso qoeki, eao Petoro ma ari more nei nrep enjane kaitko qewe seukeake. ⁵ Herot enje Petoro mulap urum koto birakaki metke, nj mali malip nei nrep enje Petoro wane ra more Anutu wano togole menjenkakoi.

Anelo Ene Petoro Mulap Urumgo Nine Iwenka Ketkoi

⁶ Qaeki Herot ene Petoro iwenka ari dongo birakayakane wetkeke, ɲo qei kino mi okangi, ruoo Petoro ene kawali ɲei etke erane keuetno kulu pake, ene mulap senɲo lukkakoi, ɲo kawali ɲei ene mulap ɲei enane mat madetko diam okorakoi.

⁷ Ikopka, Anutu wane anelo manenjo mulap urum koto okoraki, so qelananenjo mulap urum koto qelanange. Anelo ene Petoro wokino ma wirikaki wieki olatke, “Ikop! Wienom!” Raki eaka ikopka mulap metino ɲine qoe ketke. ⁸ Pakiso anelono olatke, “Ge radeɲone ramu more kie kulitɲone bira makatakenom.” Petoro ene yale okangi, anelono koso olatke “Ge momo takotɲone bira more na mogat nanikene”. ⁹ Petoro ene anelo mulap urumgo ɲine mogatka saketke. Kine kine iwa wakonge, Petoro ene mi detlukkake. Ene wetke rake, “Kulu kulu mane kamaile,” yale ra wetkeke. ¹⁰ Ere kawali ɲei magu mane ea yuan ongoik. Paki ere koso ari kawali ɲei magu mane ea yuanone more, mulap urum wane madet suaino lotke more, mat suaino wakesikeik wane ariuk, so madet ea onjomka qoe lalangɲi, mat ɲadino waketkoik. Ere numa maneo ketpik paki, ikopka anelo ene Petoro qelinɲake.

¹¹ Pakiso, kine kine wakonge, ea Petoro ene detlukka more rake, “Welekatne, Herot so Yuda ɲei ɲerep ene na wikile ninikei wane detkoi, ɲo Waomnane aneloinenjo birakaki, ket na mulap urumgo ɲine iwennane ketmaike, Herot so Yuda ɲei ɲerep ene mi matali nanikei.”

¹² Petoro ene yale dere more Maria wane matko

arike, Maria ene Yohane Mareko wane nagaine. Nei nrep loutne mat eao lewage menjenkakoi.

¹³ Petoro ene mat madetko lotke more madet nadino yatoke. Paki so qelit nrep mane enetne Roda, onjo don turunine maingeakane sarike.

¹⁴ Nrep ene Petoro wane done mo detkake, njo ene qom sua so kaet nrep, ea wane ene Petoro wane nigetkaki, ene madet mi lalage, ene zinge ari don kisi ea nei nrep edange. ¹⁵ Nei nrep ene dere more olale rakoi, “Ge qelan okanmaine!” Njo ene koso sorinone edangi, nei nrep ene rakoi, “Anelo maneno sarimaike.”

¹⁶ Don yale auye rauso, Petoronjo takotke edo-raki, ene sari madet lalage more, kau paki, onjaene qaeke. ¹⁷ Petoro ene metinenjo ma zop onge, ea wane nei nrep ene donene midaine metkoi, yale metpiso Anutunjo dalino okane more, ene mulap urumgo njine iwenka ketke, Petoro ene ea wane korop raqelanane more edange paki rake, “Don kisi iwa Yakop so mali malip magu natne korop edan warekei.” Yale ra more ene Yerusalem qelige more mat maneo arike.

¹⁸ Kepe qaeke so mulap urum wane diam gege nei ene kaet suaine ongi, dere mezet okane qesonagukoi. “Petoro ene diao arike?” ¹⁹ Herot ene ware ware nei loutne edangi, ene ari Petoro zianka more mi maratkakoi. Herot ene ware ware ea wanokone more kawali nei natne edo-raki, so ene ware ware enguwi seukkoi.

Herot ene kine kine ea ma more Yuda kepeo qelige more Sisaria matko arike.

Herot Eje Seukke

²⁰ Herot eje Tire so Sidon mat welaine ejane sotine osike, paki mat welaine eje Herot korop lewangei wane arikoi. Mikepka eje Blastus mau ejane njadeeno arike, eje Herot wane mat ware ware oŋo qesiŋoniakane eje qesonkakoi. Pakiso, eje Herot wano ari peam dume niakane, ea wane eje Herot olatkoi. Onoka wane Sidon Tire mat welaine eje Herot wane kepeo njine njara abon korop qole okangoi, ea wane eje Herot sot osi osiine ea qoeakane sorinka menjenkakoi.

²¹ Herotŋo kaiwe naso mane motke, paki kaiwe naso yewao eje ware ware wane kibi auke, paki eje ari ware ware met met wane kutno pese metke, eje mere don suaine edange. ²² Nei njerep eje don dere more boka rakoi, “Iwa mo Anutu mane wane aŋa don me nej mane wane aŋa don mida!” ²³ Ikopka Anutu wane aŋelo manenjo Herot qeke. Qeki koma koma eje Herot qomine ki lotke neu, so seuke. Onoka wane Herot eje Anutu ewino mi kitoke, ea wane aŋelonjo qeki seukke.

²⁴ Naso yewa Anutu wane don takotke more sua matko matko arike. ²⁵ Barnabas so Saul ere urataetne Yerusalem matko mauk qoeke paki, ere koso zinge arikoik, ari Yohane Mareko ebuwik ererop arikoi.

13

Antiok Mali Malip Magu Eje Barnabas So Saul Biraotpi Miti Urata Ari Makoi

¹ Antiok mali malip magu ejane keueno njine propet nej natne so kito ebo ebon nej natne

ene gekoi. Enane enet tego iwa yale Barnabas, Simeon, enetine mane, “sigitne” orakoi, Lusius, ene Sairini matko nje, Manain, ene Herot Antipasrop matetne weku, so Saul ² Mali malip magu ene Waom qelitine qeu paki, so nara wane sawe gekoi. Naso yewao, Asu Koboboineno magu ea edane rake, “Na Barnabas so Saul nanane urata wane mo biraotkole, ea wane nje ere bira osikei.”

³ Don ea goeki so ene nara sawe mere more menenkakoi paki, meteene kutetno more so Barnabas so Saul biraotkoi.

Barnabas so Saul Ere Saiprus Siao Arikoik

⁴ Asu Koboboineno Barnabas so Saul biraotki so ere seki zakeo Selusia matko ari seki mane ma more Saiprus siao arikoik. ⁵ Ere Salamis matko lotke more, Anutu wane don Yuda enane lewa lewan urungo wa more ra qelangoik. Yohane Mareko ene urata qesin osiakane ererop metke.

⁶ Ene sia korop kitare ari more, Papos matko lotke more, nei mane enetine Baryesu marat kakoi, nei ea ene propet nei isisine, ene suna gare nei Yuda tego nje. ⁷ Baryesu so sia ware ware ere kima okangoik. Ware ware ea, enetine Sergius Paulus ene dereretine suaine ea wane ene Barnabas so Saul ere enane kaitko sarikeik wane etorake, ene Anutu wane don desiakane detke. ⁸ No suna gare nei mane, enetine Elimas ono kitat otke. Baryesu enetine mane Grik dongo rakoi, Elimas. Ene Sergius Paulus kitatka rake, “Ge erane don mi dere malip kanom.”

⁹ Pakiso, Saul, enetine mane Paulo, wie okorake,

Asu Koboboinenjo Paulo wane kotoo watke rokopkake, ea wane Paulo enje sunja gare nej ea pore kalilipka ¹⁰ olatke, “Ge Satan wane gipole! Ge yeye kine kine mayakatne koboboine, ea wane njabaine ge matalion okanmaine, masi kine kine qotkoine, eanjo genano watke rokop ganmami. Ge Waom wane don welekatne koboboine, ea naso banjem maingenom isisine wakon mageake! ¹¹ Ge detmaine, ukude mo Waom wane metenjo gekuyake paki, denone mo pilikeake paki, ge kepe deine mane mi kaikene. Ge nasomde kirop kirop yale denone pilik pilikine gekene.”

Raki goeki, so eaka kine kine mane kezonj panaman yale, eanjo Elimas deine kawetkeke paki, enje yau yaup lolike more, nej mane marat kaki onjo metino ma iwen kayakane zianjkake. ¹² Pakimo, kepe ware ware enje Elimas, ka more Waom wane don detke, ea wane onjaine qaeke paki, don ea dere malipkake.

Barnabas So Paulo Ere Antiok Matko Pisidia Kepeo Miti Ra Qelangoik

¹³ Paulo so kimatkine enje Papos qelige more, seki kutno wa more Perga matko Pampilia kepeo ari lotkekoi. Lotke so Yohane Mareko enje ere qelinore more, Yerusalem matko zinge arike. ¹⁴ Ere Perga mat qelige more Antiok matko, Pisidia kepeo ari lotke more, Yuda enjane zonom mama naso yewao kaiweo Yuda enjane lewa lewanj urumgo waket metkoik. ¹⁵ Urum welainenjo Mose wane ra rokop don so propet edo don qekoi, ea dapotpi goeki, so enje Paul so Barnabas erano don more more rakoi, “Kimatkeze,

ɲire don natne ɲene togolekenane ɲedanikeik wane magemamikwo, yemo ɲire ɲei ɲerep maine edanikeik.” ¹⁶ Paulo eɲe wie more metine ma wake, pakimo, ɲei ɲerep eɲe don midaine metkoi. Yale metpi, Paulo eɲe kieke edange.

“Israel ɲei so Israel ɲadino qelan gemami, ɲine korop Anutu ewine kitomami. ɲine korop nanane don detpi! ¹⁷ Israel wane Anutu eɲe ɲenane ɲabokopze ma wakon ongi, Ezipt kepeo gekoi, Anutu eɲe Israel mosop ongi, so ɲei ɲerep magu suaine wakongoi, Anutuɲo eɲe eɲine zonominerop Ezipt kulit kepeo ɲine ebu iwenone sarike, ¹⁸ paki, eɲe koma 40 eɲane masi gotkoina ea wane kepe yaup papaino tewekone geke. ¹⁹ Anutuɲo ɲei ɲerep magu 7 Kanan kepeo mataliongi siukkoi, pakiso eɲe eɲine ɲei ɲerep Israel magu koune ebu biraongi, Kanan kepe ea wane welaine okangoi. ²⁰ Paki, kepe ea eɲe koma 450 yale malipkka gekoi.

“Naso ea qoeki, so Anutu eɲe Israel eɲane wano wanok ɲei waom natne biraonge, paki eɲe ge sari mageu, propet Samuel wakonge. ²¹ Naso yewao Israel ɲei eɲe Anutuɲo kepe ware ware suaine mane mawakone birakaki ware oniakane gesonkakoi. Anutuɲo dere more Saul, Kis wane gipole, Benyamin wane tegoo ɲine ma wakone birakake, paki eɲe kepe ɲei waom eɲane ware ware geki koma 40 okange. ²² Anutu eɲe Saul maki ketki so eɲe Dawit kepe ɲei eɲane ware ware ma wakonkake. Anutu eɲe Dawit wane iwa yale rake, ‘Na Dawit, Yese gipole, detlukka-maile. Na ɲei yaline eɲane simin nanmaike, eɲe nanane simile eɲe ban kine kine korop

maki qoe wareake, me na kine kine mayakane olatpe, eje korop tewek wareake.’ ²³ Anutuŋo Yesu, Dawit wane ŋaboine, Israel ŋei ŋerep ma menaŋŋoniakane birakake. Anutuŋo mo sogino ea ra togoleke. ²⁴ Yesu eje urataine mi kiekke, naso yewao Yohane eje Israel ŋei ŋerep sotene ŋadekka more doku taukei wane ra edange. ²⁵ Eso Yohane urataine mo goeyakane naso bomileki, Yohane eje ŋei ŋerep edange, ‘Ŋine nanane ma ramami? Ŋine kine detmami me mida? Ŋine ŋeiwa toma kamami, na eje midaka, ŋine ŋei mane toma kamami. No, na yem ŋei bile mida, na daleo eŋane kie kulit ea gekok kaikale, nono gekkokalane rokop mi okanmaike.’

²⁶ “Kimakopne, Abraham wane ŋabokoune, so ŋei Israel ŋadino qelan gemami, ŋine korop iwa Anutu ewino kitomami, Anutuŋo dalino ma menaŋŋoniake, eje don ea ŋenano motke! ²⁷ Anutuŋo Yesu ŋene ma menaŋ ŋoniakane birakake, Yerusalem ŋei ŋerep so eŋane ŋetne ea eje mi detluk kakoi, eje propet eŋane zonom mama naso dapore more mi detlukkakoi. No eje Yesu geu seukke, ea wane eje propet eŋane don, ea mau wele wakonge. ²⁸ Eje Yesu wane masi qotkoinine mane mi maratkakoi, eje Yesu maine mi geu seukke, no eje Yesu Pilat wano biraka more, Pilatŋo Yesu qeki seukeakane gesonkakoi. ²⁹ Anutu wane papiao eje yeye kine kine korop Yesu wane ra more gekoi pamaike, Yerusalem ŋei eje ea korop mau goeki, Yesu wane parenine kibego ŋine makokka ket more denesere mane wesi aŋaone koto, eao

motkoi. ³⁰ No Anutu ene Yesu ma wirirkkaki, wisikae wieke. ³¹ Pakiso, kaiwe loutne Yesu ene enine dokoine enano wakononge, sogino ene Yesu eninerop Galili kepeo nine sari Yerusalem matko arikoi, Yesu ene masi kine kine make so seu seuo nine wisikae wieke, dokoine ene ea korop ka more, Israel nei nrep edan okanmami.

³²⁻³³ Na kine kine korop iwa njidanmaile, nere don kisi maine, ea njidaniketane sarimaite. Anutuño nenane nabokopze kine kine ra togole edange, ea korop nene nebon waremai, ea wane ene Yesu ma wirirkkaki, wisikae wieke, Sam 2 eao yale ramaie,

‘Ge nanane Giponne, na ukude genane Maganone lelemaile’

³⁴ So Anutu ene ra togoleke, ene Yesu seu seuo nine maki wisikae wie more koso manerop mi gotosiake, ene takotke more rake,

‘Na Dawit mosopka more rawe togoleke. Mosop ea ene welerop, na yalewaka nine mosop njunikale.’ ³⁵ So Dawit ene papia maneo ramaie, ‘Ge genone qelit nejone koboboine maine mi qelin kanom pa gotosiake.’

³⁶ Nene detmaine Dawit ene Anutu wane simile korop mogare nei nrep keueno geke, ge more seukki, parenine mari nasa nabokoune enerop dukkau pa more gototke. ³⁷ No, Anutuño Yesu seu seuo nine maki wisikae wieke, ene mi gototke. ³⁸⁻³⁹ Kimakopne, nine don kisi iwa desikei wane nere sarimaite, Anutuño Yesu seu seuo nine maki wisikae wieke, ea wane nere sari don kisi ea nine njidanmaite. Don kisi ea wane kine iwa yale pamaie, Anutuño sotnine qelinge

ɲiboniake. ɲine Yesu mogat kaikeiwo, Anutuɲo sotɲine ea mataliki siukki, ɲine koboboine sot midaine okanikei, ɲo Mose wane ra rokop donɲo sotɲine maine mi maki siukkeake. ⁴⁰ Sogino propet eɲe don saeɲine eaɲo ɲinano maine mi wakoniake, eɲe iwa yale qekoi,

⁴¹ ‘ɲine wawaine ɲei, ɲine kaikei so manerop detkei, paki borikei, na ɲinane nasoo urata mamaile, ɲo ɲei manɲo na urata mamaile, ea ɲidaniake, ɲine ea mi dere malipkaikei.’ ”

⁴² Paulo eɲe yale raki qoeki, so eɲine so Barnabas ere Yuda eɲane lewa lewan urumgo kesikeik wane arikoik, ɲei ɲerep erano ari newanore rakoi, “ɲire zonom ma met met naso kutno, eao zinge sari kine kine iwa koso ɲedanikeik.”

⁴³ ɲei ɲerep eɲe lewa lewan mat mo qeliɲka arikoik, Yuda ɲei ɲerep natne eɲe metkoi, so Yuda ɲadino qelan ɲei ɲerep natne eɲe Yuda eɲane gege mage mogatkakoi, eɲe metkoi. Magu etke ea Paulo so Barnabas mogatotkoi, aposolo ere ɲei ɲerep ea mauk wet mali malipene togoleu rakoi, “Anutuɲo ɲine don maineɲo mosop ɲunge, ea wane mosop ea malipka gekei.”

⁴⁴ Zonom ma met met naso kaiwe kutno mat welaine koropɲo Waom wane don desikei wane sarikoi. ⁴⁵ Pakimo, Yuda edo ɲei ɲerep magu suaine one more, detpi boriki, ɲade don ra more Paulo ɲabaka don gotkoine olatkoi. ⁴⁶ ɲo Paulo so Barnabas ere kaet mi okane more, don togole edangoik, “Anutuɲo rake, ɲere eɲane don ɲine alakane ɲidanmaite, ɲo ɲine don ea ɲadek kamami, eamo ɲine gege togon wane mi siminongi

ea detmami. Ea wane nɛrɛ nɛnɛ qɛlɛnɛnɛ more nɛi nɛrɛp Yuda nɛdɛno qɛlanɛ gɛmami, ɛnɛno ari edanikɛtɛ. ⁴⁷ Anutuɛno nɛnɛ don iwa yalɛ ra togolɛ nɛbongɛ,

‘Na gɛ qɛlanɛ ɛnɛnɛ kiwa qɛlanɛnɛ onikɛnɛnɛ bi-raganmaɛlɛ, gɛ nɛi nɛrɛp Yuda nɛdɛno qɛlanɛnɛ sikanonikɛnɛ, nɛi nɛrɛp korop kɛpɛ banɛm ɛnɛ mainɛ mɛnanɛgɛi. Waomɛno ɛnɛ mainɛ ɛbuyakɛ.’ ”

⁴⁸ Paki, nɛi nɛrɛp Yuda nɛdɛno qɛlanɛ, ɛnɛ don ea dɛrɛ wɛtɛnɛ pɛsɛki, Waom wɛnɛ don wɛnɛ bakom kitokoi, bakom kito, so Waom wɛnɛ don wɛku manɛ dɛtkoi. Anutuɛno nɛi nɛrɛp gɛgɛ togon wɛnɛ ma wɛsakɛ mo biraongɛ, ɛnɛ korop mali malip korop okɛnɛ don kisi mainɛ malip kakoi.

⁴⁹ Pakiso, Waom wɛnɛ donɛno kɛpɛ korop yɛwao sua watkɛ rokokakɛ, ⁵⁰ so nɛrɛp nɛtnɛ suainɛ, Yuda nɛdɛno, ɛnɛ Anutu ɛwɛnɛ kitokoi ɛnɛ kɛpɛ ea gɛkoi, Yuda ɛdo, nɛrɛp ea so mat nɛi nɛtnɛ suainɛ sori sorin edanbi, so magu ɛtkɛ ɛnɛ Paulo so Barnabas nɛba ɔrɛ, wikilɛ kielɛ ɛponɛ more kɛpɛnɛno nɛnɛ ɛsopotpi sakɛt arikoik.

⁵¹ Aposolo ɛrɛ kɛpɛ qɛligɛ more, kielɛtno lubɛ lubɛ yɛwa sitogɛut qɛkɛ kɛt mɛtkiso, ɛrɛ kɛpɛ ea qɛligɛ more, Ikonium matko arikoik. Nɛi nɛrɛp ɛnɛ masi ea ka more iwa yalɛ dɛsikɛi, borikinɛnɛno nɛnanɛ pamaikɛ, Anutuɛno nɛnɛrɛp nɛba okanonmaikɛ.

⁵² Doku tau tau magu Antiok matko gɛkoi, don kisi ea dɛrɛ more, bakom suainɛ kitokoi, so Asu Koboboinɛnɛno watkɛ rokɛp onɛgɛ.

Paulo So Barnabas Ere Ikonium Matko Urata Makoik

¹ Masi kine kine korop Antiok wakonge, yale waka Ikonium matko wakonge. Paulo so Barnabas ere Yuda enane lewa lewan urungo ari nei nrep edangeik, ea wane Yuda nei nrep so qelan nei nrep Yuda nadino ene loutnejo mali malip korop okane, Yesu mogatkakoi. ² No Yuda nei nrep Yesu mi mogat kakoi, ene qelan nei nrep Yuda nadino malip malip magu gekoi, ene kimakopene naba okan onikei wane wetene gepoke qebinongoi. ³ Aposolo ere soda loutne Ikonium ge more Woam wane ra more kaet midaine togoleka don maine edangoik. Waomjo ere qesiotki so ere masi kine kine togole mauk, ea wane Waom ene nei nrep wetinejo malipone more sikanonge, aposolo ere binjek don kisi ea ra qelanan ongoik. ⁴ Mat welaine ene wet etke okangoi, nei nrep natne ene wiri Yuda tego mogat ongoi, no nei nrep natne ene aposolo ere mogat ottoi.

⁵ Pakiso, nei qelan Yuda nadino, so Yuda nei tego natne ene suaine kopene enerop aposolo matali ore more wesijo etkuwi seukkeik wane rau togoleke. ⁶ Rauso aposolo ere don ea dere more Listra so Derbe matko, Likaonia kepeo kaet arikoik. ⁷ Ere kepe yewao Anutu wane don kisi maine, ea ra qelanan ongoik.

Paulo So Barnabas Ere Listra So Derbe Matko Arikoik

⁸ Listra matko, nei mane kine qotkoinene ene nabok kotino nine mo yaline sarike, paki ene numa mane mi ari geke. ⁹ Ene met met ka

mere Paulo wane don detke, Paulo ene nei ea detlukkake, nei eaŋo Paulo wane don dere malip kake, ea wane Anutuŋo ene maine ma menaŋkayake, ea wane Paulo ene yale dere more nei kine gotkoina ea pore kalilipka, ¹⁰ so boka olatke, “Ge wie koboine kienone kutno okoranom!” Nei ea ene kanzage wie more kieke gesoke lolike arike. ¹¹ Pakimo, Paulo ene masi ea maki wakongi, nei nɛrep ene ka more, enɛene Likaonian donenoka kieke boka rakoi, “Anutu ene nei yale lele more nenano ket sarimami!” ¹² Nei nɛrep ene Barnabas wane anutu mane Zeus orakoi, ɲo ene Paulo wane anutu mane Hermes orakoi, onoka wane Heremes ene Zeus wane don ra gelaŋangi detkoi, ea wane. ¹³ Anutu mane, enɛtine Zeus, enɛane matine mat suaine ɲadino pake. Zeus wane mosop nei enɛine so nei nɛrep ene aposolo erano bulamakau nei so zariŋ peike, mat wane madetko ma sarikoi, ene so nei nɛrep magu ene aposolo bakom okan otkei wane.

¹⁴ Pakimo Barnabas so Paulo ere nei nɛrep ene daleo okangei wane okangoi, ea wane similene detluke more, ma waulukonikeik wane, takot lap lap etne ma barake more, biririke ari nei nɛrep magu keueno boka ari rakoik. ¹⁵ “Onoka wane kine kine iwa mamami? Nere kepe ɲeika, nɛre ɲine yaleka! Nere ɲine don kisi maine, ea ɲidaniketane sarimaite, ɲine anutu isisine ea ɲadekka more, zinge Anutu gege welaine enɛane kaitko gekei. Anutu gege welaine ene qeli so kepe so kine kine korop ma wakonge. ¹⁶ Mo sogino Anutuŋo nei nɛrep qeliŋongi yau yaup gekoi, ¹⁷ ɲo naso baŋem ene enɛine kine nei nɛrep sikanonge,

ea wane eje masi weku mane ma mageake, eje koya qeliwo njine maki ket okanmaike, eje eki zaguk maki wele qe okanmami, eje njara njibon okanmaike, so koto njino wet pesenjo qe watke-maike, eje njinane bakomnjine kito okanmaike.”

¹⁸ Paki ere don ea edankoik, no ere nei njerep eje rawetonbik erane bakom kito soe soep mi maikei wane urata suaine makoik.

¹⁹ Pakiso, Yuda nei natne, Antiok matko Pisidia kepeo njine, so natne Ikonium njine, eje nei njerep magu ea ebuwi, eje Paulo wesinjo qeu paki, warangka ma ket mat njadino birakau paki, rakoi Paulo mo seukmaike. ²⁰ No, malip malip magu eje Paulo wano lewageu paki lolikka okorakoi, Paulo eje koso wie more mat koto waketke, kepe qaeki eje so Barnabas ere Derbe matko arikoik.

Barnabas So Paulo Ere Antiok, Siria Kepe Zinge Arikoik

²¹ Paulo so Barnabas ere don kisi maine ea Derbe matko ra qelananbik ea wane nei njerep loutne eje Waom mogat kakoi, pakiso ere zinge Lистра matko ari more, ea njine, Ikonium so Antiok matko, Pisidia kepeo lolike arikoik. ²² Ere mali malip magu zonom ebongoik, so mali malip wele eao kito gekei wane, dokoetne mat ea korop ma togole edangoik. Ma togole one rakoik, “Njine Waomze koboboine mogat kaikei, njene Anutu wane gege kepeo wakesikene ea wane njene kepe iwao umat wikile loutne desikene.” ²³ Ere malip malip maguine maguine enano ari more, sawe ge menjenka more ware ware maguine maguine doku tau tau magu enane biraongoik, yale waka

Aposolo ere nei nɛrɛp ea mali malip korop doku tau tau Waomzane meteo biraongoik.

²⁴ Ere Pisidia kepe korop lolike ari more sari Pampilia kepeo lotkekoik. ²⁵ Ere Perga matko miti don ra qelaɲane more Atalia matko ari ketkoik.

²⁶ Eso yewa ɲine eɲe seki kutno wa more, kito zinge Antiok matko, Siria kepeo arikoik, kepe yewao ere alakan doku tau tau magu edo ere Anutu wane metino bira ore more, mosop ore wareotpi urata ea maikeik wane meɲen kakoi. Wane yekuat namo urata ea mo mauk goeki, ere zinge arikoik.

²⁷ Ere Antiok matko lotke more mali malip magu qeturaɲ one more, Anutuɲo yeye kine kine erano maki wakonge, ea wane don kisi korop edangoik, so Anutuɲo qelaɲ nei nɛrɛp Yuda ɲadino gekoi, eɲe Anutu malipkakoi, wane eɲane numa lalaɲge, ea wane ere korop edangoik.

²⁸ Ere naso kiroine mali malip nei nɛrɛp eɲerop ea metkoik.

15

Aposolo Eɲe Yerusalem Lewaɲgoi

¹ Naso maneo nei natne Yuda kepeo ɲine eɲe Antiok matko sari mali malip nei nɛrɛp kiekɛ kito edane rakoi, “ɲine Mose wane ra rokop don ramaike, yale solane kitasikei, ɲine mi kitasikeiwo, Anutuɲo ɲine mi ma menaɲ ɲuniake.”

² Paulo so Barnabas eɲe Yuda nei eɲerop don ea wane zok sorin nagu togoleka aukoi. Antiok magu eɲe korop lewage more rau togoleke, Paulo so Barnabas so Antiok magu eɲane nei

suaine natne ene Yerusalem ari more, aposolo so mali malip magu nei suaine enjerop don auye makoboekei wane ari lewangoi.

³ Antiok mali malip magu ene nei ea biraongoi, ene Ponisia kepe so Samaria kepe kitare ari more, mali malip nei njerop edangoi, qelan nei njerop Yuda nadino gekoi, ene Anutu mogat kakoi, ea wane ene mali malip nei njerop edangoi. Mali malip nei njerop ene don ea dere more bakomene suaine kitokoi. ⁴ Antiok magu ene Yerusalem lotkeu, so Yerusalem doku tau tau magu suaine so aposolo, so nei sele suaine ene Antiok magu ea mateno newan ongoi. Antiok magu ene mateno waket mere more, Anutuño yeye kine kine okan onge, ea korop Yerusalem magu edangoi. ⁵ No mali malip nei natne ene Parisi magu enane tego gekoi, ene wie okora rakoi, “Qelan nei njerop Yuda nadino gemami, ene solaene kitatpi, so Mose wane ra rokop don ea dere tewekei!”

⁶ Ea wane aposolo so nei suaine ene lewage more, Mose wane ra rokop don ea dere metkoi. ⁷ Naso kiroine nei korop ene don auye kitat okan mageu, so Petoroño wie okora lewa lewago edange, “Kimakopne, mo sogino Anutuño na qelan nei njerop Yuda nadino gemami, ene don maine edanikalane biranange. Qelan nei njerop Yuda nadino gemami, ene maine don kisi maine dere malipka more mogatkakei, ea wane Anutuño na biranange. ⁸ Anutuño nei njerop wet dereretene korop detluk waremai, ene nei njerop qelanine Yuda nadino gemami, ene Asu Koboboine ebonge, ea wane ene nei njerop ea ene

siminongi, nene sikan ongone. Ene sogino nene Asu Koboboine nebonge, yale waka ene nei nerep ea, Asu Koboboine ebonge. ⁹ Anutuño nene so nei nerep ea numa etke mi sikan onge, numa weku, nei nerep ea, ene Waom don malip kakoi, ea wane Anutuño ene sauk ongi libeka lelekoi. ¹⁰ Pakimo, nine Anutu onoka wane liwe liweko birakamami, paki nine misuk umat suaine ea doku tau tau magu enane wokey motkei, sogino nabokopze gekoi, so nene iwa ukude gemaine, nedo nasa nabo wane ra rokop don wane umat ea maine mi tewekene. ¹¹ Welekatne, Yesu wane wet maep, ea wane Anutuño nene ma mena nioniake, yale waka Anutuño nei nerep ea ma mena nioniake.”

¹² Yale raki qoeki, so magu korop ene don midaine mere more, Paulo so Barnabas erane don detkoi, ere Anutuño masi kine kine togole gesinotki, qelan nei nerep Yuda nadino gekoi, enano makoik, ea wane korop ere magu edangoik. ¹³ Ere rauk qoeki, so Yakopno wie rake, “Kimakopne, nanane don detpi! ¹⁴ Anutuño qelan nei nerep Yuda nadino gemami, wareoniakane sikan nonmaike. Ene nei nerep ea Anutu enane binjek ebuke, ea Simon ene mo ra qelanan nonmaike. ¹⁵ Propet enane don yemo earop orodon okanmaike, ene iwa yale ra more papiao gekoi,

¹⁶ ‘Waomno rake, naso yewa qoeki, na ban zingekale, paki ban Dawit wane mat ket rasu pake, ea ma wiekale, wenem sotakine mawe togoleake. Enane kine kine matalione pamaike, ea na ban mawe wie musele

okora togoleake. ¹⁷ Eso nei nerek natne korop ene ban Waom kaikei, nei nerek kepe banem kepe banem ene nanano sarikei. Na nei nerek qelanjine Yuda nadino mo edo-rakole, ea korop nanane binjek okanikei. ¹⁸ Eso Waomno ramaike, onjo kine kine iwa mokaka ra qelanan nonge, ene iwa koso ramaike'.

¹⁹ Propet ene yale rake, na iwa yale wetke-maile, nei nerek qelanjine ea, ene wetene mainge more, zinge Anutu mogat kamami, nene ene umat misuk ebonnem tewekkei. ²⁰ Ea wane tungo yemo, nene kibi mane qe more edanikene, ene anutu isisine enane abon korop qelin warekei. Ene wenip yau yaup mamami, ea maine qelingei. Ene osom ebine mapokeu seukki, ea ene misuk nekei. So ene wenem misuk nekei. ²¹ Nene det-maine, zonom ma met met nasoo kaiwe banem nei edo Mose wane ra rokop don, ea Yuda enane lewa lewan urungo naso kiroroine dapore more, mat banem mat banem don ea ra qelanjane edan warekoi.”

Aposolo Ene Qelan Nei Nerek Yuda Nadino Enano Ekap Qe Motpi Arike

²² Yakop ene don raki qoeki, so aposolo so nei suaine so mali malip magu korop ene rau togoleke, ene nei natne wanokone more, nei ea Paulo so Barnabas ererop Antiok biraonikei wane rakoi. Ra more ene nei etke ma wakon ottoi. Mali malip nei nerek ene nei etke yewa eweetne kitokoi, nei mane enetine Yudas, enet mane Barsabas. Nei mane enetine Silas. ²³ Aposolo ene

kibi qe more, Paulo, Barnabas, so Barsabas so Silas ebone Antiok biraongoi, kibi eaŋo iwa yale ramaike.

“Nene aposolo, nei suaine so doku tau tau mali malip magu koropŋo kibi iwa qe more ŋine, qelaŋ nei ŋerep Yuda ŋadino gemami, Antiok matko, Siria so Silisia kepeo gemami, ŋinano motmaine. ²⁴ so ŋene mo detlukmaine, nei natne ŋenane keuzo ŋine sari more, umat ra ŋibongoi, so wet dereret ŋine mau qelaŋ qeke. Nene nei ea mi biraongone. ²⁵ Nene nei ea eŋane donkisi dere more, lewage ra togole more, nei etke ma wakone more, ŋinano bira osikenane, wet weku okangone. Ere kimatkeze Paulo so Barnabas eretnarek sarikeik wane. ²⁶ Paulo so Barnabas, ere Waomze Yesu Kristo wane ŋabakoune eŋane kaitko don ra qelaŋangoik. ²⁷ Nene Yudas so Silas eretnarek weneŋ bira otmaine, ŋene kine kine qemaine, ere don ea korop ŋidanikeik. ²⁸ Asu Koboboine so ŋene dereret okanmaine, ŋene umat suaine ea maine mi ŋibonikene, rara togon don iwaka ŋine tewekkei. ²⁹ Nene anutu isisine eŋane aboŋ korop qeliŋwarekei. Nene wenem misuk nekei. Nei eŋe osom ebine mapokeu seuki, ea ŋine misuk nekei. Nene ra rokop don mogat kaikeiwo, ŋine koboboine gekei, ŋine wenip yau yaup misuk maikei, ŋine maine gekei.”

³⁰ Kibi yale qe more nei etke Antiok matko biraotkoi, eŋe korop ari Antiok lotke more, mali

malip magu geturan one kibi ebongoi. ³¹ Nei n̄erep eñe kibi ea dapore dere more, bakom kito togolekoi. ³² Yudas so Silas eretne ere propet, ere naso kiroroinē doku tau tau kimakopetne edane urata ra qelan̄anone more, ñei n̄erep ma togole one so zonom ebongoik. ³³ Soda natne ere yewa geuk so mali malip magu eñe ere biraore rakoi. “N̄irano kutko peam pakep.” Yale rau paki, so ere aposolo eñano koso Yerusalem zinge arikeik wane rakoi. ³⁴ N̄o Silas eñe ea mesiakane raso, ea Antiok metke. ³⁵ Paulo so Barnabas ere naso natne ea Antiok gekoik, ere so ñei natne korop eñe ñei n̄erep Waom wane don ea kito ebongoi.

Paulo So Barnabas Ere Mapoknagukoik

³⁶ Kaiwe mama natne qoe ariki, Paulo eñe Barnabas olale rake, “N̄ere Waom wane don mo mat korop sogino ra qelan̄ane edangote, n̄ere koso maine zinge ari, kimakopse mat ban̄em qeare onte, eñe maine gemami, me mida.” ³⁷ Barnabas eñe okki paki, eñe Yohane Mareko wenen̄ mauk arikei wane rake, ³⁸ n̄o Paulo eñe rake, “Sogino eñe urata mi man̄em qoeki, Yohane Mareko eñe n̄ere Pampilia kepeo ñine biran̄ore Yerusalem zinge arike, ea wane eñe n̄ererop mi ariake.” Yale ra more, Paulo eñe bauine wake. ³⁹ Paulo so Barnabas ere ea wane don togole gere-unerop au sorin nagu more, mapok nagukoik, Barnabas eñe Mareko iwenkaki, sekiwo wa more, Saiprus siao arikoik. ⁴⁰ N̄o Paulo eñe Silas marat̄kaki, ere arikoik, mali malip magu eñe Waom wane uratao biraot̄koi, eñe Waom̄o ere wareore more mosoposiakane men̄en kakoi.

⁴¹ Ene Siria kepe so Silisia kepeo ari more mali malip magu ma togole one biraongoi.

16

Timoti Ene Paulo so Silas Ererop Arike

¹ Paulo ene Derbe matko lotke more ea qelige, Listra matko ari lotkeke. Nei mane, enetine Timoti ene Waom mogatka more Listra geke. Timoti nagaine, Yuda nerep ene wenen Waom mogat kake. No magaine ene Grik nei. ² Listra so Ikonium mali malip magu korop, ene Timoti wane detpi menangi, ewine kitokoi, ³ Paulo ene Timoti iwen kayakane detke, ea wane ene Timoti solaine kitatke, kepe yewao Yuda nei ene Timoti magaine Grik nei geke, ea detkoi, ea wane solaine kitatke. ⁴ Ene mat suaino arikoi, paki donba aposolo so nei netne suaine Yerusalem matko ra togolekoi, don yewa ene doku tau tau magu edane more rakoi, nine korop don iwa dere more mogatkei. ⁵ Ea wane doku tau tau magu ene mali malipko togole more, kaiwe banjem nei nerep takotke Waom mogat kakoi.

Paulo Ene Kulu Kuluo Masedonia Nei Mane Kake

⁶ Onoka wane Asu Koboboineno ene Asia kepeo miti don mi ra qelanjani kei wane rawetonge, ea wane ene Prigia so Galatia kepe kitare arikoi. ⁷ Ene Maisia kepe mezeno lotke more, Bitinia kepeo arikei wane arikoi, no Yesu wane Asuno rawetonge. ⁸ Pakiso ene Maisia kepe kitare more Troas matko ket ari lotkekoi. ⁹ Ruo yewao Paulo ene kulu kulu mane kake, nei mane Masedonia

kepeo njine, eje okora Paulo menjenka rake, “Ge kiwet kitare Masedonia kepeo sari more njene gesinj nonikene!” ¹⁰ Paulo eje kulu kulu ea kaki goeki, njene yemdaka abonze mauluke Masedonia kepeo arikenane okangone, njene Anutuño yewa ari enjane miti donine ra qelanjanikenane nedorake.

Lidia Eje Waom Mogatkake

¹¹ Ea wane njene Troas njine seki mane maratka wa more, koboboine ari Samotres matko lotkekone, paki ruo mane mere more, qaeki ari Neapolis matko lotkekone. ¹² Njene seki qelige more, kienjo ari Pilipi matko lotkekone, Pilipi mat ea yemo Masedonia kepe wane provins mane wane mat. Sogino Roma nej edo sari mat so gavaman wane kepe yewa makoi, njene mat yewao kaiwe natne gekone. ¹³ Naso yewao Yuda nej njerep eje menjen menjen kepe mat njadino lewanj okangoi, zonom ma met met naso kaiweo, njene mat njadino ari doku wazaino lotke more, Yuda nej edane menjen menjen kepe mane marat kakenane ziankakone. Njerep natne eje kepe yewao lewage metpi, so njene enjerop mere more don aukone. ¹⁴ Njerep mane enjetine Lidia, Taiataira njine, eje laplap wenjemka lewine suaine qoleokange, eje Anutu wane enjet ora mawaka okange, so Waomño Lidia wane wet dereretine gesinjake, eje Paulo wane don malip kake. ¹⁵ Enjine so matine kotine nej njerep magukoune gekoi, eje korop don ea malipka miti doku taukoi, so Lidia eje newannjone rake, “Njene na Waomze koboine mogat kamaile, yemo detpi paki, njine

sari nanane matko mesikei.” Yale ra more, ene sorin njongi, nene matino ari gekone.

Roma Kawali Nei Ene Paulo So Silas Mulap Urumgo Biraotkoi

¹⁶ Kaiwe maneo nene mene menen sobenino arikenane ari more, qelit nerek mane marat kakone. Ene Asu qotkoineno enane kotino ket okora more, maki nerek ene masi tanik nado daleo wakoniake, ea wane don saenine edange. Nerek ene asu qotkoine ea kine kine qesonkaki, asu ea don mainge olatmanke, ea wane nerek ea wane suainekoune, ene wesi suaine eno kiatki mamankoi. ¹⁷ Nerek ea ene Paulo so nene nenane nadezo mogat none boka rake, “Nei yewa ene Anutu Wawaine qeliwo enane qelit nei okanmami. Ene Anutuno daleo ma menanoniake ea wane numaine nine rawakone njidanmami.”

¹⁸ Nerek ene kaiwe loutne yaleka ra okanmanki, so Paulo ene bauine waki, zinge asu qotkoine olale rake, “Na Yesu Kristo wane enetko ramaille, ge nerek qelinika saketnom!” Yale raki asu qotkoine ene naso yewaoka nerek qelinikake.

¹⁹ Pakiso nerek welakoune ene kau, nerek ene don saenine raraine, ea mo mida leleke, paki koso mi ramaike, wesi mamaene mo siukike, pakiso ene Paulo so Silas epu waranore more, dongo bira osikei wane lewa lewan mat sobego arikoi. ²⁰ Ene Paulo so Silas epu, Roma gavaman wano wanok suaine enano iwen ore ari more rakoi, “Nei etke iwa ere Yuda nei, ene nenane matko wet masiuk okanmamik, ere nei nerek sorin onbik, ene sotene osike, ²¹ ere masi qotkoine ea nenane rara togon

don ɲabaka more ɲei ɲerep edanmamik. Roma rara togon donɲo ramaike, ɲene masi ea maine mi maikene.” ²² Yale rau, so ɲei ɲerep eɲe sari takot nagu more, Paulo so Silas don ɲaba okanotkoi.

Pakiso, Roma gavaman wane wano wanok ɲei suaine eɲe Paulo so Silas erane laplap ma barakeu ketke, pakiso eɲe qelit ɲei Paulo so Silas morapɲo etkukei wane edange. ²³ Morapɲo zok togogole etkuwi qoeki, eɲe mulap urumgo biraore more, mulap urum ware ware olatkoi, “Ge ɲei etke iwa togoleka malip osikene!” ²⁴ Mulap urum ware ware eɲe don ea dere more, ere urum aɲaone keuo yewao biraore more, kieetno eki etke kutno bano more makatake pise otkoi.

²⁵ Ruo banino, Paulo so Silas ere Anutu wano meɲenka more Anutu bakom eɲet kito kakoik. Mulap ɲei natne eɲe Paulo so Silas detotkoi. ²⁶ Ikopka memea togogole ma ruzakki, mulap urum wane bosin qise more pelekke, so mulap urum wane madet edomka qoe aɲaɲ wareu, mulap ɲei eɲane mulap sein togole, ea qoe ket warekoi. ²⁷ Mulap urum ware ware eɲe poradage wie more, madet korop qoe aɲago okorau kake, paki rake ɲei korop mo saket kaet ari waremami, yale detke. Yale dere more eɲe pilan suaine warage more, oɲomka yaku nagu more seukeakane okange. ²⁸ Ɓo, Paulonjo boka suaineka rake, “Ge misuk matali nagukene! Ɓene korop iwa metmaine!”

²⁹ Yale raki, so mulap urum ware ware eɲe qelit ɲei mane oraki, kiwa mane ma sarike, mulap urum ware ware eɲe Paulo so Silas erane

urumgo biririke ari, zonomine oreki kaet kaki, Paulo so Silas kieetno ket umi qeke. ³⁰ Pakiso, eñe ere urumgo ñine iwenore more qesonotke “Waometkene, na daleo okane menaŋgale?”

³¹ Ere yale mainge rakoik, “Ge Waomze Yesu Kristo malip kaikeneo, Anutuño ge so ñanom dokoñone ma menaŋ ñuniake.” ³² Pakiso ere Waom wane don eñine so matine kotino ñei ñerewekoune gekoi, eñe korop ra qelañane edangoik. ³³ Naso yewaka ruoo, mulap urum ware ware eñe iwenore ari more, kubetetne saukke. Saukkiso, eñine so ñanom dokoine so ñei ñerewekoune miti doku taukoi. ³⁴ Paki so eñe Paulo so Silas eñine matine koto iwenore ari more, ñara natne eponbi nekoik. Mulap urum ware ware eñine so maguine korop eñe wet pesenjo kotoeno korop watke rokop onge, ea wane eñe Anutu malip kakoi.

³⁵ Kepe qaeki, Roman gavaman wanok wanok ñei eñe tebe ñei biraone edangoi, “Ñine ñei etke yewa biraotpi ariuk.”

³⁶ Mulap urum ware ware eñe don ea dere more, Paulo olatke, “Gavaman ñei suaine eñe don motpi sarimaike, ge so Silas ñire maine qeliñ ñusikenane. Ñire maine arikeik. Ñire donñitne midaine arikeik.”

³⁷ No, Paulo eñe tebe ñei suaine olale rake, “Ñere Roma kepe welaineka ñerane biñek okange, ñere masi qotkoine mane mi okante, paki ñerane sot mane mi maratkakoi, ño siluñ eñe lewa lewago ñere ñei ñerep kaiteno morapño ñetkumi, paki mulap urumgo biraotpi waketite, pakimo iwamo sanko bira ñotpi ariketane

okanmami? Eamo korop midakaka! Roman gavaman wano wanok nei suaine ene edom iwa sari more, biranotpi sakesikete.”

³⁸ Tebe nei suaine don iwa dere more, Roma gavaman wano wanok nei suaine enano ari edangoi, paki ene Paulo so Silas ene Roma kepe welatkine, yale dere more, ea wane kaetonge.

³⁹ Ea wane ene mulap urumgo ari more etane rakoi, “Nene masi borikine okan njurine, ea maine qelinjauk nigetnusiake.” Yale rau paki mulap urumgo njine iwenore saket more mat ea qelige arikeik wane etangoi, “Nire mat suaine iwa maine qelinj kaikeik?”

⁴⁰ Paulo so Silas ere don ea dere more, mulap urum qelinjka more Lidia wane matko arikoik, mat yewao ere mali malip magu kimakopetne maratone more, don togole edane ma togole one, mat suaine ea qelinjka arikoik.

17

Paulo So Silas Ere Tesalonaika Matko Arikoik

¹ Paulo so Silas ere Ampipolis matko so Apollonia matko ari kitare more Tesalonaika matko lotkekoik, Yuda enane lewa lewanj urum mane ea Tesalonaika metke. ²⁻³ Paulo ene Yuda enane lewa lewanj urumgo naso banem wa ket okan okan manke, ea wane ene Tesalonaika geke, naso eao ene lewa lewanj urum yewao zonom ma met met nasoo atak karewe waket more, ene nei njerep enano Anutu wane papiao njine dapore sorin one more kito edange, ene so nei njerep papia ea ra more don aukoi, Mesia ene wikile dere more, koso wisikae wieke, ea Paulo ene nei njerep ra qelanjan one more rake, “Na Mesia iwa ra more

mo njidanmaile, eɲe Kristo Yesu. ⁴ Ɗei ɲerep natne eɲe Paulo wane don malipka more, Paulo so Silas erano lewanɲoi. Griɲ ɲei ɲerep so mat wane ɲerep ɲetne, eɲe mo Anutu ewine kitokoi, eɲe wenen Paulo so Silas erano lewanɲoi.

⁵ Ɗei ɲerep loutne eɲe erano ari takotkekoi, ea wane Yuda ɲei natne busu lele more, ɲei qotkoine natne qeturaɲ ongoi, magu yewa eɲe mat lolike more, ukat suaine ma more, ɲei mane eɲetine Yason eɲane matko ari Paulo so Silas ziaɲ ore more, epu ɲei ɲerep eɲane kaiteno waraɲ ore arikei wane, mat ea matalikoi, ⁶ ɲo eɲe ere mi maratore more, Yason so kimakopene mali malip magu natne eɲe waraɲone, mat wane ɲei ɲetne kaiteno biraone boka rakoi, “Ɗei etke ea ere masi qotkoine kepe baɲem kepe baɲem makoik, naso iwa ere matzo sari matali ɲonikeik wane sarikoik. ⁷ Pakimo, Yasonɲo biraotki, eɲane matko metmamik eɲe ere matino newanotke. Ere korop Roman ware ware wane rara togon don ea qe barake more, ɲei ɲerep edane ramamik, ‘Ware ware mane gemaik, eɲetine Yesu’ yale rau edanmamit.” ⁸ Yale rau so ɲei ɲerep magu so mat wane ɲei ɲetne eɲe dere more oɲaene qaeke, pake ukat suaine makoi. ⁹ Pakiso mat wane ɲei ɲetne eɲe Yason so kimakoune natne eɲe wesi qoleu so biraonbi mateno arikoik.

Paulo So Silas Ere Berea Matko Arikoik

¹⁰ Ruo kereki so eaka mali malip magu eɲe Paulo so Silas Berea matko biraotpi arikoik, ere ari Berea lotke more Yuda eɲane lewa lewa urumgo waketkoik. ¹¹ Yuda ɲei ɲerep Berea

matko gekoi, eɲe mayakakatne, edo Tesalonaika wane Yuda ɲei ɲerep magu dereret mayakatnane yuan ongoi, eɲe Paulo wane don desikei wane simin onge, so Anutu wane papia dapotkoi, papia ea so Paulo wane don ea naso baɲem dapore wele me isi ea wane kinetne detluk kakoi. ¹² Yale okane more, Yuda ɲei ɲerep loutneɲo don ea malip kakoi, eɲe yalewa okanbi, Grik wane ɲei ɲerep suaine natne eɲe yalewa korop mali malip korop okanwarekoi, so don ea malip kakoi. ¹³ Ƴo Yuda edo Tesalonaika ɲine, eɲe Paulonjo Anutu wane don Berea ɲei enano ra qelanange, ea wane eɲe dere more, Berea sari ɲei ɲerep kieke qebinone ukat suaine mau wakonge. ¹⁴ Ikopka, mali malip magu eɲe Paulo iwenka ari kiwet mezenoka birakau arike, ɲo Silas so Timoti ere Berea metkoik. ¹⁵ Ƴei natne eɲe Paulo iwenka ari, Atens matko biraka more, Berea zinge arikoi. Pakiso, Paulo eɲe ɲei ea edange, “Ƴine Silas so Timoti iwa ikop sarikeik wane etanikei.” Rakiso, eɲe zinge ari etangoi.

Paulo Eɲe Atens Eao Don Ra Qelanange

¹⁶ Paulo eɲe Atens matko Silas so Timoti toma ore mat lolike ge more, lopio so kepe nemu nemu loutne ongi paki, bauine wake. ¹⁷ Ea wane eɲe ari Yuda lewa lewan urumgo waketki paki, Yuda ɲei so Grik ɲei ɲerep eɲe Anutu malipka ewine kito gekoi, kaiwe baɲem eɲe enerop don au sorin nagukoi, so mat soben suaino ɲei ɲerep wenen lolikmankoi, ea wane Paulo eɲe ɲei ɲerep enerop kaiwe baɲem don aukoi. ¹⁸ Epikurian kito ebo ebon, so Stoik kito ebo ebon ɲei natne, eɲe

Paulorop don sori sorin aukoi, nei natne qeson one rakoi, “Nei dereretine midaine ea ene onoka don ramaike?”

Nei natne ene wenen rakoi, “Iwa mo kamaine, ene mat natne enane lopio wane don ramaike.” Don iwa rakoi, yemo onoka wane Paulo ene Yesu seuseuno nine wisikae wieke so enine don kisiine ra qelanange, ea wane nei ene don ea rakoi. ¹⁹ Pakiso ene Paulo ma more mat mane kaunsol, enetne Areopagus, enano iwenka lewa lewaneno ari more olatkoi, “Ge nei nrep don kine kine musele mo kito ebonmaine, ea korop ranom nene detlukkaikene. ²⁰ Ge kine kine natne nene detnem ge ramaine, eamo don kunenine okanmaike, so don ea wane kine daleo ea rau lukenom, nene desikene.” ²¹ Atens mat welaine so lobo nei ea gekoi, ene naso kiroine korop kine kine musele wakonge, eaka korop deskei wane don aumanjoi.

²² Yale rauso, Paulo ene mat ware kaunsol Areopagus wane lewa lewago nei kaiteno wie more rake, “Atens mat welaine, na kawe nine lopio so kepe nemu nemu loutne togole eweene kito-mami. ²³ Na matnine lolike menjenka okanmami, eao ari lopio so kepe nemu nemu loutne ongole. Na yale lolike more, lopio so kepe nemu nemu wane arata mane kakole, kibiine iwa yale gekoi, ‘Anutu kunenine mi dereretze’ . Nine Anutu kunenine ea mi dereretze, ewine kitomami, jo silun nine mi detmami, na enane don iwa ra wakone nidanikale. ²⁴ Ene Anutu koboboine, ojo kepe so yeye kine kine iwa pamaike, ea make. Ene qeli so kepe wane Waom, so ene neino bakom urum mamaine eao mi gemaikae. ²⁵ Me ene

kine kine natne n̄aŋaeki, n̄eiŋo urataine ma mi qesiŋkakene, eŋe oŋomka gege so asu, so eŋe n̄ara aboŋ so kine kine korop n̄ei n̄erep ebonmaike, ea wane n̄ene maine mi mapik kaikene, ²⁶ eŋe n̄aboze n̄ei weku ma wakonkake, eso n̄aboze wekuo n̄ine magu korop kepe baŋem gekei wane ebuki wakongoi. Eŋe oŋomka mokaka nasoene so zawoenne koboine kepe diawao gekei wane mauluke motke, Anutuŋo n̄ei n̄erep kepe biŋek ra togoleke. ²⁷ Eŋe ea okange, yemo n̄ei n̄erep eŋe Anutu ziaŋka ari more, marat kaikei, ea wane Anutu eŋe yale okange, n̄o siluŋ Anutu eŋe n̄ene qeliŋone amaŋ mi gemaikē, eŋe osozo met okanmaike. ²⁸ N̄ei manen̄o rake,

‘N̄ene en̄ane kutno gemaine, so ari sari okanmaine so togolemaine, eŋe maki n̄ene wakongone, iwa gemaine.’

N̄inane n̄ei natne kisi ranaŋo ra okanmami, yale eŋe iwa yale rakoi, ‘N̄ene korop Anutu wane medewekoune.’

²⁹ N̄ene Anutu wane medewekoune okane gemaine, ea wane n̄ene misuk metke raikene, Anutu eŋe gol me silwa me wesin̄o n̄ei mete kibi mama edo n̄ei oŋa mamami, kait toqaine yalewa misuk desikene. ³⁰ Mo sogino, n̄ei n̄erep eŋe Anutu wane kine mi det lukkakoi, eao Anutuŋo lolononge, n̄o ukude yemo eŋe n̄ei n̄erep korop yeo yeo numaene qotkoine n̄adek kaikei wane, don togole edanmaike. ³¹ Eŋe kaiwe mane mo mauluke more ra togoleke, naso yewao eŋe n̄ei mane mo birakake, n̄ei eaŋo n̄ei n̄erep kepe baŋem kepe baŋem kineene baŋ ma wakoniake. Iwa yale Anutuŋo n̄ene sikan n̄onge, kine kine ea

wakonge, eɛ ɛei ea seuseuno ɛine maki wisikae wieke!”

³² ɛei manenjo seuseuo ɛine wisikae wieke, ea ɛei ɛerep eɛe dere more, natne Paulo ma sirak okankakoi, ɛo ɛei natne rakoi, “Nene ɛinane don koso desikene.” ³³ Yale rau so Paulo lewa lewan qelinakaki, ³⁴ ɛei natne eɛe Paulo mogatka more, enane don malip kakoi. ɛei mane, enetine Dionisius, eɛe Kaunsol ɛetne mane, eɛe malipkake. ɛerep mane, enetine Damaris, enine so ɛei ɛerep natne wenen eɛe malipkakoi.

18

Paulo Eɛe Korinti Arike

¹ Pakiso, ea wane ɛadino Paulo eɛe Atens mat qelige more, Korinti matko ari lotkeke. ² Yewao Paulo eɛe Yuda ɛei mane, enetine Akwila maratkae, eɛe Pontus kepeo wakonge, eamo wakon wakon matine. ɛei ea enine so ɛanomine Prisila, ere musele Itali kepeo ɛine sarikoik, onoka wane Roma kepe ware ware, Sisa Klodius, eɛe Yuda ɛei ɛerep korop Roma mat qelige arikei, ea wane edane more esoponge. ³ Paulo eɛe ari ere otki, pakiso erane matko ari mere more, enerop urata make, onoka wane eɛe enɛene okanmanakoi, yale Paulo eɛe seli kise ma more, eanjo motki kiatki gegeene qesinake, eɛe so ɛei so ɛanomine, eɛe korop seli kise ma more, qolemanakoi, iwa yale eɛe ɛara abon wane manakoi. ⁴ Paulo eɛe zonom ma met met naso, nasoo banem Yuda lewa lewan urumgo ari more, Yuda ɛei ɛerep so Grik ɛei ɛerep eɛe Yesu Kristo

dere malip kaikei, ea wane dereretene kito wirike edange.

⁵ Pakiso, Silas so Timoti ere Masedonia kepeo njine lotkeuk, yewao Paulo eje kaiwe korop don kisi maine ea ra qelanange, eje Yuda nei njerep lewageu, Yesu eje Mesia ea wane don edange. ⁶ Yuda edo Paulo rawetkau, Paulo eje wazaone okora edange, “Njine kine kine qotkoina maikiwo, Anutuŋo njine esop njuniake, ea njinane simile, na maine mi mapik njunikale, nanane sot mida! Naso iwa njine kiekewetela kutno arimaike, eao na qelan nej njerep Yuda njadino gemami, enano ari ra qelanane edanikale.” ⁷ Nei mane Yuda njadino enetine Titius Yastus, eje Anutu ewine kito more Korinti geke, mat yewao Yuda lewa lewan urum osino Paulo eje ari geke. ⁸ No Yuda nei mane, enetine Krispus, enine so njanom dokoine eje korop Waom mogat kakoi, nei ea eje Yuda lewa lewan wane njetine okange, eje so Korinti mat welaine loutne eje Waom wane don dere malipka more, miti doku taukoi.

⁹ Naso yewao, ruo maneo Paulo eje kulu kulu mane kaki, Anutuŋo olale rake, “Ge misuk kaet ganiake, ge maine takotke ra qelanane edanikene, ge urata ea misuk qelingene. ¹⁰ Onoka wane na gerop gemaile, nei maneno ge mi geku matali ganiake, onoka wane nei njerep loutne mat iwa wane koto gemami, eje nanane binjek okanmami.” ¹¹ Waomŋo yale olatki, so Paulo eje Korinti mat yewao koma weku so meso 6 takotke ge more, nei njerep Anutu wane don edange.

¹² Pakimo, nei mane, enetine Galio, eje Roma

gavaman ea n̄ine, ēne Akaia kepe ware ware birakakoi, naso yewao Yuda edo Paulo ma ari more dongo biraka rakoi, ¹³ “N̄ei iwa ēne n̄ei n̄erep don mane Anutu ewine kitokei wane edanmaike, ēnane don eājo so n̄enze ra rokop don, ea n̄abakamaike!”

¹⁴ Paulo ēne don rayakane wetke okorake, n̄o Galio ēne Yuda n̄ei edane rake, “N̄ei iwa ēne masi qotkoine make, me sot mane okanikeo, na n̄inane don maine det̄unikale. ¹⁵ N̄o n̄ine, Yuda n̄in̄ine don wane so ēnet wane so ra rokop don ea wane ra more don auye kitat aumami, ea wane n̄ine n̄idomka maulukeu, nōjo kine kine yaline ea maine mi ma wesake kaikale!” ¹⁶ Ēne yale ra more kot urumgo n̄ine esopongi, qēinat ketkoi. ¹⁷ N̄ei n̄erep magu ēne korop busu lele more Sostenes, Yuda ēnane lewa lewān wane n̄etne malipka, kot wane kaitko gekoi. N̄o Galio ēne ea wane dere mezet mane mi okange.

Paulo Ēne Antiok Zinge Arike

¹⁸ Pakiso, Paulo ēne Korinti n̄ei n̄erep mali malip magu ēnerop kaiwe loutne ge more qelīngi paki, ēnine so Prisila so Akwila, ēne Senkria matko kere more, seki mane wa more, Siria kepeo arikei wane arikoi. Paulo ēne mi wake, Anutu wane kaitko don natne ra togoleke, ea wane ēne lewetine zoune korop kitat wareke, lewine setneka metke. ¹⁹ Ēne seki kutno Epeso matko lotke more, Prisila so Akwila qelīnore more, Yuda lewa lewān urumgo waketki, so ēne so Yuda edo don auki siwot aukoi. ²⁰ N̄ei n̄erep ēne Paulo newalika more rakoi, “Ge maine

takotke njenerop gekene.” No Paulo enje mi okke more, ²¹ edange, “Anutuŋo siminkayakeo, na njinano zinge sarikale.” Enje yale ra more ari, seki mane wa more Epeso gelinjake.

²² Seki ea ari mage ari mage, Sisaria mat Yuda kepeo lotkeke, yewao, Paulo seki qelige more, Yerusalem ari mali malip magu maratone, wet pese don edane more Antiok zinge arike. ²³ Enje soda natne, naso kiro kirop Antiok matko ge more, qelige Galatia kepeo so Prigia kepeo lolike, mali malip magu yewa ma togole one arike.

Yuda Njei Mane Apolos Enje Epeso So Korinti Matko Arike

²⁴ Naso yewao, Yuda njei mane, enjetine Apolos, enje Alekzandria matko wakonge, enje Epeso sarike, enje don ewekine ramageke, enje Anutu wane papia wane kine korop detluk.wareke.

²⁵ Apolos enje Waom wane numa ea kito manbi detke, ea wane Apolos enje njei njerep Yesu wane don kisi koboine ea wane kito edange, ŋo siluŋ enje Yohane wane doku tau tau masi eaka detkake. ²⁶ Enje Yuda lewa lewanj urumgo ari more, kaet midaine don ra qelanjane edange, naso yewao, Prisila so Akwila ere enje detka more, enje matetno iwenka ari more, ere Anutu wane numa manerop koboboine ea mauluke ra qelanjanka olatkoi. ²⁷ Apolos enje dere more, Akaia kepeo ariakane rake, ea wane Epeso wane mali malip magu enje mapitka more, ekap mane ge more Akaia mali malip magu enjano motpi paki, qebinone rakoi, “Nje Apolos maine newankaikei.”

Yale rauso, Apolos enje ari Akaia kepeo lotke

more, mali malip magu zok manerop mapikonge, Anutuŋo ŋei ŋerep mosoponge, ea wane eŋe Waom wane don malipkakoi. ²⁸ Eŋe Anutu wane papiao dapore more, eaŋo ŋei ŋerep Yesu eŋe Mesia ea wane ra wakone sikan one lukke, eŋe Yuda ŋei eŋerop lewa lewago don togole au sorin nagu more, eŋane don qelaŋine ea wane zonomineŋo Yuda ŋei qeki yuononge.

19

Paulo Eŋe Epeso Matko Urata Make

¹ Apolos eŋe Korinti geke, naso yewao Paulo eŋe Asia kepe bonagaina yuane more, Epeso matko lotkeke, eŋe yewa dokoine natne doku tau taune magu maratonge, ² paki eŋe qesonone more rake, “Ŋine sogino, Yesu malipkakoi, naso yewao Asu Koboboine mo makoi me mida?”

Eŋe mainge rakoi, “Midaka, ŋene Asu Koboboine mane ye gemaiké, don ea mane mo mi detkone.”

³ Paulo eŋe dere more koso manerop takotke qesononge, “Pakimo ŋine, ŋine doku tau tau wa mo tanikine daleo taukoi?”

Eŋe rakoi, “Ŋene Yohane wane doku tau tau ea taukone.”

⁴ Paulo eŋe ŋei ŋerep edane rake, “Yohane eŋe ŋei ŋerep sotene ŋadek kaikéi wane doku tauone more edange, ‘Ŋine ŋei mane naŋane ŋadeno sari-maiké, eŋe malipkaikéi,’ Yohane eŋe ŋei ŋerep ŋei ea mogatkaikéi wane edange. Ŋei ea eŋe Yesu.”

⁵ Eŋe don ea raki detpi qoeki, so Epeso mat wane mali malip korop ŋei ŋerep magu yewa Paulonjo Waom Yesu wane eŋetko doku tauonge.

⁶ So Paulo ene metine mawa nei nɛrep kuteno motki, so Asu Koboboinɛɔ ɛɛane kuteno ketke, paki nei nɛrep ene don kait qetot kuneɛine ra more, Anutu wane don kisi maine ea weneɛ ra qelaɛaɛbi sua arike, ⁷ nei korop yale okangoi, ea ɛɛane zaleene wa 12 okangoi.

⁸ Naso yewao, Paulo ene Yuda lewa lewan urumgo atak loutne meso karewe ea wane rokop waket more, kaet midaine miti don nei nɛrep edange. Paulo ene ɛnerop don au more, wetene qe wirike more Anutu wane qeli ewe zonom, ea wane don kito edange, so qomeene ma ewekke.

⁹ No nei natne ene Paulo wane don mi detkoi, wet dereretene ma waluke more maine mi malip-kakoi, paki, ene Waom wane numa ea borikine rau paki, magu ɛɛane kaiteno qeliɛgoi, ea wane Paulo ene nei ea Yuda lewa lewan urumgo qeliɛ one more, mali malip nei nɛrep ene ɛnɛneka iwenongi, Tiranus wane kibi lewa lewan urumgo kaiwe baɛem ɛnerop lewage, Waom wane don auye qeuye okane gekoi. ¹⁰ Ene koma etke yale lewage don au gekoi, ea wane nei nɛrep korop Asia kepeo gekoi, ene Yuda nei nɛrep so qelaɛ nei nɛrep Yuda ɛadino gekoi, ene korop Waom wane don detwarekoi.

Skewa Wane Gipolekoune Sewen

¹¹ Anutuɛo qesiɛkaki, Paulo ene masi mi ma-maine, togogole ea korop mawareke. ¹² Paulo ene lap lap me takot solaino mageke, ea nei nɛrep ene zoma nei nɛrep ɛɛano ma ariu, eaɛo zomaene waetne mida leleke, so zomaene qeliɛonge, paki asu qotkoine ene ɛɛano ɛine saket qeliɛone

ariko. ¹³ Yuda nei natne ene mo sogino urata nei edo lolike ari more, asu qotkoine esopongoi, ene Yesu wane enetne dere more, ari asu qotkoine Yesu wane enetko esoponikei wane liwekkakoi, ene asu qotkoine iwa yale edangoi, “Na Yesu wane enetko, Paulonjo enane kine ra qelanganmaike, yale waka na don togoleka ra more esopnunmaile.” ¹⁴ Tatinjon sewen, ene nei mane enetine Skewa enane gipolekoune. Skewa ene Yuda wane Mosop Nei Pris Wawaine Suaine mane. Enane gipolekoune ene asu qotkoine ea Paulo wane masi okane esopongoi.

¹⁵ No asu qotkoine mane ene Skewa gipolokoune enane don mange edane rake, “Na Yesu detkamaile, so na Paulo wane kine detmaile, no nane ma?”

¹⁶ Nei ea asu qotkoinerop, ene Skewa gipolekoune ea korop zok manerop engu more yuanonge, so ene ziwem engu so takot laplapene ma barakki, ene nei ea wane matko nane kakakka biririke ket solaeneka arikoi. ¹⁷ Yuda nei nerep so qelanj nei nerep Yuda nadino ene Epeso matko gekoi, ene don kisi ea detpi paki, manerop kaet suaine onge, ea wane nei nerep koropnjo Waom Yesu wane enetine ora ewine manerop kitokoi.

¹⁸ Mali malip nei nerep loutne ene sari more, masi qotkoine makoi, me okangoi, ea korop tingoka didiwo ra qelangan warekoi. ¹⁹ Nei nerep natne ene sogino sunja qare makoi, ene ea wane sunja qare papia, ea ma sari nei nerep kaiteno, papia ea kiwakeu zewareke. Ene papia ea wane lewine takotke dapotpi, so 50 tausen silwa wesi okange.

²⁰ Waom wane zonom so numa tanik manik

yewano yalewa wakone wieke, paki Waom wane donjo togole more manerop sua ze manerop yuane arike.

Epeso Mat Welaine Eje Ukat Suaine Makoi

²¹ Kine kine korop ea wakongi, Asu Koboboineno Paulo wilihaine ma mangi, nadino Paulo ene Masedonia kepeo so Akaia kepeo lolike ari more, Yerusalem zinge ariakane ra more rake, “Na Yerusalem ari more, nadino Roma matko ea wenen ari kaikale.” ²² Yale ra more ene qelit neitkine etke, Timoti so Erastus, ere Masedonia kepeo biraore more, onomka nigatnemde Asia kepeo takotke geke.

²³ Naso yewao, Waom wane numa wane naba gotkoina Epeso matko wakongi, ene ukat suaine makoi. ²⁴ Mat suaine yewa wane anutu isisine lopio mane, enetine Artemis wane bakom urum pake, so nei mane, enetine Demetrius, ene silwa maulukmanke, mat yewao Demetrius ene bakom urumgo lopio nigatne silwano mamage motki metki, nei natne ene qolekoi. Ene yale wa okane more, Demetrius so enane silwa mama urata neikoune ene wesi suaine maratka mankoi.

²⁵ Demetrius ene silwa mama neikoune, ea edoraki lewageu edane rake. “Nine detmami, nene silwa urata mamaine, ea wane nene wesi abonze suaine wakone nebonmaike, ²⁶ no nei iwa Paulono masi kine kine mamaike, ea mo nine nidom maine kamami so detmami, ene ramaike, ‘Lopio nei meteno mamaine, eamo anutu midakaka,’ ene yale ra, nei nerep korop edangi, ene don ea dere malip kamami, iwa Epeso matko nei nerep so Asia

kepeo korop loutne don ea malip kamami, ene lolike don ea ra qelajanmaike. ²⁷ Paulo ene koso takotke, yale nei nerek edaniakeo, nei nerek ene nenane urata iwa ra wetonikei. Naso kutno nei nerek ene anutu lopio nerekpe Artemis, so enane bakom urum ea eweetne mi kitokei, eweetne siukeake. Nei nerek Asia kepe so kepe banem Artemis ewino kito okanmami, no Paulo wane donno yemo nerek waom wane enet binjek matali mo maket bira kayakane okanmaike.”

²⁸ Nei nerek ene don ea dere more, busu suaine lele more kieke boka more, tako rakot yewaka rakoi, “Artemis, Epeso nine ene enet binjekine suaine so wawaine!” ²⁹ Ukat ea sua mat korop rokopke arike, nei etke, enetetne Gaius so Aristarkus, ere Masedonia nine, Paulorop wenen arikoi, nei nerek magu ene nei etke yewa epu warage more, lewa lewan sobego ket arikoi. ³⁰ Paulo ene onom nei nerek magu enane kaiteno ari edaniakane rake, no nei nerek mali malip korop magu yewa edo ma walukkakoi. ³¹ Paulo wane kimakoune natne ene gavaman urata ma gekoi, ene wenen Paulo wano don more lewa lewan sobego mi ari wakoniakane rawetka more rakoi, “Ge lewa lewan sobego misuk arikene!” ³² Pakiso, lewa lewan sobego don ukat suaine wakonge, nei nerek magu suaine, ea ene koropno wet dereretene siuki, qelan qelan qekoi, nei nerek natne ene don mane rau paki, bokakoi, nei nerek magu mane ene don mane rau paki, boka rakoi, no nei nerek wele korop ene kine onoka wane sari lewanmami, eamo mi detluk kakoi. ³³ Yuda nei natne ene nei mane enetine Alekzander, magu

lewine alakane don edaniakane birakau okorake, ʊo ʊei ʊerep natne eʊe Alekzander qebinka rau, so eʊe ʊei ʊerep don edaniakane wetke more metine biraki wake. ³⁴ ʊo magu natne eʊe Alekzanda detkau, eʊe Yuda maguo ʊine okange ea wane magu, ea eʊe koropʊo orodonʊ don wekuka boka, weku yewaka boka okorau awa etke ari qoeki rakoi, “Artemis, Epeso ʊine, eʊe wekukunʊo wawaine!”

³⁵ Yale rau, so mat ware ware mane eʊe wie more, magu ea ʊei ʊerep korop ma peseone more rake, “Epeso welaine, ʊine detpi! ʊei ʊerep kepe banem yewa me yewa enano ʊine maʊo mi detmaike, Epeso mat suaine eamo Artemis suaine enane bakom urum metmaike, so wesi kobekine qeliwo ʊine ketke? ³⁶ ʊei manenʊo eʊe kine kine iwa maine mi bisop kamaike, eso ea wane ʊine ma pese nagu ketpi paki, kine kine yaline kukka mi okanbi, ³⁷ ʊine ʊei iwa ere yaup wane epu iwa sarimi, ere bakom urum wane abonʊ mane kobu mi makoik, me ʊerep waom onʊaine lopioze, enane don qotkoine mane mi rakoik. ³⁸ Demitrius enine so ʊeikoune, eʊe ʊei mane dongo bira kaikeiwo, eʊe maine don urata kot wane nasoine sari dongo birakaikei. Naso yewao don ware ware wane suaine kepe ware ware mane eʊe maine donene mazakane desiake. ³⁹ ʊo ʊine don natne koso payakeo, ea maine lewa lewanʊ wane nasoo lewa lewanʊo makoboeyake. ⁴⁰ ʊene umat maine marat kanem rap, ʊo onoka wane yem ʊedo ukude kawali kieke kaiwe iwao qine, so kine kine ea wane kineine mane koboboine yemo midakaka. Me Roma wane gavaman eʊe ea wane

kineine desikei wane ra qeson ḡonikeiwo, ḡene maine mi ra qelanḡan onikene.” ⁴¹ Mat ware ware ene don yale raki qoeki, biraongi ḡei ḡerep ene arikoi.

20

Paulo Eḡe Masedonia So Akaia Kepeo Arike

¹ Ukat suaine ea qoeki so Paulo eḡe mali malip korop ḡei ḡerep magu ea eḡe enḡano sariu lewanḡei wane edorake, eḡe lewanḡbi, so Paulo eḡe doku tau tau magu wet dereret so mali malipenane don edane more, ḡei ḡerep ma togole onḡe, so Paulo eḡe takotke rake, “ḡine mayakakatne bororom gekei.” Yale ra more, kaiwe maine ebone so mat ea qelige more, Masedonia kepeo arike. ² Eḡe Masedonia lolike kitare ari more, mali malip ḡei ḡerep don edane nan qe more ma togoleonḡe. Urata ea qoeki, so ban Akaia kepeo ari lotkeke. ³ Eḡe Akaia kepeo meso karewe metke. Paki koso eḡe seki ma more Siria kepeo ariakane wetkeke, ḡo Yuda ḡei eḡe Paulo qeu seukeakane rakoi, ea wane Paulo eḡe don ea dere more, Siria numa koboine qelige more, seki mi make, Masedonia kepe kitare Siria zinge ariakane wetkeke. ⁴ ḡei mane, enḡetine Sopater, Pirus wane gipole, Berea matko ḡine, eḡe Paulorop arike, so Aristarkus so Sekundus, ere Tesalonaika matko ḡine, Gaius eḡe Derbe matko ḡine, Tikikus so Tropimus, ere Asia kepeo ḡine, so Timoti, eḡe wenenḡ korop Paulorop arikoi. ⁵ ḡei tego ea eḡe korop alakane Troas matko ari, na so Paulo tomanḡotkoi. ⁶ ḡere Pilipi ari

more, Bret Patpale ea wane soda mere more, seki mane wa more, kaiwe mama mete mane(5), eao Troas matko lotke kimakopse maratonte, nene soda weku kaiwe mama 7 Troas metkone.

Pauloŋo Troas Matko Yutikus Ma Wirikaki Wieke

⁷ Soda ruoo, nene so mali malip magu nei nerek nene ruo nara nekenane lewanŋone, Paulo ene nei nerek don edange, ene kepe qaeki ariakane dere more takotke, nei nerek don edane gemaŋki, ruo kulu kesatno okange. ⁸ Mat yewa, lewa lewanŋo mat wane kutno, ea kiwa loutne lawe okorakoi. ⁹ Nei qaluwit mane, enetine Yutikus, ene mat aŋaone maneo metke, Paulo ene takotke don edane okoraki, so nei ea ene umun turuk mere ari, kulu suaine ŋik ŋototok pa ari more, mat kutno ŋine makake kepo ket qeke. Pakimo, nei nerek ene ket ari more, solaine ma wie ka more rakoi, “Ene mo seukike.” ¹⁰ No Paulo ene ket ari more, oŋomka pareŋine kutno ket rasu masatka rake, “Ŋine dere mezet misuk desikei, ene mo wisikae gemaŋke!” ¹¹ Yalewa ra more, mat kutno zinge wa more, ruo nara mapoke neke, Paulo so nei nerek ene takotke don au metpi, so kepe qaeki Paulo ene nei nerek qeliŋone more arike. ¹² Nei nerek ene nei qaluwit ea matino iwenka arikoi. Ari more, wet pesek suaine detkoi.

Paulo Ene Troas Mat Qelige More Miletus Arike

¹³ Nene seki ma alakane Troas wa more Asos matko Paulo marat kaikenane arikone, ene kienŋo Asos ariakane nedange, ea wane nene sekiwo wakone. ¹⁴ Paulo ene nene Asos maratŋone

more, seki kutno waki so nenzarek Mitilini matko arikone. ¹⁵ Nene Mitilini qelige more, qaeki Kios sia osino lotke more, Samosi sia osino qe yuanka more, kaiwe maneo Miletus matko lotkekone. ¹⁶ Yewao Paulo ene rake, “Naso midamaike, nene Epeso matko so Asia kepe maine qe yuan ore, yewa mi mesikene.” Ene Yerusalem ikopka ari more, Asu Koboboine alakan ketke, peada kaiwe eao lotkeakane rake.

Paulo Ene Epeso Mali Malip Magu Yai Ososok Don Edange

¹⁷ Nene Miletus matko lotkekone, pakimo Paulo ene don motki, Epeso matko arike, ene doku tau taune magu enane nenejo enano sarikei wane don motke. ¹⁸ Pakimo, nei suaine ea ene sariu so Paulo ene edange, “Na ninerop naso korop Asia kepeo gekole, na kine kine makole, ea nene kakoi, nene nanane gege masi detlukmami. ¹⁹ Na Waom wane qelit qeqe urata makole, naso natne urata ea wane na arokkole, na masi wawaine mi makole, Yuda nei ene wikile ninikei wane detkoi, ea wane na dere mezet detkole, paki nae enet binjek maket more, so Waom wane urata koboine makole. ²⁰ Na matnine kotino, so mat suaine lewa lewan sobego kito nibongole, na kaet midaine didi kebago Waom wane don korop njidangle, ea nene mo detmami. ²¹ Na Yuda nei nerep so qelan nei nerep Yuda nadino girem don togole ra edangle, ene sotene nadekka more Anutu wano zinge ari more, Waomze Yesu malipkaikei wane. ²² So iwa detpi, naso iwa na Asu Koboboinane luknangi enane don teweke Yerusalem arimaile, na kine

kine Yerusalem yewao dalino wakon naniake, ea mi detmaile. ²³ Asu Koboboine enje girem don iwa yaleka mat lotkekole rokop nolatke, nei njerep mat banem enje wikile nine more mulap urumgo birananikei wane toma nanmami, ea na detmaile. ²⁴ No, na gekaleo, me seukkaleo, ea wane dere mezet mi okanikale, midakaka na numa kine kine mo mogare arimaile, yemo Waom Yesu enje na miti urata makalane ra ninge, 'Anutu enje nei njerep mosop oniakane rake, don kisi maine, ge nei njerep don ea edanikene.' Na urata ea ma warekalane ramaile.

²⁵ "So mane rewe detpi, na njinane keu njino Anutuño daleo wareñonmaike, ea wane don ra qelañane more, keu njino gewe nangoi, njine ban koso mi nanikei, ea na detmaile. ²⁶ Eso na njine ukude togoleka ra njidanmaile, nei mane njinane keuo njine enje gege togon mi marat kayakeo, ea nanane sot mida, ²⁷ ea wane Anutuño kine kine mayakane detke, ea korop na kaet midaine njidan warekole. ²⁸ Njine njidomka mauluke ware nagu more, magukop njine yalewaka mauluke ware-onikei, njine Asu Koboboineño enjane ware ware birañingane, njine Waom wane magu wenjemineno kiatonge, ea kauluke more wekumaneka gekei. ²⁹ Na mo detmaile, na ban birañunbe, zikotne kasi zubaine njeterop sari more lama magu mali malip korop maine mi lolonone more mi seseonikei, magu matali onikei wane sarikei, ea na detmaile. ³⁰ Boan naso bomileki, nei natne njinnine maguo njine enje isi don rau paki, miti don matali more, mali malip magu edane isionbi, so enje enjane numa isisine ea mogatkakei. ³¹ Ea

wane n̄ine kauluke more diam̄jinerop gekei, na korop, koma karewe, ruo kaiwe welaine welaine aroke more girem n̄ida n̄idan, eamo mi qeligewe ketke, n̄ine ea wane wenen̄ dere gekei.

³² “Eso iwa mo anutu wano biran̄unbe paki, wet maep so qom menan̄go Anutu en̄ine donino maguk n̄unmaile. Ene zonom welainen̄o nau tomok maine ma n̄iboniake, so ban̄ ge mage, wet dereret koboineka mo ebu ebune, yewa en̄erop qeli wane awa abon̄ maine ea qe watke n̄iboniake.

³³ Na n̄ei mane wane silwa so gol, wesi abon̄ine mane mi maikalane detkole so okan̄jungole.

³⁴ Na meteretkene iwan̄o urata ma more yeye maratkakole, na seli kise urata ma gekole, yale waka na so kimakopne, n̄ene n̄ara abon̄ makone, ea n̄ine detmami. ³⁵ Na n̄ine sikan n̄ungole, n̄ene urata togole ma more, n̄ei n̄erep zonomene midaine mapit onikene, ea wane Waomze Yesu en̄e rake, ‘N̄ei mane en̄e kimaine bakom mane maniakeo, n̄ei yewa en̄ane bakominen̄o ki-mainane bakom yuankayake.’ Don ea n̄ine det-sorokkei.”

³⁶ Paulo en̄e raki qoeki, so wawetine qe more, n̄etne magu yewa en̄erop men̄en kake.

³⁷ Men̄enkau qoeki, so Epeso mali malip magu wane n̄ei suaine en̄e aroke garika lulu kiki more, oso waek okanka more birakakoi. ³⁸ Ene koso manerop Paulo mi kaikei wane rake, ea wane en̄e qom borik zok suaine detkoi, ea wane en̄e Paulo iwenka sekiwo arikoi.

21

Paulo En̄e Yerusalem Arike

¹ Nene oso waek okanone more, biraŋonbi arikone, ɲene kiwet namuŋ mane koboine kitare more, Kosi sia qe yuanka more, kaiwe mane Rodes sia qe yuanka more, Patara matko lotkekone. ² Nene seki mane Ponisia kepeo ariakane okangi, maratka more wa arikone. ³ Nene ari mage Saiprus sia ka more, zinge raiwoken ari Siria kepeo lotke more, Tire matko qalakko ket ari more so seki wane welaine ɲe aboɲene yewao qakakoi. ⁴ Nene mali malip ɲei ɲerep natne maratone more, ɲerop soda weku gekone, Asu Koboboine ɲe zonomineɲo ɲei ea qebinongi, so ɲe Paulo olatkoi, “Ge Yerusalem maine mi arikene.” ⁵ Nene ɲerop gekone, naso ea qoeki, so ɲene numaze Yerusalem arikenane biraongone, ɲe korop ɲei so ɲanowekopene so medewekopene ɲenerop mat suaine qeliŋka arikone, ɲene korop qalakko ari wawetze qe more meɲen kakone. ⁶ Nene oso waek okan nagu biraone more, seki kutno waɲem so ɲe mateno zinge arikoi.

Propet Agabasɲo Paulo Don Olatke

⁷ Nene Tire qelige more ari mage, Tolemes matko lotke more, mali malip ɲei ɲerep maratone, more kaiwe weku ɲerop metkone. ⁸ Kepe qaeki, ɲene Tolemes qelige ari mage, Sisaria matko lotkekone. Yewa ɲene ari qelit ɲei Pilip wane matko gekone, sogino Yerusalem mali malip magu ɲe ɲei sewen magu miti qelit urata maikei wane ma wakon ongoi, Pilip ɲe ɲei sewen yewa ɲane keuo ɲine, ɲe Waom wane don kisi maine ra qelaɲan mageke. ⁹ Pilip wane

borasokoune natewen etke so etke eɛe Anutu wane miti don ra qelaɛaɛ maɛkoi. ¹⁰ Nene yewa kaiwe natne gekone, naso yewao propet mane, eɛetine Agabus eɛe Yuda kepeo ɛine sari lotkeke.

¹¹ Eɛe ɛenano lotke more, Paulo wane waro ma more, wa oɛomka kie metine pise wokom nagu more rake, “Asu Koboboine eɛe iwa yale ramaike, ‘Yerusalem matko Yuda ɛei edo waro iwa wane welaine baɛ iwa yale wokomka more qelaɛ ɛei ɛerep Yuda ɛadino eɛane meteeno bira kaikei.’ ”

¹² Nene so natne yewa, ɛene don ea dere more, Paulo eɛe Yerusalem mane mi ariakane rawet kakone. ¹³ No, eɛe mainge rake, “Nine daleo okanmami, ɛine yale okanbi paki, qomne qepokmami? Na mo ewekmaile, Yerusalem matko wokom nangei waneka mida, yewa Waom Yesu wane ra more seukkalane weneɛ ewekmaile.”

¹⁴ Nene eɛane dereretine maine mi maingekone, eso yeine qelige more rakone, “Waom eɛine simile eaka maine wakoniake.”

¹⁵ Nene yewao naso natne ge more, aboɛze mauluke more qelige Yerusalem arikone, ¹⁶ dokoine natne Sisaria ɛine eɛe ɛenerop arikoi, ɛei yewa eɛe ɛene Nason wane matko gekenane iwenɛongoi, Nason eɛe mo qei mikepka yewao naso kiroroine Waom malipkake, ɛei ea eɛe Saiprus siao ɛine.

Paulo Eɛe Yakop Ari Kake

¹⁷ Pakiso, ɛene Yerusalem matko lotkekone, yewao kimakopze mali malip magu eɛe bakom kito ra iwenɛine ari more mauluk ɛongoi. ¹⁸ Kepe qaeki, Paulo eɛe ɛenerop Yakop kayakane arike,

mali malip magu nei suaine koropŋo yewa metkoi. ¹⁹ Paulo eŋe nei korop kaiweo ebonwareke, paki Paulonŋo geki Anutuŋo yeye kine kine qelanŋ nei nŋerep Yuda ŋadino eŋano make, ea wane don korop edan wareke. ²⁰ Eŋe Paulo wane don dere more, ŋado eŋe korop Anutu mawaka more bakom kitokakoi. Pakiso, eŋe Paulo olale rakoi, “Paulo kimaze, Yuda nei nŋerep tausen loutne eŋe Yesu detluk kamami, so eŋe korop Mose wane ra rokop don wenenŋ togogle magemami. ²¹ Nei natne eŋe sari geŋane ra more, don borikine Yuda nei nŋerep iwa yale edane rakoi, ‘Paulo eŋe Yuda nei nŋerep, so qelanŋ Yuda ŋadino eŋe iwa yale kito ebonmaike, “Ŋine maine Yuda gege masi qelinŋ warekei, ŋine gipolekopŋine solaene mi kitasikei.” ’ Geŋane yale ra more edangoi. ²² Ge iwa lotkemaine, wane eŋe desikei, paki eŋe onoka mau wakoniake, ea ŋene mi detmaine. ²³ Ge iwa yale maikene, nei etke so etke iwa eŋe Anutu wane kaitko ra togolekoi, ²⁴ ge eŋerop Anutu wane Bakom Urungo ari more, Anutu wane kaitko sauke more, eŋe kine kine Anutu wane Bakom Urungo mamami, ea qolekene. Pakiso, nei yewa eŋe eaŋo lewetene zoune kitat nagu ware pudi setneka mesikei, pakiso nei nŋerep eŋe ge Yuda wane masi mamaine, ea ka more detlukkei, eŋe geŋane ra more kine kine sogino detkoi, ea detpi isi don okaniake. Pakiso eŋe desikei, ge Mose wane ra rokop don mogat kamaine, ge mi yuanmaine, ea desikei. ²⁵ No qelanŋ nei nŋerep mali malip Yuda ŋadino ŋine eŋane ra more, ŋene kibi mane mo eŋano

qe more, iwa yale edangone, eɲe anutu isisinane soe soep mire neu, ɲine misuk nekei. So eɲe wenjem neu, ɲine misuk nekei. Me osom ebine mapokeu seukki, ɲine ea misuk nekei, ɲine ɲao ɲanom numa ea misuk matali more, wenip yau yaup maikei, ea qelingei.”

²⁶ Yale rau qoeki, so Paulo eɲe ɲei etke so etke ea Anutu wane Bakom Urum wane sengo iwenongi, so eɲe ɲei ɲerep korop so Anutu wane kaitko saukko. Pakiso, Paulo eɲe Anutu wane Bakom Urumgo waket more, sau sauk naso dango qoeake, so naso dango bakomene kitokei, ea wane edaniakane arike.

*Roma Kawali ɲei Eɲe Paulo Togole Malip-
kkakoi*

²⁷ ɲo Paulo wane sau sauk kaiwe sewen ea bomile sari qoeakane okangi, so Yuda ɲei natne, Asia kepeo ɲine, eɲe Paulo Anutu wane Bakom Urum koto ka more, ɲei ɲerep magu qebinonbi so eɲe Paulo meto puk makoi. ²⁸ Paki boka rakoi, “Israel ɲei, ɲine mapik ɲonikei! ɲei iwa eɲe kepe banjem lolike ge, Yuda ɲei ɲerep so qelan ɲei ɲerep wenen iwa yale edane okanmaike, ‘ɲine Yuda ɲei ɲerep so Mose wane ra rokop don ea misuk desikei, so Anutu wane Bakom Urum ea wenen ma baikka okanikei’ Yale raki paki, so eɲe qelan mane Grik ɲei Anutu Bakom Urumgo iwenka wamaike, ea wane Bakom Urum maki sigilemaike.” ²⁹ Yuda ɲei eɲe Paulo so Tropimus, Grik ɲei, Epeso ɲine, ere mat suaino ottoi, ea wane eɲe Paulo wane wetke rakoi, eɲe Grik ɲei Anutu wane Bakom Urumgo iwenka wamaike, eɲe yale dere more, don ea rakoi.

³⁰ Nei n̄rep mat suaino n̄ine eñe korop ukat suaine ma more, boka rama rama so nat nat n̄ine biririke sari, Paulo ma more, Anutu wane Bakom Urumgo n̄ine waraŋka q̄einaŋ ketkoi. Paki yewaka n̄ei man̄eño Anutu wane Bakom Urum wane madet kitoke. ³¹ Nei n̄rep magu eñe Paulo q̄eu seukkeakane detkoi, n̄o Roma kawali n̄ei eñane n̄etne eñe don kisi mo esatka iwa yale detke, Yerusalem korop eñe busu okane more, kawali yau yaup maikei wane okanmami. ³² eñe yewaka ikop dere more, eñine kawali n̄ei n̄etne so kawali n̄eikoune edorake, paki eñe sariu korop q̄ebinongi, magu keuo ket arikoi, ari onbi, n̄ei n̄rep eñe yale waka kawali n̄ei n̄etne so n̄eikoune one more, n̄ei eñe Paulo q̄ekei wane zok okangoi, ea mi q̄ekoi, yeine q̄eliŋkakoi. ³³ Kawali n̄ei n̄etne eñine so kawali n̄eikoune eñe Paulo ma more, n̄eikoune eñe Paulo mulap etkeño wokom kaikei wane edange. Pakiso, eñe n̄ei n̄rep q̄eson one rake, “N̄ei iwa ma? Onoka mamaike?” ³⁴ Nei n̄rep natne eñe don mane olatkoi. Nei n̄rep magu mane eñe don kine mane olatkoi. Ukat suaine yale wakone paki, ea wane kawali n̄ei n̄etne, eñe kine kine wakonge, ea wane kine mi marat̄kake. Paki eñe n̄eikoune kawali n̄ei wane matko Paulo ma arikei wane edange. ³⁵ Paulo eñe ari mat tiriino lotkeki, kawali n̄ei eñe onbi, n̄ei eñe zonomene wieke, Paulo q̄ekei wane sariuso, kawali n̄ei eñe Paulo ma mat ea wane tiriwo tewekka wakoi. ³⁶ Nei n̄rep magu suaine eñe mogatone ari more, togoleka boka rakoi, “Q̄eu, yeine seukep!”

Paulo Eje Nei Nerep Magu Enano Kine Ra Qelaŋange

³⁷ Kawali ŋei eje Paulo enjine matko birakaikēi wane ma ariu, so Paulo eje kawali ŋei ŋetne Grik dongoka olatke, “Na maine don natne golasikale?”

Kawali ŋei ŋetne eje qesonka rake, “Ge Grik don maine ra okanmaine? ³⁸ Na detmaile, mo sogino Ezipt ŋei manenjo kawali qeakane okane more, kawali ŋeikoune foa(4) tausen ebuki, kepe yaup papaino arikoi, paki mo ge ŋei yewa me ge ŋei mane?”

³⁹ Paulo eje mainge olale rake, “Na Yuda ŋei enjane tego, Tarsus matko Silisia kepeo wakongole, na mat ewinerop mane wane welaine. Detnannom na ŋei njerep maine edanikale me?”

⁴⁰ Yale raki, so kawali ŋei ŋetne eje rake maine. Rakiso, Paulo eje tiri kutno okora more, ŋei njerep tik okorakei wane metinenjo ma wie mazoponge. Mazopongi, tik okorauso, Paulo eje Hebru dongo edange.

22

Paulo Eje Wetine Maingeke Ea Wane Kisi Rake

¹ “O, ŋei kimakopne so magakopne, njine detpi, na ukude iwa njinane kaitjino don turunine main gemaile, na sot mane mi okanile.” ² Pakiso eje detkau Paulo eje Hebru dongoka don raki eje mepeene qeeki, anjane kiwonege tik njanenka don mane more, kokpak mi makoi, paki Paulo eje koso iwa yale rake.

³ “Na Yuda naganenjo Tarsus matko, Silisia kepeo yewao neuke, paki na iwa Yerusalem mat suaine iwao kibi medep neu sariu sua more, Gameliel wane kibi urumgo wakole, pakimo ene aso njabokopze enane ra rokop don tego yewa korop kito ninwareke. Pakimo njine ukude iwa Waom wane don mogare gemami, yalewaka na iwa manerop zok togole more mogat kakole. ⁴ Na sogino mokaka, Waom wane numa musele iwa malipka more mogatmami, ene matali onikalane urata suaine zok manerop makole. Paki na nei njerep korop engu more, lukone ebu ari mulap urumgo bira onikalane urata togoleka ma gemaŋkole. ⁵ Pris wawaine njene ene so nei njene enane kaunsol korop, ene det waremami, edo maine ea wane don ra qelanŋanbi njine desikei, na don welekatne njidanmaile, ene kibi mane Damaskus doku tau tau kima natne gemami, enane qe ninbi Damaskus ma arikole, nei njerep mat yewa wane kotino numa iwa so mali malip korop, yewa enane tego ene mat yewa gekoi, na nei njerep yewa ebu lukone more, peik one more, iwa Yerusalem matko ebu sariwe, nei suaine edo kine kine umatne so wikile, ene umatene ea wane rokop ebonikei wane arikole.

⁶ “Na arimage, 12 kilok kaiweo Damaskus osino lotkekole, pakimo ikop yewaka kiwa qelanane suaine mane qeliwo njine ket nanjano qelanane more loliknange, ⁷ paki na yewaka ket kepo rasu more, pa detpe, anja don manenjo iwa yale nora nolatke, ‘Saul, Saul, ge onoka wane na matali qetali okan nanmaine me?’ ⁸ Pakimo na don turunine iwa yale main gekole, ‘Ge manjo Waom?’

Paki enje na nolale rake, 'Na Yesu, Nasaret welaine, ge na matali nane more, urata ea mage-maine.' ⁹ Nei narop gekoi, enje qelajan ea kakoi, ŋo enje nei yewano nolatke ea enje mi detkoi.

¹⁰ Pakimo na rakole, 'Waom Suaine na ukude iwa dalino okanikale?' Raweso Waomŋo nolale rake, 'Ge wie more Damaskus matko arinom paki, mat yewao nei mane metmaike, oŋo geŋane urata don biŋek kine kine korop motkale ea golasiake.'

¹¹ Qelajan yewa yemo zok manerop qelajane teine, yale wane na dene mupkeki, kine mane deneno maine mi kaulukkole. Na yale okanbe, naŋane kimakopne enje meteno mau Damaskus matko arikone.

¹² Pakimo nei mane yewa Damaskus matko geke, enjane enetine Ananias, enje miti nei mane, oŋo ra rokop numaze ea teweke mageke, pakiso Yuda nei Damaskus gekoi, enje korop enjane detpi waki, ewine kito ramanŋkoi, enje nei maine.

¹³ Enje naŋane osono sari okoraki paki nolale rake, 'Kiman Paulo, deŋone koso manerop potnom.' Raki nasomde yewaka wenenj dene koso ikopka menanŋi potkole, pakiso enjine kakole. ¹⁴ Pakiso enje rake, 'Aso ŋabokopze enjane Anutuŋo ge enjane simile detnom paki, Qelit Neine Koboboine ge more, enje kaikenane, so oŋo makoboe gangi detkanom, enjane aŋa donineŋo rayakane oŋom ma wakonganike.

¹⁵ Wane ge baŋ enjane tanik manik onokaka ge iwa kawaremaine so det waremaine, ea wane don kisiine nei ŋerep korop ra qelajane edan warekene. ¹⁶ Ea wane, ge onokawane koso naso kiroine iwa tomakene? Ge wie more miti doku taunom paki, enetine

oranom, mo eñe borikinenhone ea saukgane more, sotñone ea sauk ganiake so ma biraki ariake.’

Anutu Eñe Paulo Ma Birakaki Tego Natne Enjano Arike

¹⁷ “Nado na Yerusalem zinge sari more, Bakom Urum suainane kotino wa menen kakole, so na kine kine me tanik yewa mo kulu kuluo yale kakole. ¹⁸ Na kawe so Waomño nolale rake, eñe yale nolatmai, ‘Esat! Ge wienom paki, Yerusalem mat iwa qelige arinom, onoka wane, ño ñei ñererop iwa eñe ban ge nanane don kisine ra edanikene, yemo eñe maine mi desikei.’ ¹⁹ Pakiso na rakole, ‘Waom, eñe mo detluk waremami, na Yuda lewa lewan urumgo korop arimanakole, so detmami na sogino miti urum korop yewao ari lolike more, ñei ñerep ge malip gane gekoi, ea korop ebu lukone morapño dime one more, mulap urumgo biraongole. ²⁰ So mokaka eñe geñane sigi maep rara ñeñone Stiwen qeu seukke, naso yewao na nonom yewa osino wenen okora more, wet pese dere simin nangi, na momo takot kakiene suaine, ea wareka okora more onbe, eñe qeu seukke.’ ²¹ Raweso, Waomño nolale rake, ‘Arinom, onoka wane na ban biraganbe, ge abaran numa kiroine qelan tego mane enjano arikene.’ ”

Roma Wane Kawali Ñei Netne Oño Paulo Warekake

²² Yuda ñei eñe Paulo wane don detkoi, naso yewao Paulonjo don edane ari mage ñei ñerep abaran ñine kepe kiroino gemami, enjane raki, Yuda ñei eñe enjane don wane bauene waki, don

togoleka kuroge rakoi, “Qeu seukkep! Nei yaline enje koso mi takotke geake. Enje geakane rokop mi okanmai!” ²³ Enje yau yaup boka kuroge ra ari sari okane more, momo takotene suaine ea ma qalin qalin kitou paki, kito qokke qakeu, yau yaup ariki, so lube lube, ea ma abarage qakeu wetela qeliwo wake. Masi tanik yewa okangoi, ea iwa yale, qe wakonge, enje Paulo wane zok mi onge. ²⁴ Ea wane kawali ware ware netne suaineno raki, enje Paulo kawali nei enane mat koto ma waketkoi, pakimo enje morapno dime ka more kineinane qesonkakoi, so kawali nei netne enje det lukeakane kawali nei edane rake, nei nrep enje kine onoka wane Paulo wane nabaka more wet gerep so don aro suaine boka more, Paulo yale okankamami. ²⁵ Pakimo enje morapno dime kaikei wane, Paulo kie metine wokomkakoi, paki kawali nei ware ware netne enje Paulo, wane osino okoraki, Paulono iwa yale ra qesonkake, “Me ra rokop donno yale ramaike, nine Roma nei mane yalewa maine okankaikei me? Nine na dongo mi biranane more, mo nine na yaupka dime nanimi, masi tanik yewano mo maine okanmai me?”

²⁶ Kawali nei ware ware netne enje don yale dere more, enje ari kibi qeqe netne olale rake, “Ge daline okan kaikene? Nei yewa enje Roma nei.”

²⁷ Rakimo kawali ware ware netne suaine enje Paulo wano sari more olatke, “Ge nolatnom, ge Roma nei wele me?”

Paulo enje rake. “Eamo don welekatne.”

²⁸ Kawali ware ware netne suaine enje rake, “Na wesi lewine suaine zok mo bira sa mage more,

Roma ñei okanmaile.”

Paki Paulonjo rake, “Na yemo midakaka, na mo nabokño ea ñei ge more neuke, ea wane na Roma ñei okanmaile.”

²⁹ Ea wane ñei eñe dimeka more qesonkakei wane okangoi, eamo kawali ñei eñe yeine yewaka kaet okane more qelingoi, pakimo kibi qe qe ñetne suainjo Paulo eñe Roma ñei, yale dere more, seinjo mo wokomkakei, wane rake, ea mo eñe yaleka zok kaetkake.

³⁰ Kawali ware ware wane ñetne suaine eñe Paulonjo umat ea ma umatne mane okangi, ea wane Yuda ñetne eñe dere worik kakoi, yewa wane kine desiakane, ñado ban kaiwe maneo Paulo wane sein kitoqok kaki paki, eñe don motki miti mosop, pris ñetne suaine so Kaunsol korop eñe sari lewanjo, pakiso eñe Paulo ma ket eñane kaitko birakaki okorake.

23

Paulo Eñe Yuda Kaunsol Eñane Kaitko Don Rake

¹ Paulo eñe deine togoleka Kaunsol eñano koboinaka potki ariki okora more iwa yale rake, “O kimakop Israel ñei, nanane gegene korop Anutu wane kaitko pa sari mage, ukude kaiwe mama iwa okanmaike, yemo nanane wetne zok manerop mayakatneka okanmaike.” ² Eñe yale raki, mosop ñei ñetne suaine Ananias eñe Paulo wane osino ñei okorakoi, eñe piine ma wakonka more rasu pelekkei wane edange. ³ Pakiso Paulonjo olale rake, “Anutunjo ge welekatne ban gekuyake. Ge borikine mama! Ge iwa mere

ra rokop donŋo ramaike, ea mogare na dongo birananmaine, ŋo siluŋ ge ra rokop don ea qe barake more, nekukei wane edanmaine!”

⁴ Paki ŋei Paulo osino okorakoi, eŋe rakoi, “Ge Anutu wane mosop ŋei Pris Wawaine so ŋetne suaine ea, ge don borikine yalewa onoka wane zok olatmaine me?”

⁵ Pakimo Paulonŋo rake, “O kimakopne ŋei iwaŋo, Israel ŋei, Pris wawaine me eŋe mosop ŋei, ea na mi detkele, welekatne na mo don qotkoine olalile, mitiŋo yale ramaike, ‘Ge ŋei ŋerewekopŋone eŋane ware ware, ea don borikine misuk olasikene,’ ea yemo na detmaile.”

⁶ Yewao Paulo eŋe mo detonge, magu natne eŋe Sadusiŋo Kaunsol, ŋo natne eŋe Parisi, yalewa wane eŋe Kaunsol eŋano iwa yale boka rake, “O kimakop Israel ŋei, na Parisi, na Parisi eŋane medep. Na iwa dongo bira nanmami, yemo onoka wane, na mo detlukmaile, yemo ŋei seu seune eŋe baŋ wisikae wiekei, na ea rawe, eŋe kine yewa waneka na iwa dongo birananmami!”

⁷ Paulo eŋe don yale raki, eaka Parisi so Sadusi keueno ŋaba wakongi, so lewa lewaŋene ea wirike. ⁸ Sadusi edo ra okanmami, ŋei seuseune eŋe koso maine mi wisikae wiekei, so aŋelo me Asu mane mi gemami, ŋo Parisi edo yemo don karewe yewa eŋe koropka wenenŋ malipka more qesiŋka ra okanmami. ⁹ Ea wane eŋe boka kuronŋ manerop zok okangoi, pakimo ra rokop tego wane dereret ŋei natne, eŋe Parisi eŋane tego, eŋe don togole iwa yale ra togole rakoi, “Nene ŋei iwa kaŋem, eŋano umat mane mi pamaike, eŋe

asu mane me anelo manenjo welekatne don mane mo olalike!”

¹⁰ Pakimo sori sorin suaine ea wakongi, kawali ware ware netne suaine, ene tego etke yewa ene Paulo ma nat nat so waran naku rakakkau seukeake, ea wane ene kaetkake, paki ea wane ene kawali nei magu edangi, ene ket Paulo ma more, magu etke yewa enane meteenon neine kawali nei ene enene mat koto ma wakesikei wane edange.

¹¹ Pakimo, ruoo Waom Suaine ene sari Paulo wane osine okora more olatke, “Ge togole okoranom! Ge kaet mi okannom, ge nanane don kisine yewa togoleka Yerusalem matko ra qelananine rokop, yale waka don kisine iwa Roma yewao ra qelananikene, Waom suainenjo yale ramaike.”

Yuda Ene Paulo Qeu Seukeakane Don Ra Matogolekoi

¹² Kepe qaeki, Yuda ene koso lewage more, don rau weku okangi, ma togolekoi, so ene rakoi, “Welekatne suainane kaitko, nene Paulo qenem seukeake, no nene ene mi qenem seukeakeo, nene nara doku mi nekene.” Ene yalewa ra togolekoi. ¹³ Nei ene suainane kaitko more don yale ra tagolekoi, nei magu yewa enane zale 40 yuankake. ¹⁴ Ene ari mosop nei Pris netne suaine so nei sele enano rakoi, “Nene don togogole weti suainane kaitko ra matogolemaine. Nene nara doku mi nekene. Nene yaupka qenem ari mage, naso Paulo qenem seukeake, yewao qoeake. ¹⁵ Ea wane Kaunsol neine don rau, ukudeka kawali

nei netnano ariki, eɲe Paulo ɲinano maket birakayake. ɲine olale isika raikēi, ɲene Paulo wane kineine manerop koso det kaikene. ɲene mo eweke metmaine, eɲe sari ɲinano mi lotkeki, eaka ɲene ɲeɲem seukeake.”

¹⁶ ɲo Paulo wane barine eɲine kiarinane gipole eɲe detongi, eɲe don yalewa rau paki, numao mode metpi, Paulo sariki ɲeu seukeakane tomakakoi, ea wane barine eɲe ari kawali ɲe eɲane mat koto waket ari, Paulo olatke. ¹⁷ Pakiso, Paulo eɲe kawali ɲe ɲetne mane ora more rake, “Medep iwa kawali ware ware netnano ma arinom, eɲe don mane ma gemaikē, ea olatkep.”

¹⁸ Pakiso, kawali ɲe ɲetne eɲe kawali ware ware ɲetne suainano iwenka ari more rake, “Mulap ɲe, Paulo eɲe nora more raki, medep iwa ɲeɲano iwenka sarimaile, eɲe don mane magemaikē, ge golasiakane.”

¹⁹ Rakiso, kawali ware ware ɲetne eɲe medep yewa metino ma waraɲkaki, ere wazaino arikoik, eretneka yewa mere more, so eɲe qesonkake, “Ge onoka don na nolasikenane?”

²⁰ Pakimo medep yewa eɲe rake, “Yuda eɲe don mo ra ma togolimi, eɲe doninane kine manerop okora qesonka det lukkei wane raikēi, yewa yemo isi more ge qeson ganbi, ɲaeki Paulo Kaunsol eɲano iwenka kesikene, paki mo eɲe Paulo qekei, ²¹ ɲo ge eɲane don ea mi dere mogasikene, eɲane ɲe natne zalene 40 yale okanmaikē, eɲe mo suaine weti qeliwo eɲane kaitko, ɲara doku mi nene gekei wane ra togolimi, eɲe yaupka gewa mageu, naso Paulo ɲeu seukki yewao qoeake, paki eɲe mo eweke more numao modemami, so

ene goŋo eŋane don yewa maine okkene me, ene ea wane toma metmami.”

²² Ea wane kawali ware ware ŋetne ene medep yewa birakaki arike, paki ene iwa yale rawetkake, “Ge don iwa naŋano rawakonine, ea koso ŋei mane misuk olasikene.”

Kawali Ŋei Ŋetneŋo Paulo Kepe Ware Ware Suaine Piliks Wano Birakaki Arike

²³ Kawali ware ware ŋetne suaineŋo ware ware ŋetne etke etora more rake, “Ŋire kawali ŋei 200 ebukeik, so ŋei 70 yale horsi kutno mesikei, ŋo ŋei 200 ene tebe bozam makei, paki ŋine eweke more 9 kilok ruoo Sisaria arikei. ²⁴ Ŋine horsi natne Paulo ene ea wane kutno mesiake, ea wane mane ma wakongeŋi paki, so ŋine wekumane mauluke wareka, maineka iwenka kepe ware ware ŋetne suaine Piliks wano ma arikei.” ²⁵ Rakimo kawali ware ware ŋetne suaine ene kibi mane iwa yale qeke,

²⁶ “Na Klodius Lisias noŋo kibi iwa qewe, ŋei suainano arimaike, kepe ware ware ŋetne suaine Piliks, kaiweo. ²⁷ Yuda ene ŋei yewa malipka more qeu seuakeane okanbimo, na detkawe ene Roma ŋei okangi, ea wane na so kawali ŋei ŋene weneŋ eŋano sari more eŋane meteo ŋine ebu mamaine. ²⁸ Na don yewa ŋei yewa wane solaino qe rakoi, ea wane kine desikalane ra eŋane Kaunsol wane kaitko ma ketkole. ²⁹ Na ea wane geson onbe, ene ra rokop don tego wane don natne ea nolatkoŋi, ŋei edo ŋaba don natne eŋano qeu arike. Ŋo ene don mane koboine nolale more, kine

ea wane ra more qenem seukeake, me mulap urumgo birakaikene, yale ra more don kinerop mane mi nolatpi detkole. ³⁰ Pakimo, ene nei yewa qeu seukeakane don mane mo sanku ra matogolimi, don ea ukude sari nanane ketko ketki, ea wane na esat birakawe genano sarimaika. Pakimo, na rawe nei yewa enane solaine don qe rakoi, ene genane kaitko don koboine ra qelanambi, ge desikene, ene kine onoka wane dongo birakamami.”

³¹ Papiango yale rake, ea wane kawali nei magu ene don ea teweke more, Paulo ruoo Antipatris wano iwenka arikoi. ³² Kepe qaeki so, kawali nei magu ene zinge koso mateno arikoi, paki horsi nei kutno metkoi, edoka Paulo iwenka more Sisaria arikoi. ³³ Nei horsi kutno metkoi, ene ari Sisaria lotke more, kibi yewa kepe ware ware netne suaine ene mane more, Paulo wenenj ma sari qeu kaitino wa okorake. ³⁴ Kepe ware ware netne suaine ene kibi yewa dapore ka more, Paulo ene kepe diawao njine ea wane qesononge, qesone more rake, “Ge ma provins njine?” Paki Paulo ene rake, “Na Silisia njine.” ³⁵ “Na ban neiwa solanono don qe remi, ene sari lotkeu mo, genano njine don desikale.” Yale ra more rake, “Njine Paulo lukkau paki, gavaman Herot wane matko biraka more warekau metkep.”

24

Yuda Netne Ene Sisaria Matko Paulo Dongo Birakakoi

¹ Kaiwe mama mete mane ari qoeki, nado mosop nei Pris Wawaine, Ananias ene so Yuda nei sele natne so numa mot mot nei mane, enetine Tertulus, ene wenen Sisaria arikoi, paki ene ware ware Piliks wane kaitko wakone more, Paulo dongo birakakoi. ² Roma gavaman wane kepe ware ware, Yuda kepe wane netne suaine, Piliks ene Paulo oraki sariki, Tertulus ene kieke more, don urata Paulo solaino qe more, qesat don olale rake,

“Nei suaine ware ware Piliks, goŋo mo mapik ŋonom, nene met met weku mane maratka peam maine gemaine, kawali kine kine midakaka, ge dereretŋone weku mane, ge nenane tego ea qesŋone more, kine kine korop makoboe warekone, sogino mat korop ea bori worine pake, ³ ea wane nene qom menaŋ suaine zok marat kamaine, paki mo nene bakomŋone kitomaine. ⁴ No na naso kiroine zok mi mawaluk ganikale, na ge qeson ganmaile, ge nene wet maep okanŋone more, donze bomitne iwa det nannom. ⁵ Nene nei iwa kaŋem, ene umat loutne zok ma wakon-maika, ene Yuda keueno naba naba okane more, kawali ma wakongi, Yuda mat korop so kepe korop, nei iwa ene netne ma kisaŋgi, nenane magu yewa ma mapok onbi, tego mane okane gemami, magu yewa ene enetene Nasaret edoramami, enane netne. ⁶ Ene yaleka Bakom Urum maki di kitoyakane okangi, so nene malip kakone, pakiso nene nenze ra rokop don numa yewao okora more dongo bira kaikenane rakone. ⁷ No kawali ware ware netne suaine Lisias oŋo sari more, nene togogole qe mage more, metezo nene

oma nonge. ⁸ Pakiso Lisias eje don solaino qe rakoi, eje geɲano maine sari wakonikei wane qebinonge, ea wane ge ɲei iwa qesonkaikeneo, ge goɲom baɲ kine kine korop ɲene don solaino qe okanka warine, ea maine detkaikene.” Tertulusɲo yale rake. ⁹ Yuda eje takotke more, Paulo don solaino qekoi, paki mapitka ra qelaɲane rakoi, “Don iwa korop, ea welekakatne.”

Paulo Eje Piliks Wano Kineine Ra Qelaɲange

¹⁰ Pakiso, kepe ware ware ɲetne suainenɲo Paulo wano metinenɲo qe sikane more qebinkaki, Paulo eje don iwa yale maingeke,

“Na det ganmaile, ge koma loutne ɲei ɲerep magu iwa enane dere wano wanok ɲei gekone, ea wane na detpe qomne menaɲgi, don iwa geɲano wekumane main gekale. ¹¹ Ɓo ge qeson nanikene, yemo ge goɲom don iwa yale maine desikene, kaiwe mama ¹², ea wane bano na Yerusalem bakom kitokalane miti wane arikole, ¹² pakiso, Yuda eje na nanbi, ɲei manerop dongo kawali Bakom Urum kotino mi yakukote, me eje nanbi ɲei ɲerep qomene qepokkole, Yuda ɲei ɲerep enane lewa lewaɲ urum kotino me yewao me yewao mat suaine kotino, yemo midakaka. ¹³ Me eje dongo bira nanmami, iwa ea wane kine maine ra wakone ginbi, ge detnom, don eaɲo wele, eamo midakaka. ¹⁴ Ɓo na don wele wekuku yemo ge ra qelaɲan ganbe, na numa yewa mogatmaile, yemo, ‘numa mane wane tego,’ na numa yewa mogatmaile so na aso ɲabokopze enane Anutu menenka okanmaile, ɲo na yaleka yeye kine kine korop Mose wane ra rokop don

numa kotino qeqine so propet ejane buk yewao pamaike, ea detluk waremaile. ¹⁵ Na ea malipka more, Anutuño nei seu seune ma wirik oniakane toma gemaile, wane eje banj nei maine koboine miti mali malip korop so nei borikine miti mali malip midaine koropka wenenj ma wirirkoniake wane eje yalewaka malipka more, Anutu toma kamami, eje banj yalewa okanoniake. ¹⁶ Eso ea wane na naso banjem togogole more, wetne koboboine Anutu wane deo payakane, so nei enanoken paki, borikine mane Anutu wane me nei enano mi wakoniakane, wetke ge okanmaile.

¹⁷ “Na mo koma natne yewao Yerusalem qelige ari mat natne yewao gekole, na wesi natne ma sari kimakopze nei njerep magukopne ket qeqine, wesi abonj midaine qesinj ongalane arimanjkole, so Bakom Urum bakom wenenj ma sarimanjkole.

¹⁸ Na yale okane more Bakom Urum kotino wa mawe kine kine wakone Anutu wane kaitko qelanjangi, eje marat nangoi, yemo na koboboine, eamo nei njerep loutneño narop mi metkoi midaka, me nei natne eje ukat yau yaup mane mi mamankoi. ¹⁹ Njo Yuda natne Asia njine, eje wenenj yewa metkoi, edo na neu luknangoi, eje nanane detpi borimaikeo, yemo eje edom genane kaitko sari more iwa dongo maine birananikei.

²⁰ Me midakiso, nei iwa eje mo Kaunsol enano metkoi, yewa edo detpi, na don rakole, ea detonom, edo golasikei eje nanano onoka umat mane marat kakoi, naso na Kaunsol ejane kaitko okorakole, yewao ²¹ so yewao na don weku sogino enane kaitko okora more, iwa yale boka rakole,

don yewa mo eɲe mi siminonge, ‘Anutu eɲe ɲei seuseune ea baɲ ma wirik oniake, na ea detluk kamaile, pakimo eɲe kine yemda waneka na iwa ɲinane kaitko dongo bira nanmami.’ ” Paulo eɲe yale rake.

²² Piliks eɲe doku tau tau loutne eɲane mali malip so masiene ea eɲe suaine mogare gemami, ea eɲe mo derelukke, ea wane Paulo eɲe don ra warekimo, Yuda eɲe toma mesikei wane, Piliks eɲe edane rake, “Baɲ kawali ware ware ɲetne suaine Lisias ketkiso, na ɲinane don yewa makoboekale.” ²³ Paki eɲe ware ware ɲetne suaine olatke, eɲe Paulo mulapko birakayake, ɲo eɲe mulap urumgo togole zok mi birakayake. So Paulo eɲe kimakoune edo kine kine qesɲjakei, ea wane mi rawet onge.

Piliks Eɲe Paulo Koma Etke Yale Mulap Urumgo Birakaki Metke

²⁴ Kaiwe mama natne ari qoeki, Piliks eɲe ɲanomine Drusila weneɲ ketkoik, ɲerep yewa Drusila eɲe Yuda maguo ɲine, pakimo Piliks eɲe donine natne desiakane Paulo ora newankake, Pauloɲo olale rake, “Doku tau tau magu eɲe Kristo Yesu malipka lukmami, ea wane ge yale waka malip kaikene.” ²⁵ Paulo eɲe olatke na-soo baɲ Waom eɲe ɲene korop don uratao bira ɲoniake, ea wane masi tanik makoboekai wane eɲe rake, so ɲei ɲene iwa yaleoka okan okan mamaze ea makoboekene. Yale rakimo, Piliks eɲe kaetkake, pakimo olale rake, “Ge iwa yaleoka arinom, baɲ naso natneo koso naso paniniakeo, gora newan ganikale.” ²⁶ So Piliks eɲe kine kine

mane wane wenenj tomake, enj wetke rake, Paulo enj wesi natne banj niniake, ea wane enj naso banjem ora newankaki sari naso banjem enjerop wenenj metmanjkoik.

²⁷ Yale gemage, koma etke qoe ariki, mo njado Porsius Pestusnj Piliks wane urata ea make, so Piliks enj okangi Yuda wet pese desikei wane, enj Paulo ea koso mulap urumgo togole metke.

25

Paulo Enj Sisa, Roma Kepe Ware Warenj Dohne Desiakane Oraki Sarike

¹ Pestus enj sari more, so enjine kepe suaino, distrik make, wane enj kaiwe karewe mere more Sisaria qelige more, wie Yerusalem arike. ² Yewao Pris njetne so nej suaine natne enj enjano ari more, Paulo wane solaino don qesatka more rakoi, so enj don togogoleka iwa yale ra togole more rakoi. ³ “Ge njene qesinj njone more, nej yewa bira kanom Yerusalem sarikep.” Enj numao siuke mere more, Paulo qeu seukeakane okane mo rakoi. ⁴ Pakimo Pestus enj don mainge rake, “Paulo enj Sisaria mulap urumgo metmaike, nasomde nigatne nojom Sisaria arikale, ⁵ yale wane njetnekopnjine, enj wenenj narop kesikei, paki nej yewa enj sotinerop okangi, so enj dongo maine birakakei.”

⁶ Pestus enj enjerop kaiwe 8 me 10, ea wane rokop metke, paki enj koso Sisaria ketke, kaiwe mama maneo enj don rara mama matko metke, pakiso enj Paulo ma sarikei wane edange. ⁷ Enj mo sariki so Yuda enj mo Yerusalem qelinka more ketkoi, enj enjerop wenenj okora more, don

qesat umat loutne solaino qekoi, ɲo don urata yewa kinerop midaka, eɲe don urata sawaɲ yaup makoi, ⁸ paki Paulo eɲe don iwa yale maingeke, “Na sot mane mi makole, Yuda eɲane ra rokop numao, me Bakom Urum koto, me Sisa wano, i midakaka.”

⁹ No Pestus eɲe Yuda kelok okanonge, ea wane eɲe Paulo olatke, “No ge Yerusalem arikene me? Yale oken yemo don urata ɲone iwa na Yerusalem yewao koso desikale.”

¹⁰ No Paulo eɲe rake, “Na Sisa eɲine mazakan mazakan don urum kaitino okoramaile, iwao naɲane kine ma wakonikene, na sot mane Yuda ɲei mi okan ongole, ge goɲom mo det lukmaine, yalewa. ¹¹ No na Mose ra rokop don mane qe barakkole, so sot mane okangoleo, yemo ea wane ra more maine seukkale. Na ea wane golale more kaet mi arikale, ɲo don yewa wele midaine, eɲe yaup wane dongo bira nanmamiwo, yemo ɲei maneo maine eɲane meteeno mi bira naniake, na Sisa wane ramaile, oɲo naɲane kinene mazakane desiake.”

¹² Rakiso, Pestus eɲe Kaunsol koune eɲerop don au dere more, mainge olale rake, “Ge Sisa wano ramaine, donɲone mazakane desiakane, eso ea wane ge baɲ Sisa wano arinom.”

Pestusɲo Paulo Wane Agripa Qesonkake

¹³ Kaiwe mama natne ari goeki, ɲei waom, king Agripa so ɲanomine Bernais ere Sisaria Pestus kaiweo manikeik wane sarikoik. ¹⁴ Ere kaiwe mama loutne ea Sisaria eɲerop metkoik, ɲado Pestus eɲe Paulo wane don ea ɲei waom, king

rawakone olale rake, “Nei mane mo alakan Piliksno qeliŋka arikimo iwa mulap urumgo metmaike, ¹⁵ na mo Yerusalem arikole, naso yewao Yuda Pris netne so nei sele eje don solaino qe more, ŋabakakoi paki, nono turuŋine wikile qotkoine manikalane nolatko. ¹⁶ No nono yemo edane rakole, Roma gavaman enane masi yemo nei mane yaup turuŋine midaine wikile qotkoine man man, eamo mi pamaike, nei mane sot mane wane ra more, nei diawa edo dongo bira kamami, nei yewa eje ŋabakoune enane kaitko wakongi, marat nagu deno de aeke okorakei paki, eje naso manbi kine onoka wane dongo birakemi, ea wane eje ŋabakoune enane don turuŋine maingeake. ¹⁷ Pakimo, eje iwa sarikoi, ikopka kepe qaeki, mazakan mazakan dongo metkole, so nei yewa ma sarikoi wane ra ongole, ¹⁸ enane ŋabakoune dongo birakakoi, eje wie okorakoi, no eje masi qotkoine mane okange, ea wane solaino qe dongo mi birakakoi, na wetke rakole, yalewaoken mane dongo bira kaikei rawe mo mida okange. ¹⁹ Eje don ŋaba korop Paulo okankakoi, yemo natne enjene mitienane so nei mane enetine Yesu, eje mo seukke, no Paulo ramaike, eje wisikae gema. ²⁰ Na don yewa wane kine marat kaikalane nanmaike, no wet dereretneŋo maine mi lotke qelaŋanmaike, ea wane na qeson kakole, ‘Ge maine Yerusalem arikene paki, na geŋane donba yewa eamo eri Yerusalem detperap?’ ²¹ No Paulo eje mulap urumgoka warekau mesiakane rake, so qeligeu, Sisaŋo enane don yewa makoboeake, eso ea wane

na enane don ra ebongole, warekau mulap urum-goka met mageki, na Sisa wano maine birakawe ariake.”

²² Rakimo, Agripaŋo Pestus olale rake, “Na nonom ŋei yewa wane don desikalane nan-maika.”

Rakiso, Pestusŋo rake, “Ge baŋ qaeki de-tkaikene.”

²³ Kaiwe maneo Agripa so Bernais ere kibi maimainenjo au mage lewa lewaŋ urumgo sari kawali ware ware ŋetne so mat suaine ea wane ŋetne enjerop urum koto waketkoik, pakiso Pestus enje qebinongi Paulo iwenka sarikoi. ²⁴ Sariu Pestus enje rake, “Ŋei waom King Agripa, so ŋei korop iwa ŋenerop wenenj metmami, ŋine ŋei iwa kau, Yuda ŋei ŋerep magu korop iwa so Yerusalem matko wenenj, enje korop ŋei iwa nanane kaitko dongo biraka more, ra togole rakoi, ‘Ge qenom seukeake, enje wisika naso kiroine mi geake,’ ²⁵ ŋo nonjo kawe enje kine kine mane enje seukeakane rokop mi make, paki onjom yaleka Sisaŋo donine, ea desiakane reke, ea wane na birakawe ariakane don ma togolile. ²⁶ Ŋo na enane donine kine mane mi maratkawe wakone qelanjanmaika, na maine kibi mire motpe, suaine zano ariake, eso na ŋine so ŋei waom King Agripa, ŋinano iwa ma sarimaile, ea wane kineine ma wesake detluknjem paki, ŋado na maine don natne kinerop kibiwo qe mosikale. ²⁷ Iwa yemo kine midaine mulap ŋei mane birakawe ariake, na yale kamaile, ŋabaka dongo bira kamami, ea wane kine didiwo mi ra qelanane sikan kaikene, detpe mi rokop ke-maika.”

26

Paulo Eje King Agripa Wane Don Rake

¹ Pakiso, Agripa eje Paulo olatke, “Ge maine geɲone donɲone rakene.” Paki Paulo eje metine ma wie more donine iwa yale rake,

² “Nei Waom King Agripa, na detpe, wekumane okanmai, na maine kinene geɲane kaitko ra wakonikale, Yuda edo qesat don solano qe ramami, ea wane turuɲine main gekale. ³ Iwa weku yemo welekatne, onoka wane ge Yuda ɲenane tanik manik so qeso qeson kine kineze mo korop detlukmaine. Ea wane ge tikɲane mere nanɲane don desikenane na golatmaile.

⁴ “Na qaluwitno daleo ge sarikole, ea wane kine Yuda eje mo korop det waremami, na gegene korop daleo gekole, nae kepe matko so Yerusalem matko, eje mo qei kino ɲine detpi sari goe waremami. ⁵ Eje mo naso banjem detmanɲkoi, eje raikei wane onmai, na maine ra wakonikei, yemo na ɲenze maguzane numa togon, ea wane kopko mikepka mogale, Parisi numa tanik manik gekole, numa ea zok urata suaine, eanɲo ɲenane miti wane masi tanik natne ea yuan kamaile. ⁶ So na ukude iwa okoromaile, kinene mawakonikei wane, dongo bira nanmami, so kine yemo iwa yale, na Anutuɲo aso ɲabokopze yeye kine kine ban ma wakon wareakane mo edange, ea malipka more tomaka gemaile, ea wane. ⁷ Donine iwa mo ra edange, ea wane ɲenane Israel esep milop magu 12, eje ea maikei wane malipka tomaka ge more, Anutu menen kamami, kaiwe so ruo, yemo onoka wane

na yaleka iwa malipka more toma kamaile. O ñei waom, kine iwa wane Yuda eñe nanjane solao don qekoi! ⁸ Onoko wane ñei natne ñine wetkemami, Anutu eñe koso ban ñei seu seune ma wirik oniake, ea ñene misuk malip kaikene yale wetkemami?

⁹ “Na nonom alakan masi kine kine korop loutne ma more, Yesu Nazaret ñine, eñane eñetine maine mawe kesiakane wetke more ñabakakole, ¹⁰ na Yerusalem matko yalewa okangole, na mosop ñei Pris ñetne eñano ñine ñei ñerep ebu lukonikalane zonom togole makole, paki Anutu wane ñei ñerep loutne zok mulap urumgo bira ongole. So eñe enguwi seukmanjoi, yewao na yaleka ebene bonepke more maine ramanjole. ¹¹ So na naso banjem Yuda lewa lewanj urumgo korop engu matali ongole, so ñei ñerep eñe Anutu ma baikka more, mali malip, ea isi raikoi wane, na masi yale makole. So na eñane wet gerep zok manerop okangole, ea wane na lobo kepeo matne matne yaleka engu matali onikalane arikole.

Paulo Eñe Doku Tau Tau Maguo Takotkeke Ea wane Don Kisi Edange

¹² “Kine iwa yale wane na mosop ñei, Pris Suaine magu eñano ñine kibi mawe, eñe qebin nanbi, na Damaskus arikale. ¹³ Kepe onja bango, 12 kilok okangi, O ñei waom, numa ke-bago na kawe kiwa mane qeliwo ñine ketke, qelanane zok manerop so togogole, eamo kepe ñeina qelanjan yale midakaka, eñe kepe ñeine

yuankamaike, eaŋo ket qelaŋaneŋo motki qezazakke, na so ŋeiwa narop arikone eamo qelaŋaneŋo lolikŋonge, ¹⁴ ŋene korop kepo ket rasu pa warekone. Na papaset pa detpe, mo don mane Hebru dongoka nolale rake, ‘Saul, Saul, ge onoka wane neku matali nanmaine? Ge kine kine ŋetne teine, ea kitonom, eaŋo zinge geŋone wikile ginmai.’ ¹⁵ Pakiso noŋo qesonka rakole, ‘Ge maŋo, Waom?’ Rawe so Waomŋo rake, ‘Na Yesu, ge na neku matali nanmaine, ¹⁶ ŋo ge wienom paki, kienone kutno gesoke okoranom, naŋane qelit ŋei okanikenane, na ge wakongane more ma wakon ganmaile, ge kine kine onoka ukude naŋano ŋine ka waremaine, so onokaka na baŋ ŋado sikan ganikale, ea ŋei ŋerep natne rawakone edangene. ¹⁷ Na baŋ Israel ŋei ŋerep magu so qelaŋ magu, eŋane meto ŋine geukale, na eŋano baŋ bira ganbe arikene, ¹⁸ ge deene matokkenane, so panamango ŋine ebu main onnom, qelaŋango sari wet maingekei, paki eŋe maine Satan wane zonom ea ŋadekkau, goŋo Anutu wano bira onikene, eso eŋe mali malipene naŋano payake, ea wane ra more, eŋane borikineene baŋ ebu makale paki, eŋe Anutuŋo ŋei ŋerep magukoune ma wesakonge, wane ŋei ŋerep eŋe na malip nane more, eŋe maine ŋei ŋerep eŋane keueno naŋane biŋek okane numaene ma more gekei.’ ”

Paulo Eŋe Miti Urata Make Ea Wane Agripa Olatke

¹⁹ Paulo eŋe koso rake, “Eso ŋei waom King Agripa, na qeliwo ŋine kine kine ea kawe paki, eŋane don ea mi birakole, ²⁰ mikepka

yemo Damaskus matko ra qelanjane edangole, so Yerusalem matko so Yuda enjane kepe matko korop so qelan enjane keueno rawakone edangole, so iwa yale ra edangole, ‘Njine zingeu paki, wetnjine Anutu wano motpi arikep, so njine yeye kine kine maikei, no wet maingemami, so Waom qomka more, qelananmami, ea wane wetnjine motpi, ea wane numa oken ariake.’ ²¹ Na don yaline ra qelananbe, kine yewa wane na Bakom Urum koto gewe, Yuda nej ene neu malip nangoi paki, nekukei wane okangoi, ²² no silun kaiwe nasomde yewao Anutuño qesin nange, paki yewa njine gesari mage ukude okanmai, eso ea wane na iwa okora mo, nae don kisi njine korop ra wakone njibonmai, nej njerep ketkele so wawaine wenen. Na don ramai, eamo don mane mida, don wekuka, propet so Mose ene mo wakoni-akane rakoi. ²³ Ene iwa yale rakoi, nejwa yewa Mesia, ene wikile kaukeake, so borikino njine ebu main oniake, paki onjo lewine seu seu njine wisikae wie more, mena menan wane kiwa qelanjane, ea wane don rawakone, Yuda nej njerep so qelan nej edaniake.”

Agripa Ene Malipkayakane Paulo No Rake

²⁴ Paulo ene enjine donine qesin nagu don numaine yale raki, Pestusno kuronka rake, “Ge qelan qemaine, Paulo! Ge kibi urumgo ge more dereret suaine makone, earjo qebingangi qelan qemaine.”

²⁵ Paulonjo mainge rake, “Na qelan mi qemaile, genone maine, na don korop ra waremai, ea wele so welekatne, ²⁶ Nei Waom King Agripa,

na maine korop kaet midaine ge golat warekale, onoka wane ge kine kine iwa wane kine mo det waremaine. Na detmaile, yemo ge don iwa korop mo det waremaine, mane mi yuan kakone, kine kine iwa siuke ari qekatno mi wakonge. ²⁷ Nei Waom King Agripa, ge propet enjane don det lukmaine? Na detmaile, yemo ge det lukmaine!”

²⁸ Raki Agripaŋo Paulo olale rake, “Ge nasomde bamgo iwa wane kotinoka baŋ neunom, na doku tau tau mane okanikale, yale wetkemaine?”

²⁹ Raki Pauloŋo olatke, “Nasa bamgo me naso kiroine, ea maineka, naŋane meŋe meŋenne Anutu wano motmaile, yemo ge so ŋei natne korop ŋine naŋane don iwa detmami, ukude maine na yale okanbi rap, wekumde, yemo sein iwaŋo ŋinanano misuk mesiake!”

³⁰ Paulo enjane don raki goeki, ŋei waom enjane wieki, ware ware, Bernais so ŋei natne korop wie warekoi. ³¹ Enjane urum qelige ketpi paki, ŋado manenjo mane au rakoi, “Nei iwa enjane sot kine kine mane maki seukeakane kop me mulap urumgo birakakei wane kop maine mi okange.” ³² Pakiso Agripaŋo Pestus olatke, “Nei iwa enjane Sisaŋo done mi desiakane ra more enjano mi wakonge ra, yemo maine birakanom arikirap.”

27

Paulo Roma Ariakane Enjane Seki Make

¹ Nene seki ma more, Itali arikenane don mo ma togolekoi paki, enjane Paulo so mulap ŋei natne, ea kawali ŋei(100) zaleene yalewaŋo enjane ware ware ŋetne, enjetine Yulius, enjane

meteo biraongoi, kawali nei yewa ene Sisa wane magu. ² Nene Adramitium enane seki mane ene Asia mat suaine ea wane sawekino ariakane okangi, so nene yewa wane kutno sontake wakone, pakiso qoe arikone. Aristarkus ene Tesalonaika matko, Masedonia kepeo nene, ene nenerop wenen arikone. ³ Kaiwe maneo nene ari, Saidon ea lukkone, yewao Yulius ene Paulo masi maine okankake, paki Paulo ene ari kimakoune one more, enano nene nara kine kine maratka. ⁴ Nene Saidon qelige arinem, momono qebin nonge, ea wane seki ene wa Saiprus nadino arike. ⁵ Ea wane, nene Silisia so Pampilia osoetno yewaka kiwet kitare sari, Lisia kepe wane mat mane, enetine Maira, ea lotkekane. ⁶ Mat yewa wane kawali nei enane ware ware netne kapten mane, onjo Alekzandria enane seki mane, Itali ariakane okange, ene maratka more, so nebu ari seki yewao biraongi wakone.

⁷ Paki nene ea nene qoe more, seki yewa ene bororom bororom ariki, ea qeka genem naso natne midake, paki nene urata suaine ma sari mage, Nidas mat osino lotkekone, paki momo suaineno numa lenjongi, koso arikenane numaze mi lotkeki, nene Salmone osino Krit sia nadino lolike arikone. ⁸ Ene urata suaine mau, Krit sawek qe kororon mogare gemage, ban mat mane enetine, Seki Wake Waket Maine, ea ari waketkone, ene Lasea mat suaine osino.

⁹ Nene naso kiroroina yewa metkone, met magenem takotke numa ari ari, eamo zok kiwet borike, onoka wane naso yewao Yuda enane Tau Met Met naso ea mo yuange. Ea wane

Pauloŋo edane rake, ¹⁰ “Nei nau, na kamaile, yemo njenane numaze iwa njine koso arikene, eamo ban kakarauk kaikene, eamo ban abon korop so seki wenenj mataliake, so nej gegeze wenenj midayake.” ¹¹ No kawali nej enane njene, ene seki ware ware so seki welaine erane don dere malipkake, no Paulo wane don ea yemo mi malipkake. ¹² No momo nasoo sawek yewao seki okora okora wane zake mat maine mida, ea wane nej loutne seki kutno metkoi, ene ea qelige more maine ari Piniks lotke more, mat yewao mesikei wane ra togolekoi, onoka wane momo suaine puange, ea wane, Piniks ea yemo Krit wane sawek mane seki okora okora wane basis maine. Qekatno wane momo maine mi puaniake.

Dibom Suaine Wakonge

¹³ Rai momo lupluwine kieke puangi, so ene rakoi, njene don tegoze au more pisekone, ea maine teweke okangene, eso ene anka warageu waki, so seki mau qalak mogare Krit sia osino arike. ¹⁴ No mi azongi momo togogole mane “Yawara,” oramami, siao njine puangi ketke. ¹⁵ Ket eanjo seki qe main qein maki, so sekiŋo momo oken ariakane kop mi okange, njene ea manem ariakane, eamo yeine qelingone pakiso, momoŋo tewekjone arike. ¹⁶ Nene sia nigatne Kauda yuane raiwoken arikone, yewao njene qekatne natne marat kakone, yewa njene qeka maka natne wenenj maratka more, seki wane digi mulapno lukkone. ¹⁷ Ene digi ea warankau, seki kutno waki so mulap natneŋo makatake sekiwo walipka

more pisekoi. Ene sekiŋo Libia wane qalak meuno wa soŋageakane kaetonge, eso ene seli mau ketki so seki qeliŋkau, momoŋo qebinkaki arike.

¹⁸ Momo suaine takotke qeki, dibom suaine, eso kaiweine maneo yemo ene kieke, seki wane aboŋ qakeu kiwetko ketke. ¹⁹ Pakiso kaiwe karewe

yewao ene seki wane mulap so aboŋ natne enŋene metenengo ma qakeu kiwetko ketke.

²⁰ Kaiwe loutne ŋene kepe deine me serekin mane mi kakone, so momoŋo takotke togogle puange, naso yewao ŋene waetne arikenane wetkekone, ŋo koso seukkenane weneŋ detkone.

²¹ Urata ŋei ene ŋara mi nene naso kiroine yaup tau gekoi, ŋado Pauloŋo ŋei kaiteno wie okora more rake, “Ŋei nau, ŋine nanane don maine detpi rap, paki ŋene Krit sia mi qelige sariŋem rap, yemo ŋene kakarauk korop iwa so aboŋ, ea mi mataliŋem rap, ²² ŋo, na iwa qebin ŋunmaile, ŋine togoleu, ŋinano ŋine manŋo gegeine baŋ mi qeliŋgi siukeake, sekiŋoka weku yemo baŋ siukeake. ²³ Na Anutu wane urata ŋei, na eŋane ewine kito okanmaile, yatne ruoo Anutu wane aŋeloŋo nanano sari more, nolale reke, ²⁴ ‘Paulo, ge misuk kaet ganiake, ge Roman gavaman ware ware suainane kaitko siluŋ okorakene, so Anutu ene eŋine wet menaŋinane okanmaike, ea wane ene geŋane ra more, ŋei korop seki koto gerop gemami mapik oniake.’ ²⁵ Ea wane, ŋei nau, ŋine togoleu! Na Anutu malip kamaile, ene don kine kine nolalike, ea wane rokop baŋ korop mayake. ²⁶ Ŋo momoŋo ŋene baŋ puan ŋongi, qalakko sia natne mane waikene.”

²⁷ Ruo 14 okangiso, momoŋo ŋenane seki qe-

binkaki, Mediterenian kiwetko wawa ket ket lo-like pake. Ruo banino, seki wane urata nei ene detpi, nene kepe osino lotkekone, yale okange. ²⁸ Ea wane ene wesi mane mulapko luke kiwetko birau ketki, koso warageu saki mulap darapno kiwetko ketke, ea dapotkoi. Mulap wane kiroineine ea 40 mita. Nigatne ari ari more, ene mulap ea koso kiwetko birau ketki, koso warageu saki dapotpi, 30 mita yale okange. ²⁹ Nenane sekizenjo karaban kutno wayakane ene kaetonge, eso ene anka etke so etke(4) nadino nene biraonbi ketkoi, pakiso kepe qayakane menjenkakoi. ³⁰ Seki wane urata nei ene sekiwo nene kaet arikei wane okane, ene digi mane qei qoron qoron kiwet kutno ketki, isione more rakoi, ene anka natne seki sotno nene birau kiwetko kesikei, ³¹ no Paulo ene one more kawali nei netne so kawali neikoune edange, “Seki wane urata nei ene seki kutno mi mere more seki qelinj kaikeiwo, nene korop seukkei.” ³² Yale raki, so kawali nei yewa ene digi wane mulap kitatpi paki, qelinjkau arike.

³³ Kepe mo qayakane okangi, Paulo ene nei yewa edo nara nekei wane raone rake, “Nine toma sari mageu, mo kaiwe 14 ukude lelemaike, ea wane na ra nunmaile. ³⁴ Na nene menjen nunmaile, nene nara natne neu, ninane lewenjine zoune mane ban mi siukeake, wikile mane mi desikei.” ³⁵ Paulo ene yewa raki qoeki, nado bret natne ma more enane kaiteno korop Anutu bakomine kito more, ea mapokike paki, kieke neke. ³⁶ Pakiso ene korop zonomene motki, yaleka nara natne nekoi. ³⁷ Nene nei korop

276ηo seki kutno gekone, ³⁸ ηei korop ηara neu rokop ongi, so ηado sekiwo ηine wit peike qakeu kiwetko ketki so seki ewekke.

Seki Qalakko Borike

³⁹ Pakiso kepe qaeki, seki wane urata ηei ene kepe yewa mi detkakoi, ηo ene sotne mane qalakine wenen pake, eso ene dere rakoi, maine yale okaniakeo, yemo ηene seki manem qalak yewao kere kitoyake. ⁴⁰ So naso yewaoka ene anka etke so etke ea wane mulap kitatkoi, so mulappa dama dama malipkaki mainge okanmaike, ea siwot warekoi. Pakiso ene seli abonbi, sotno waki, so momoηo puane seki qebinkaki arike, paki qalalage qalakko arike. ⁴¹ No seki ene lawao wa qe more, qalakko sonage metke, seki sotne ene makatake metki, mau mi qoe weteke, eaka dibom suainero seki kainoken eamo rasipokki, din bun wiri ket arike.

⁴² Kawali ηei ene mulap ηei korop engu wareu, enano ηine manero kaet logone qalakko mi ariakane wetkekoi. ⁴³ No, kawali ηei netne ene Paulo lolon kayakane wekeke, eso ea wane ene ηeikoune yewa mi okanikei wane rawetonge, ea wane turuηine yemo ene ηei korop logo logon wane kine detkoi, ene alakane sontake kiwetko ket more, logone ari qalakko wakei wane edange. ⁴⁴ Wele korop ene palan kutno so seki wirike, ea wane eki sisine eaoka more qesunka more, logone arikei wane edange, ηene yalewa okane more koropηo maineka qalakko ket warekone, ηo ηenano ηine manero mane mi siukke.

28

Paulo Malta Geke

¹ Nene maineka qalakko ket warekone, yewao nene detnem sia yewa enetine Malta orakoi. ² Sia welakoune enje kima okan nongoi paki, kieke koya qeke so momoine okange, eso enje gerep dubukeu zeki so nene korop njebu yai ososok okan nongoi. ³ Paulo enje gerep koage sari qakki paki, peikki gerepko wake, yewao koma mane gerep anetnejo qeki saketke, pakiso Paulo wane metino ki onomka walipke okorake. ⁴ Sia welakoune enje kau, komano Paulo metino kisage ket okoraki, enje alat nagu au rakoi, “Nei iwa enje nei mane mo qeke, wane enje kiwetko mi mideke, jo silun koboboine welaineno sesekaki mi geake, ban seukeake.” ⁵ Paulo enje qataringi qoe gerepko ketki, enje detki mane mi matalikake ⁶ Paulo wane solaine sua kayakane me enje ikopka ket rasu more, seukeakane tomakakoi, jo enje naso kiroine tomakau so Paulo enje wikile mane mi detke, ea wane enje dereretene mainge rakoi, “Enje anutu mane!”

⁷ Ea nine duma bamgo kepe mane pake, kepe ea Publius wane kepe binjek, nei ea enje sia ware ware netne, enje nene marat nongi, so nene matino kaiwe karewe kulit gekone. ⁸ Publius wane magaine enje kulu urumino zoma kaki pake, so enje ka bira wira wenen okankake, so solaineno gereune okangi, papaino pake. Paulo enje kulu papa urumino waket menenkake, so metine etkeka enane kutno more more, ma menankake, ⁹ enje yale okankaki, naso eaka sia ea wane zoma

nei n̄rep loutne eṅano lotkeu, eṅe yale waka ma menaṅ onḡe. ¹⁰ Ea wane sia ea welaine eṅe ṅene bakom loutne ṅebongoi, so ṅene sekiwo waikenane okann̄em, eṅe ṅenane ṅara maun kaki loutne qesiṅ ṅone more, sekiwo motkoi.

Paulo Eṅe Malta Qelige More Roma Matko Arike

¹¹ Meso karewe qoeki so seki mane, eṅetine ‘Anutu Atiksipo’, Alekzandria matko ṅine sari pake, seki ea eṅe momo suaine qeke naso eao eṅe ea pake, ṅene seki ea wakēt more arikone. ¹² Ṽene Sirakus matko lotke more, kaiwe karewe metkone. ¹³ Ṽene mat ea qelige more, ari mage Regium matko lotkekone, kepe qaeki rai momo kieke puangi, so ṅene kaiwe etke Puteoli matko lotkekone. ¹⁴ Ṽene mali malip ṅei natne yewao marat onṅem, so eṅe ṅene newan ṅonbi, so ṅene eṅerop soda weku gekone, ea wane ṅadino yemo ṅene baṅ Roma matko lotkekone. ¹⁵ Roma mat wane malip malip ṅei n̄rep eṅe ṅenane don kisi, eṅe sarimami, ea detkoi, dere more Ap̄ius Wane Naluo so mat mane Lobo Mat Karewe, ramami, ea numao sari marat ṅongoi. Pakimo, Paulo eṅe one more, Waom dage olale bakom kitoka more wet mali malipine so wet dereretine matogoleke.

Paulo Eṅe Roma Matko Ra Qelaṅange

¹⁶ Pakimo, ṅene Roman matko lotkekone. Lotkeṅem so Roman gavaman ṅetne eṅe Paulo mat maneo eṅineka so kawali ṅei mane warekaki mesiakane bonep birakake.

¹⁷ Kaiwe karewe qoeki, so Paulo eṅe Yuda ṅetne Roma matko gekoi, don ebone more rake, “Ṽine

maine nanano sarikei.” Yuda netne eɛe don ea dere more, Paulo wano lewageu, so Paulo eɛe iwa yale edange, “Kimakop Israel ɛei, ɛei natne Yerusalem gemami, eɛe na dongo bira nangoi, na ɛenze Yuda ɛei ɛerep magu so aso ɛabokopze eɛane numa ea mane mi ma qasikkole, ɛo eɛe siluɛ mulapko Yerusalem biranangoi, so eɛe Roma gavaman wane meto birananbi, so eɛe na mulap urumgo birananbi waketkole. ¹⁸ Eɛe nanane don kot ea detkoi, detmageu, nanane umat eaɛo seukkalane rokop mi okange, ea wane eɛe na qeliɛ nangei wane onge. ¹⁹ No, Yuda ɛei edo don ea wane soringekoi, ea wane nanane dumane mane mi wakonge, pakimo na Sisaɛo don kot, ea desiakane bokakole, na Yuda magu ea dongo mane mi biraongole. ²⁰ Kine kine ea wane na ɛine iwa don ɛidanikalane newan ɛunmaile, onoka wane Israel ɛei ɛerep ebuki menangei wane tomaka gemami, na ɛei ea wane rawe paki, sein iwa meteno kisage metmaike.”

²¹ Yuda ɛei eɛe don kisi ea dere more olale rakoi, “Nene kibi mane geɛane don kisi Yuda kepeo ɛine motpi sariki, mi ma dapotkone, me kimakopze natne yewa ɛine mi sari more, geɛane don kisi ɛedangoi, me geɛane don gotkoine mane mi rakoi, ²² ɛo ɛene geɛane wetɛonane kine desikenane ɛonmaike, yemo onoka wane ɛene detɛem yewao me yewao ɛei ɛerep eɛe geɛane magu ea wane dere worik okanmami.”

²³ Eso eɛe yale rau paki, Paulorop naso mane motkoi, pakiso kaiwe naso yewao Yuda ɛei ɛerep magu suaine eɛe Paulo mat metke, yewa sari

lewangoi, Paulo eje Anutu Ware Wareinane don kisi ra qelanane, nei nɛrep edane metki ari ruo kereke. Eje Mose wane ra rokop don ea so propet edo don qekoi, ea wane kine ra wakone Yesu eje Mesia, ea detluk kaikei wane wetene ma eweke edange. ²⁴ Nei nɛrep natne eje Paulo wane don detkoi, ɲo nei nɛrep natne eje don ea mi malip kakoi. ²⁵ Eso eje edomka don auye kitat okan nagu more arikoi, pakiso Paulo eje ɲado don weku iwa edange, “Asu Koboboine eje propet Asia wane piino don motki, eje aso ɲabokop ɲine don rauluke edange! ²⁶ Eje rake,

‘Arinom paki, nei nɛrep iwa edannom, ɲine ban dereret i maine desikei, ɲo kine mi detlukkei, ɲine ban kaka i maine kaikei, ɲo wele mi kaikei, ²⁷ onoka wane, nei nɛrep iwa enane dereretene mo siukke, eje ketene mo qe wongekoi, so deene mo kulakoi, ɲo midao eje deeneɲo maine kaurap, eje keteneɲo maine detlukeu rap, eje derereteneɲo maine detlukeu rap, so eje nanano maine zingu rap, Anutuɲo ramaike, so na maine ebuwe menangeu rap.’ ”

²⁸ Don ea goekiso, Paulo koso takotke rake, “Na don iwa ɲidanbe ɲine desikei, yemo Anutuɲo nei nɛrep ebuki, mena menan ea wane don kisi, ea yemo mo qelan nei nɛrep enane more ebonge, edo ban desikei!” ²⁹ Paulo eje iwa raki goeki, ɲado Yuda eje don zok manerop auye kitat okan nagu more so arikoi.

³⁰ Koma etke Paulo eje mat mane onjom qoleke, yewao geke, pakiso nei nɛrep korop enano sari-

man̄koi, en̄e yai ososok okanon man̄ke. ³¹ En̄e Anutuño Ware Wareinane so qeli ewe zonomi-nane don ra qelan̄ane n̄ei n̄erep edange, so Waom Yesu Kristo wane kine kaet so qeka maka midaine kito edange, so n̄ei man̄eño madet len̄ len̄ me ra togoleka ra togoleka, ea mo mane mi okankake.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963